

## YOHAN TUNG" RA" NGAUI BAU" LAU DAO: GAI

Kao So' Mung Dao:

**1:1** Sao qhid' maqhid mae mung dao: na: ra". Ai: mung dao: wa Mao" So we' daga" ngad mung:- mung dao: wa Mao" So ngad: ra". **2** Ai: mung dao: wa sao qhid' maqhid mae" Mao" So we' daga" ngad: ra". **3** Mao" So wa ai: mung dao: khyo" yang cao jab alhab' re phan" to" ra". Yao: mabo lo: phan" to" ru daja: re: majo, ngad: ra". **4** Ai: mung dao: wa kao so' ajhaung ngad: ra". Amung: ai: kao so' wa xao su byu qe: qhid' mae" bo" bao ngad: ra". **5** Ai: bo" bao wa mug: cad' khug mae bao: jo, mung:- mug: cad' wa bo" bao re khonhae" re: maqo" aung: pye' ngad: ra". **6** Mao" So wa Yohan ga: mang: ra" yang re yao" lagyo: khyo" yang nhao: ke' ra". **7** Alhab' mo, wa the' gyo: yang: lam" genae" qhid' mae" Yohan wa ai: bo" bao re ta" kyo: nae" yao: joe" li" ru ngad: ra". **8** Yao: yao: wa bo" bao mangad:- Bo" bao: khyo re ta" kyo: nae" qhid' mae" joe" li" ru ngad: ra". **9** Ai: bo" bao wa myid gaung dao khyo joe" li" mung:- xao su byu alhab' mo; dao mae bao byid' ra" bo" bao agyang" ngad: ra". **10** Ai: mung dao: wa mug:myid mae ngad: ra". Mao" So wa yao: khyo" yang mug:myid re phan" to: ngadqere: mug:myid wa yao: re maba ngad: ra". **11** Yao: wa yao: yao" mug: mang: khyo joe" li" ngadqere: yao: yao" mang: byu qe wa yao: re malham: khae: yu ko" ngad: ra". **12** Ngad yang: re: yao: re khae: yu mung: lam" ra" mo, alhab' re Mao" So: zo: dau qo" boe" ra" akhang" byid' ra". **13** Ai bam wa xao su byu khyo" khau: li" mung:- yao: yao: za: Mao" So: zo: dau qe boe" li" ru mangad:- Mao" So wa yao: bam: nho: yao: pho" ngad: ra". **14** Mung dao: wa xao su byu boe" li" mung:- nhag' myan" ru we' dang man" ru byang" jo, yang:- ngo=nhaung" phaung mae na: ra". Yao: pho" nho: zote: zo: dayaug khyo" yao: kham: yu: to" ra" yao" phung bao re ngo=nhaung" the' myao va". **15** Yao" khyo re Yohan ta" ru wa nga" thao mae joe" li" ra" yang wa ngo tho' je: qi: yang ngad: ra"- ein: ngo ta" na: ra" yang wa ceyaug ngad: ra". Pe" mung: ga" re yao: wa ngo makhau shima" na: jo, yang ngad: ra"- ga: ta" ra". **16** Yao" nho: nhag' myan" ru byang" jo; rumae" yao: wa ngo=nhaung" alhab' re shaman" je"ju" daja: thao daja: byid' ra". **17** Mao" So wa Moshe khyo" yang tarha" byid: ngadqere: nhag' myan" ru we' dang man" rure wa Yesu Khristu khyo" yang byid' ra". **18** Mao" So re khag' re: mamyao: qu" ngadqere: yao: pho" tao: kheim" mae na mung:- Mao" So yao: ru" ra" zote: zo: wa Mao" So re qhu" byid' ava".

Bab=ti=zam Yohan Nho: Mung Dao:

**19** Yerusalem mae na ko" ra" Yuda kheim: so' qo" ra" mo, wa khin jaung qere we' Levi kaung daqhae: re Yohan jhao" nhao: ke' mung:- nao khag' ngad: i? ga: myid: nhao: ke' ako". **20** Ailao" Yohan wa- ngo wa Meshia mangad: ga: manyham: mazug' lo: de: de: za: ta" ra". **21** Yao: bam wa Aire nao khag' ngad: i?- Nao wa Elia ngad: i? ga: myid' ako". Yohan wa ngo mangad: ga: tau" ra". Ailao" yao: bam wa Nao wa ai: lapa yang ngad: i? ga: myid' ako". Yohan wa Ngo mangad: ga: phaug' tau" ra". **22** Alao" yao: bam wa nao khag' ngad: rure ngo=nhaung" re ta" kyo: la,- ngo=nhaung" re nhao: ke' ra" mo, re lo" dam: ta" kyo: nae" dao: cilo" ca" ra"- Naoyao: wa khoru: ta" nae" i? ga: myid' ako". **23** Ailao" Yohan wa ngo wa lapa Esaia ta" ru we' dakhyo:- Asang: khyo re din: din: za: nyhang" jhao" ge, ga: din" pyad' yo mae hug' na: ra" thoe ngad: ra" ga: tau" ra". **24** Ai: Pharishe qeyang nhao: ke' ko" ra" lagyo: qe Yohan re dam: myid: ko" ru wa- **25** Nao wa Meshia re: mangad:- Elia re: mangad:- Ai: lapa yang re: mangad: re wa nao wa pe" mung: Bab=ti=zam byid' i? ga: myid' ako". **26** Yohan wa- ngo wa qid mae Bab=ti=zam byid' ra"- Ngadqere: nao=nhaung" phaung gaung: mae nao=nhaung" maba: ra" byu dayaug ye; jo; ra". **27** Yao: wa nga" thao mae joe" li" ra" yang ngad: ra"- Ngadqere: ngo wa- yao" khyid zhaung: tau: pheim byid: nae" lhao" re: maman: qi"- ga: ta" ra". **28** Ce: khyo jham wa Yohan Bab=ti=zam byid: yang: na: ra" Yodan: gyaung: thoete' ba thug' shad' mae" Bethani vogaung: mae boe" ra" khyo jham ngad: ra".

Mao" So: Yao Nau"

**29** Thao: ba re Yohan wa yao: jhao" Yesu li" na: rure myao mung:- myid gaung byu qe: qobo re yu: pye' byid' ra" Mao" So: Yao Nau" re qu" ge,- **30** Yao: wa nga" thao mae joe" li" yang ngad qere: ngo tho' je: qi: yang ngad: ra" ein: ngo ta" ra" yang wa ceyaug ngad: ra". Pe" mung: ga" re yao wa ngo makhau shima" na: jo,

yaug ngad: ra". **31** Qhid' phyao: yao: khag' ngad: rure ngo maba- Qhid' phyao: maba ngad qere: Israel amyu" qe yao: re ba genae" qhid' mae" ngo wa qid mae Bab=ti=zam byid' ru ngad: ga: ta" ra". **32** Amung: Yohan wa Byo wa- mug: gaung mae" phaung" kyug' ru: dao" gyo" li" mung:- yao" dao mae li" no" na: rure ngo the' myao va". **33** Ngo wa yao: ai: yaug ngad: rure qhid' phyao: maba- ngad qere: qid mae Bab=ti=zam byid: nae" qhid' mae" ngo re nhao: ke' ra". Mao" So ngo re ta" ru wa Byo wa gyo" li" mung:- byu dayaug: dao mae li" no" na: rure nao the' myao: li" nae"- Ai: yaug wa Gyang" Lho" Byo mae Bab=ti=zam byid' ra" yaug ngad: ra". **34** Ai: rure ngo the' myao va"- Airu: mung: yao: wa Mao" So: Yao: Zo: ngad: rure nao=nhaung" re ngo sags: kham: kyo" ra" ga: ta" ra".

Yesu Mho" Zo: Aqhid' Qe

**35** Thao: ba re Yohan wa yao" mho" zo: shid' yaug we' daga" ye; jo; ra". **36** Yao: wa Yesu lai: lo" na: rure myao lao"- Mao" So: Yao Nau" re qu" ge,- ga: ta" ra". **37** Yao" mho" zo: shid' yaug wa ai: dao: re the' gyo: gelao"- Yesu thao cao" ye" lo" ako". **38** Yesu wa lhang: qu" mung:- yao: shid' zo: yao" thao cao" lo: na ko" rure myao lao"- ni" shid' zo: pe" re qho: na ko" i? ga: myid' ra". Yao: shid' zo: wa Rabai we"- Nao khotau mae na: i? ga: tug' myid' ako". (Rabai ga" ru wa mho" pho" ga" ru ngad: ra".) **39** Yao: wa Li" qu" geri:- ga: tau" ra". (ai: ayo, wa myi" thao byid yo, qug ko ngad: ra".) Aimung: yao: shid' zo: wa yao: we' daga" cao" ye" lo" mung:- yao: na: ra" jo, qo re yao: shid' zo: yemyao gelao"- yao: we' daga" ai: ba geim" yena: ako". **40** Ai shid' zo: mae" dayaug wa Simun Petru yao: nhaung: Andre ga: yaug ngad: ra". **41** Yao: wa ailao" jao"- yao: mao: Simun re myao mung:- Nga" shid' zo: Meshia re the' myao va" ga: Simun re ta" ra". (Meshia ga" ru wa Khristu ga" ru ngad: ra".) **42** Ai: thao yao: wa Simun re Yesu jhao" jhui" lo: ra". Yesu wa Simun re lham: qu" mung: nao wa Yohan yao: zo: Simun ngad: ra" ngadqere: nao re Kepha ga: mhang" li" genae" (Kepha we' Petru ga" ru wa dakhyo: za: ngad mung: laung: mo" baui ga" ru ngad: ra".)

Philib We' Nathanela Re Yesu Khai: Ra" Khyo

**43** Thao: ba re Yesu wa Galile mung" khyo ye" lo" nae" myid: phyid' ra". Yao: wa Philib re the' myao mung: yao: re- Nga" thao cao" wa, ga: ta" ra". **44** (Philib wa Andre we' Petru shid' nhae na: ra" Bedsaida vogaung: mae" ngad: ra".) **45** Philib wa Nathanela re myao mung:- Moshe tarha" jham: paug' mae we' lapa qe: jham: paug' mae tung" to: ko" ra" yaug re ngo=nhaung" the' myao va". Yao: wa Nazaret mae" Yoseb: yao: zo: Yesu ngad: ra" ga: yao: re ta" kyo" ra". **46** Ailao" Nathanela wa Naza=ret vo=gaung: mae" gai: ra" ru daja: ja: qo" thug' li" ra" i? ga: ta" ra". Phi=lib wa li" qu" wa,- ga: tau" ra". **47** Yesu wa Nathanela yao: jhao" li" na: rure myao lao"- apyag' asham" mabo: ra" Israel byumyu" agyang" re qu" ge,- ga: ta" ra". **48** Ailao" Nathanela wa Nao ngo re khoru: ba: i? ga: Yesu re myid' ra". Yesu wa- nao re Philib mali" khai shire pho' ham" gae qao: mae nao na: jo; ra" au: mae" nao re ngo myao va" ga: yao: re ta" ra". **49** Nathanela wa mho" pho" we"- Nao wa Mao" So: Yao: Zo: ngad: ra"- Nao wa Israel nho: kho:kham ngad: ra"- ga: tau" ra". **50** Yesu wa yao: re Pho' ham" gae qao: mae nao na: jo; ra" au: mae" nao re ngo myao va" ein: nao re ta" ruyang za: nao lam" i? Cetho' je: qi" ra" mau" re nao the' myao: li" nae"- ga: ta" ra". **51** Amung: Yesu wa yao: bam re nao=nhaung" re ngo dang za: ta" geli"- Mug: gaung wa bung" li" mung:- Mao" So: mug: lagyo: qe wa Byu: Yao: Zo" dao mae do, do, gyo" gyo" kad' na ko" rure nao=nhaung" the' myao: li" genae" ga: ta" ra".

Kana Vogaung: Mae" Lo, xo' Poe

**2:1** Aithao shid' ba kyo thao re Kana vogaung: mae lo, xo' poe dalam: jo, mung:- Yesu yao: myhi" wa ai: poe mae leim: na: ra". **2** Yesu we' yao" mho" zo: qere re: ai: lo, xo' poe khyo khai: ako". **3** Sabyi qang: gan: byaug lao"- Yesu yao: myhi" wa Yao: bam sabyi qang: gan: byaug: avako"- ga: yao: re ta" ra". **4** Yesu wa Ngo pe" kad' ca" rure- nao ta" maqo- Nga" ayo, majoe" shi:- ga: ta" ra". **5** Ailao" Yesu yao: myhi" wa dau dau mo, re yao: nao=nhaung" re nhao: ra" ja: alhab' re kad' ge,- ga: ta" ra". **6** Yuda qe wa yao: bam: caung: pa" thung" we' sin" ra" cid' san: ra" thung" qo" gemung:- ai: qhid' mae" soe: dayo ko ko vao: ra" laug qid yae: khyaug' lam: ai: tau mae zhaung: to" ako". **7** Yesu wa ai: dau dau mo, re ai: yae: jham mae qid byang" sho' khae: zau ge,- ga: ta" ra". Yao: bam wa yae: nhad' joe" sho' khae: zau: ako". **8** Amung: Yesu wa yao: bam re- Ai: yae: mae" qid dajhid' khau" yu mung:- poe eib pho" re lo" byid: ge,- ga: ta" ra". Yao: bam re: lo" byid' ako". **9** Poe

eib pho" wa sabyi boe" lo: ra" qid re shaug' tau" qu" ra". Daui dau mo, wa ai: sabyi qang: khai: mae" qo" rure ba: ako"- Ngadqere: poe eib pho" wa maba ngad: ra". Aimung: yao: wa pho" sag' re khai: yu yang:- **10** Yaug khao: ngo" wa myho' thao" ra" sabyi qang: reshi" sao qhid' lhaung" byid: jhaug' ko" ra"- Shaug' gyi: gethao reza: mataung" myho' ra" sabyi qang: lhaung" byid: jhaug' ako"- Ngadqere: nao wa myho' thao" ra" sabyi qang: re ana" joe" sho' zam" to" ra" ga: ta" ra". **11** Yesu wa Galile mung" Kana vogaung: mae sao qhid' mug'pho: mau" re kad' mung:- yao" phung bao re aimae qhu" byid' ra". Aimung: yao" mho" zo: qe wa yao: re lam" ako". **12** Ai: thao re Yesu wa yao: myhi"- yao: nhaung:- yao" mho" zo: qe we' Kaperna-um vogaung: khyo ye: mung:- aimae dayo, zo: yena: ra".

Yesu Caung: Pa" Yham Khyo Ye" Ra" Khyo

**13** Lai Co' Poe joe" li" na mung:- Yesu wa Yerusalem khyo ye" lo" ra". **14** Yesu wa Caung: Pa" Yham mae nung: jaung- yao- phaung" kyug' aung: mo, we' ngaiu tha" zo: mo, yao: bam: zoboe" mae zaung: jo, ko" rure ye:myao: ra". **15** Ailao" Yesu wa tau" yang vase: dalam: kad' ci mung:- yao we' nung: jaung- gug' nyhug' jham alhab' re caung: pa" Yham mae" khe' thug' pye' ra"- Amung: ngaiu tha" zo: mo; ngaiu thaung jham rere: gaug: sin" pye' byid: yang:- zaboe" gai" jham re tau: phaung' sin" pye' byid' ra". **16** Phaung" kyug' aung: mo, rere: ai jham alhab' re cetau mae" yu: thug' lo" ge,- Nga" Pho" Yham mae gai jao: dakad' ge,- ga: amyin" byid' ra". **17** Ailao" Yao" mho" zo: qe wa Mao" So we"- ni" yham re kao bau nhag' tau" ru wa nga" aung khug mae myi: ru: nga" na: ra"- ga" ra" jham dao: re myid: beim" ako". **18** Yuda kheim: so' qo" ra" mo, wa nao ce: mau" zo" re kad' nae" akho: akhang" qo" yaug ngad: rure ba nhao nae" qhid' mae" ngo=nhaung" re pe" ja" mug' pho: qo" kad' qhu" nae" i? ga: ta" ako". **19** Yesu wa tau: mung:- Ce: caung: pa" Yham re phyo' pye' ge,- sam ba: agyo: mae ngo dam: kad' nae"- ga: ta" ra". **20** Yao: bam wa Yesu re- Ce: caung: pa" Yham wa byid xe: khyaug' zin lam: lam: zhaug' lo: ra" yham ngad: ra". Nao wa sam ba: agyo: maeza: ce: caung: pa" Yham re dam: qo" zhaug' nae" i? ga: myid' ako". **21** Ngadqere: Yesu ta" ra" caung: pa" Yham wa- Yao" gaung re qang yang: ta" ru ngad: ra". **22** Airumung: yao" mho" zo" qe wa Yesu shid: rumae" dam: dau: to" li" ru qhug' thao re yao: ta" to" ra" cedao: re myid: beim: mung:- yao: bam wa jham: mug sug' rere: Yesu ta" ra" dao: rere: lam" ako".

Byu: Khyo Re Yesu Ba: Ra" Khyo

**23** Ai: Lai Co' Poe ba na gyo: Yesu wa Ye=ru=salem mae na: au:- byu myo: sho' mo, wa yao: kad' ra" mug' pho: mau" re the' myao gemung: yao: re lam" ako". **24** Ngadqere: Yesu wa yao: bam alhab' mo; khyo re ba: ruyang yao: bam re malam ngad: ra". **25** Yao: bam: khyo re khag' yang re: yao: re ta" kyo: maqo ngad: ra"- Pe"mung: ga"re yao: bam yao" aung khug nhag' lam: mae pe" bo: rure yao: yao: ba gau ngad: ra".

Yesu we' Nikodi

**3:1** Pharische phung: mae bobo: ra" Nikodi ga: mang: ra" Yuda au: jhaung dayaung na: ra". **2** Dami re yao: wa Yesu jhao" ye: mung:- Rabai we"- Nao wa Mao" So: yang nhao: ke' ra" mho" pho" dayaung ngad: rure ngo=nhaung" ba:- Nao zaiu" qhu" na: ra" mug' pho: ve, lho jham wa Mao" So mabo ngad: re khag' re: maqo" kad' ngad: ra"- ga: ta" ra". **3** Yesu wa nao re ngo dang za: ta" li"- Dam: khau: ra" yaug mangad: re wa khag' re: Mao" So: mung" dan: re maqo" myao genae"- ga: yao: re tau" ra". **4** Nikodi wa Qi: thao re khoru: dam: gai: khau nae" i? ga: myid' ra". Gaigai: yao: yao: wa yao: myhi" aung khyo magari: vao ye" ru we' shid' lhang madam: gai: khau ngad: ra" ga: ta" ra". **5** Ailao" Yesu wa Nao re ngo dang za: ta" li"- Qid we' Byo: yang khau: ke' ra" yaug mangad: re wa Mao" So: mung" dan: khug khyo khag' re: maqo" vao ye: ngad: ra". **6** Gaung sho" yang khau: ke' ru wa gaung sho: ngad mung:- Byo: yang khau: ke' ru wa byo ngad: ra". **7** Ngo=nhaung" alhab' mo, dam: khau ca"- ein: nao re ngo ta" ra" dao: re dagyo" mug'- **8** La wa yao: nug: ra" shad' khyo hug' ra"- La hug' thoe re nao the' gyo: ngadqere: khokhyo" hug' lo: ru we' khokhyo hug' lo" nae" rure nao maba ngad: ra"- Byo: yang khau: ra" mo, yaug khao: ngo" re: ai we' dau: ra"- ga: ta" ra". **9** Ailao" Nikodi wa ceru wa khoru: gai: boe" nae" i? ga: myid' ra". **10** Yesu wa tau: mung:- Nao wa Israel amyuo mho" pho" aqi: dayaung ngad: to: mung:- cekhyo re nao maba i? **11** Nao re ngo dang za: ta" li"- Ngo=nhaung" wa ngo=nhaung" yao: ba: ru ta" mung:- ngo=nhaung" yao: the' myao va" khyo re dam: ta" kyo: byid: ngadqere: ngo=nhaung mung dao: re

nao=nhaung" khag' re: manug: khae: yu ngad: ako". **12** Nao=nhaung" re ce: mug:myid dao: akhyo re ngo ta" kyo" relhao"- ngo ta" rure malam" ko" ngad: re wa mug:gaung dao: akhyo re ngo ta" lao"- nao=nhaung" khoru: lam" ganae" i? **13** Mug:gaung dao mae" gyo" li" ra" Byu: Yao: Zo: mae" je yang: mug:gaung dao khyo khag' re: mado, lo" qu" shingad: ra". **14 -15** Yao: re lam: ra" mo, yang khao: ngo" apyad ato: kao so' qo" yu nae" qhid' mae" Moshe wa din" pyad yo mae gyid: bo" lhao maui lho re zang au: mae to' to" ru we' dakhyo:- Byu: Yao: Zo: re: to' to" ru qhug' nae" ngad: ra". **16** Pe"mung: ga" re Mao" So wa- mug:myid byu qere gyai jhid' de, mung:- yao: zo: re lam" ra" mo, yang khao: ngo" wa mashid lo:- apyad ato: kao so' qo" yu gena" qhid' mae" yao" zote: zo: re byid' pye' ra". **17** Pe"mung: ga" re mug:myid byu qere dao: kho' nae" qhid' mae" Mao: So wa yao: zo: re mug:myid dao khyo nhao: ke' ru mangad:- Mug:myid byu qere khyad' yu nae" qhid' mae" nhao: ke' ru ngad: ra". **18** Mao" So: Yao: Zo: re lam" ra" yang khag' ngadqere: dao: kho' ru maqhug' ngad: ra". Ngad yang: re: malam" ra" yang kam" wa Mao" So: zote: zo: re malam: ruyang dao: kho' ru qhug' avako". **19** Dao: kho' ra" khyo wa ceru: mung: ngad: ra"- Bo" bao wa mug:myid dao khyo joe" li" va" ngadqere:- byu qe wa yao: bam: makhyang" ra" mau" zo" jham: mathao: yang bo" bao re tho' mug:cad' re je: jhid' de; ako". **20** Makhyang" ra" lo, mau" kad' ra" yang khag' ngadqere: bo" bao re nhang" ra". Yao: yao" makhyang" ra" mau" zo" mamyo: thug' li" nhao nug: ruyang yao: wa bo" bao khyo mali" ngad: ra". **21** Ngadqere: dang man" ra" mau" zo" re zau" ra" yang kam" wa yao: zau" ra" mau" zo" wa Mao" So o: ra" khyo ngad: rure bo" bao: yang qhu" byid: shao: ga: yao: wa bo" bao khyo li" ra".

Yesu we' Yohan

**22** Aithao re Yesu wa yao" mho" zo: qe we' daga" Yuda mung" khaung: khyo thug' ye" lo" mung:- ai: khaung: mae mho"zo: qe we' daga" yena yang: Babtizam byid' ra". **23** Yohan re: Salim mae" mataung" va" ra" Enun ga" ra" jo,qo mae qid myo: sho' jo; ruyang Babtizam byid: yang: na: ra". Byu qe wa- yao: jhao" ye: mung:- Yohan wa- yao: bam re Babtizam byid' na: ra". **24** (Ce wa Yohan thaung: malaung" shire boe" ru ngad: ra".) **25** Yohan: mho" zo: qe daqhae: wa caung: pa" thung" we' sin" ra" cid' san: ra" khyo we' sin: mung:- Yuda byu dayaug we' jho" ta" ngag: ako". **26** Aimung: yao: bam wa Yohan jhao" ye: mung:- Mho" pho" we"- Yodan: gyaung: thoete' ba thug' shad' mae nao we' daga" na mung:- nao sagse: kham byid' ra" yang re nao mabeim: i? Yao: wa ana"- Babtizam byid: yang: na: ra"- Yang khao: ngo" yao: jhao" ye" ako"- ga: ta" ako". **27** Yohan wa- Mao" So: yang za: mab=yid: re wa khag' pe" maqo" yu ngad: ra"- ga: ta" ra". **28** Ngo wa Meshia mangad:- Yao" qhid' au: mae nhao: ke' ra" yang angad: ein: ngo ta" va" ru wa nao=nhaung" yao: sagse: qe ngad: avako". **29** Myhi" sag' re sang: ra" yang wa pho" sag' ngad: ra". Pho" sag' nho: ba nam pho" kam" wa- ayae mae ye; jo, yang:- pho" sag' thoe re tae" gyo" ra". Yao: wa pho" sag' thoe re the' gyo: lao"- gyai ngau" bau" ra". Airu: ngau" bau" ru wa ngo mae jab byang" li" va". **30** Yao: wa myo" laug: li" nae"- Ngo kam" wa nang" lo" zai ngad: ga: ta" ra".

Mug:gaung Mae" Joe" Li" Ra" Yang

**31** Mug:gaung khyo" joe" li" ra" yang wa alhab' tho' je: qi" ra" yang ngad: ra". Myidgaung dao mae" ngad: ra" yang wa myidgaung byu ngad yang:- myidgaung dao we' sin" ra" khyo jham reza: ta" ra". Ngadqere: mug:gaung khyo" joe" li" ra" yang wa alhab' tho' mae" yang ngad: ra". **32** Yao: wa yao: the' myao va" ru we' the' gyo: va" ra" khyo re ta" ra"- Ngadqere: yao" mungdao: re khag' re: makhae: yu shiko" ngad: ra". **33** Yao" mung dao: re khae: yu: ra" yang kam" wa airu: khae: yu: ra" khyo" yang Mao" So wa dang man" ra" yang ngad: rure jao dang byid: yang ngad va". **34** Mao" So: yang nhao: ke' ra" yang wa Mao" So: mung dao: re ta" ra"- Pe"mung: ga" re Mao" So wa ai: yang re yao" Byo byang" sho' byid' ra". **35** Yao: Pho" wa yao: zo: re jhid' de, mung:- phung qam: so' alhab' yao" lo, mae byid' to" ra". **36** Mao" So: Yao: Zo: re lam: ra" yang khag' ngadqere: apyad ato: kao so' qo" ra". Mao" So: Yao: Zo" mho dao re maphug' cao" ra" yang khag' ngadqere: kao so' qo" nae" mangad:- Yao: wa Mao" So: qobo dae byid' ra" khug mae na: jo; li" nae"- ga: ta" ra".

Yesu we' Samari Myiqe: Myhi"

**4:1** Yesu wa Yohan tho' mho"zo: je: qo" poe" yu mung:- Babtizam byid' na: ra" ga" rure Pharishe qe the' gyo" ako". **2** Gaigai: yao: Yesu yao: yao: wa dayaug rere: Babtizam mabyid: ngad: ra". Yao" mho"zo: qeza: byid'

ako". **3** Ai: ru Pharische qe the' gyo: vako" ra" ga" rure Yesu yao: dam: the' gyo: lao"- yao: wa Yuda mung" mae" thug' lo" mung:- Galile mung" khyo dam: tug' lo" ra". **4** Yao" gyaung: khyo wa Samari mung" khyo" su" lai: lo" ca" ra". **5** Yesu wa Samari mung" mae" Sukha ga" ra" vogaung: khyo joe" lo: ra". Ai: vogaung: wa ganhae" pyad re Yaku yang yao: zo: Yoseb re byid' to" ra" yo myid nhae mae" Samari vogaung: dalam: ngad: ra". **6** Ai: mae Yaku nho: qid thaung: jo; ra". Yesu wa khyo su" myaung: yang: qid thaung: nhae mae zaung: jo; ra". Amung: ayo, wa na" gaung ba khaung tau yo, ko ngad: ra". **7** Samari myiqe: dayaug wa qid khae nae" ga: joe" li" ra". Ailao" Yesu wa Ngo re qid byid: jhaug' la,- ga: yao: re mho' ra". **8** (Yao" mho" zo: qe wa zo: vae vai nae" qhid' mae" vogaung: khug khyo vao ye" lo" byaug: ako".) **9** Samari myiqe: wa Nao wa Yuda byu ngad mung:- ngo wa Samari byu ngad:- Khorumung: nao ngo re shaug' qid mho' i? ga: ta" ra". (Pe"mung: ga" re Yuda byu qe wa- Samari byu qe ci: ra" keim kang: re malhaung" ci ko" ngad: ra".) **10** Ailao" Yesu wa Mao" So byid' ra" jhaung qhu" we' nao re qid mho' shaug' na: ra" yang khag' ngad: rure nao ba: ngad: re wa- nao wa yao: re mho' mung:- yao: wa nao re dau: ra" kao so' qid byid' li" nae"- ga: yao: re phaung' tau" ra". **11** Ai: myiqe: wa- Nhag' bo we"- Nao wa qid khae nae" qid pung" re: maqo" ngad: ra"- Aimung: qid thaung: re: gyai no; ra"- Ai: kao so' qid nao khai: mae" qo" yu nae" i? **12** Ce: qid thaung: wa ngo=nhaung" phug' pho" Yaku yang ngo=nhaung" re byid: co' ra" qid thaung: ngad: ra". Phug' pho" Yaku yao: yao: re:- yao: zo: qere:- yao" gug' nyhug' jham re: ce: qid thaung: mae" shaug' lai: lo" vako" ra"- Nao wa Yaku tho' je: qi" i? ga: yao: re ta" ra". **13** Yesu wa ce: qid shaug' ra" yang khag' ngadqere: qid dam: shab' shinae"- **14** Ngo byid: nae" ra" qid re shaug' ra" yang kam" wa khonhae" re: qid madam: shab' nae"- Yao: re ngo byid: nae" ra" qid wa yao" khug mae kaoso' qid thug' boe" mung:- ai wa yao: re kaoso' qid we' apyad ato: kaoso' byid' li" nae" ga: tau" ra". **15** Ai: myiqe: wa Nhag' bo we"- Ngo wa qid madam: shab' nae" we'- cekhyo qid mali" khae ca" nae" qhid' mae" ngo re ai: qid byid: la,- ga: ta" ra". **16** Yesu wa yao: re Ni" yham sang pho" re lo" khai: yu yang: dam: li" ri:- ga: ta" ra". **17** Ai: myiqe: wa Ngo yham sang pho" maqo" ga: tau" ra". Yesu wa yao: re- ngo yham sang pho" maqo" ga:- nao ta" ru wa jo: ra". **18** Nao wa yham sang pho" ngo" yang qo" qu" va" ra"- Ana" nao we' daga" na: ra" yang wa ni" yham sang pho" mangad: ngad: ra"- Nao wa ngo re dang: ru ta" ava"- ga: ta" ra". **19** Ai: myiqe: wa Nhag' bo we"- Nao wa lapa ngad: rure ngo ba va"- ga: ta" ra". **20** Nga" phug' pho" qe wa ce: bam dao mae Mao" So re caung: pa" lo: ako". Ngadqere: nao=nhaung" Yuda byu qe wa Yerusalem vogaung: mae caung: pa" ca" ga: ta" ako"- ga: ta" ra". **21** Yesu wa yao: re Myiqe: we"- Nga" dao: re lam" wa,- Ce: bam dao mae re: mangad:- Yerusalem vogaung: mae re: mangad: lo:- Pho" re caung: pa" nae" ayo, joe" lo: li" nae". **22** Nao=nhaung" Samari byu qe wa nao=nhaung" yao: maba: ra" yang re caung: pa" ako"- Ngadqere: ngo=nhaung" Yuda byu qe wa ngo=nhaung" yao: ba: ra" yang re caung: pa" na:- Pe"mung: ga" re khyad' yu: ru wa Yuda byu qema" joe" li" ra". **23** Byu qe wa Mao" So: Byo qam: so' khyo" yang Pho" re dang man" ra" khyo" caung: pa" nae" ra" ayo, joe" lo: na: ra"- Ana" lhao" joe" ava". Mao" So wa airu: caung: pa" mo, re o ngau: ra". **24** Mao" So wa Byo ngad: ra". Amung: yao: re caung: pa" ra" mo, wa Mao" So: Byo qam: so' khyo" yang za: dang man" ra" khyo" yao: re qo" caung: pa" ako" ga: ta" ra". **25** Ai: myiqe: wa Yesu re- Meshia joe" li" nae" rure ngo ba: ra"- Yao: joe" li" lao"- ngo=nhaung" re khyo ja: cao jab li" ta" kyo" li" nae"- ga: tau" ra". **26** Yesu wa Nao we' jhau: na: ra" yang ngo wa yao: ngad va"- ga: yao: re ta" ra". **27** Ai: ayo, mae mho" zo: qe dam: tug' joe" lo: ako". Yao: bam wa Yesu re myiqe: dayaug we' jho" jhau: na: rure lomyao gemung:- gyai mug' hao" byaug: ako". Ngadqere: ai: myiqe: re Nao pe" o: i? ga: re:- Yesu re Nao ai: myiqe: we' pe"mung: dao: jho" jhau ko" i? ga: re:- khag' re: yao: bam mavae" myid: ko" ngad: ra". **28** Ailao" ai: myiqe: wa yao" qid yae: re to: co' mung:- vogaung: khyo dam: tug' lo" yang: vobyu qere- **29** Ngo zau: lai: lo: ra" khyo alhab' re ngo re ta" kyo: yang re li" qu" geri:- Yao: wa Meshia ngad nae" laug? ga: lo" ta" ra". **30** Airumung: vobyu qe wa vogaung: mae" Yesu jhao" thug' ye" lo" ako". **31** Ai: au: re mho" zo: qe wa Asang we"- zo: ve zo: wa,- ga: Yesu re ta" ako". **32** Ngadqere: Yesu wa nao=nhaung" maba: ra" zo: ve ngo qo"- ga: yao: bam re phaung' tau" ra". **33** Airumung: mho" zo: qe wa byu dayaug yang: yang yao: re zo: ve li" byid: vasam" ra" i? ga: yao: bam yao: cao: jho" myid' na: ako". **34** Yesu wa yao: bam re- Nga" zo: ve wa ngo re nhao: ke' ra" yang myid o: ra" khyo re phug' cao" nae" we' yao: zau: nhao: to" ra" mau" zo" re kyab' sho' zau: nae" ru ngad: ra". **35** Nao=nhaung" wa gaug yad yo, joe" nae" lho" byid khye' ca" shi" ga: ta: na: ako" mangad: i?. Ngadqere: ngo nao=nhaung" re ta" geli"- Gaug yo khyo nyang" za: qu" ke' ge,- Gaug wa yad: yu nae" ana" yao: mhang" jo; ava". **36** Yad: ra" yang wa aphug' qo" khae: yu mung:- apyad ato: kao so' ga" ra" gaug zo re qo" jham" yu: ra". Airu: mung: qho: yang we' yad; yu yang wa daga" za: ngau: bau" li" genae". **37** Dayaug wa qho: mung: dayaug wa yad: yu: ra"- ga" ra" dao: khyo: wa dang: ra". **38** Ngo wa nao=nhaung" re- nao=nhaung" yao:

masin: maqho" ra" yo mae" gaug zo re yad: yu nae" qhid' mae" nhao: ke' va". Gatau damyo" wa ai: yo mae qho: mung:- Yao: bam: lo, mau" akyu" mae" nao=nhaung" qo" kham: yu: ako"- ga: ta" ra". **39** Pe"mung:ga" re yao: wa Ngo kad' lo: ra" khyo alhab' re ngo re ta" kyo: yang ngad: ra"- ga: ai: myiqe: myhi" yang ta" ruyang ngad: ra". Ai: vogaung: mae" Samari byu qe myo: sho' mo, Yesu re lam" ako". **40** Airumung: Samari byu qe Yesu jhao" joe" li" gelao"- yao: bam wa Yesu re yao: bam we' daga" thang: na nae" qhid' mae" mho' ako". Aimung: Yesu wa ai: vogaung: mae shid' ba thang: na: ra". **41** Yesu mung dao" yang yao: re lam" ra" mo, je: myo" lo: ako". **42** Aimung: yao: bam wa ai: myiqe: re Ana"- ngo=nhaung" lam" va"- Aiwa nao ta" yang: mangad:- Yao" mung dao: re ngo=nhaung" yao: the' gyo" yu va" rumung: lam" ru angad:- Yao: wa gai gai: yao: mug:myid dao: mae" khyad' yu: Asang ngad: rure ngo=nhaung" ba va" ga: ta" ako".

Aya: Qo" Ra" Byu Dayaug: Yao: Zo: Re Yesu Gai Byid' Ru

**43** Ai: vogaung: mae shid' ba bin: na co' thao- Yesu wa ai: vogaung: mae" Galile mung" khyo ye" lo" ra". **44** Pe"mung:ga" re lapa wa yao: yao" mug; mae nga: maye, ngad: ra"- ga: Yesu yao: yao: ta" to" ra". **45** Galile mug: khyo Yesu joe" ye: lao"- Galile mang: byu qe wa yao: re lham: tug: yu: ako". Pe"mung:ga" re yao: bam wa Yerusalem mae kad' ra" Lai Co'Poe mae yelem mung:- ai: poe ba na gyo: mae Yesu kad' ra" mau" ja: khao: ngo" re yao: bam the' myao: ako". **46** Aithao Yesu wa qid re sabyi qang: boe" nhao: ra" Galile mung" mae" Kana vogaung: khyo dam: ye" ra". Ai: vogaung: mae" Asuya mang: zug: dayaug: yauggai zo: wa Kaperna-um vogaung: mae no: na: ra". **47** Yesu wa Yuda mung" mae" Galile mung" khyo joe" lo: ra"- ga" rure ai: zug: pho" the' gyo: lao"- yao: wa Yesu jhao" ye: mung:- Kaperna-um vogaung: mae no yang: shid: lo" na: ra" yao" yauggai zo: re yegai byid: nae" qhid' mae" Yesu re mho' ra". **48** Yesu wa yao: re- Nao=nhaung" wa ve, lho we' mug'pho: za: mamyo gere wa khag' re: lam" genae" mangad:- ga: ta" ra". **49** Ai: zug: pho" wa Nhag' bo we"- Nga" zo: mashid shire li" wa,- ga: phaug' tau" ra". **50** Yesu wa yao: re- Lo" wa,- Ni" yang gai zo: wa dau nae"- ga: ta" ra". Ailao" yao: wa Yesu dao: re lam" yang: dam: lo" ra". **51** Yao: phao: lo" na: au:- yao" dau dau mo, joe" li" mung:- Ni" zo: dau: na: ra" ga: li" ta" kyo" ako". **52** Amung: yao: wa yao: bam re- yao" yang gai zo: khoyo, mae" gai: li" rure myid' ra". Dau dau mo, wa Ayenhe' myi" thao dayo, qug ko re yao: wa no gai: lo" byaug: ra"- ga: tau" ako". **53** Ailao" yao: pho" wa ai: ayo, wa- Ni" yang gai zo: wa dau nae"- ga: yao: re Yesu ta" ra" ayo, yao: ngad: rure myid: beim" ra". Airumung: yao: we' yao" yham byu qe alhab' Yesu re lam" ako". **54** Ceru wa Yuda mung" mae" Galile mug: khyo joe" lo thao re shid' lhang ein: lhang Yesu zai" ra" ve, lho ngad: ra".

Qid Kyaung" Nhae Mae Yesu No Gai Byid' Ra" Khyo

**5:1** Aithao Yesu wa Yuda byumyu" qe: caung: pa" thung" dalam: jo, yang:- Ye=ru=sa=lem vogaung: khyo ye" lo" ra". **2** Ye=ru=sa=lem vogaung: mae" Yao Kham: Dung: nhae mae Hebre myan" khyo" Bedzatha ga: mhang" ra" qid kyaung" dalam: jo; ra". Ai: qid kyaung" lhang" yang: zaung ngo" lam: kad' to" ako". **3** Ai: zaung jham: akhug mae myo, jid khyid qeim mo,- gaung jam: shid: mo, nophyo: qhug' ra" mo, myo: sho' lang" jo; bam: ako". **4-5** Ai: mae sam xe: she' zin lam: lam: no: ra" byu dayaug na: ra". **6** Yao: airu: lang" jo; rure Yesu myao mung:- Yao: no: na: ru gyai myao" va" rure Yesu ba: ra". Aimung: Yesu wa ai: no yang re- Nao no gai: lo" nug: i? ga: myid' ra". **7** Ai: no yang wa Nhag' bo we"- Qid lab: li" ra" au:- qid kyaung" khyo ngo re jhui" vao ye: nae" byu cema ngo maqo"- Ngo vao ye: nae" seim" na: au:- nga" qhid' re su gaje dayaug yang shi" vao ye" lo" byaug byaug mung: ra"- ga: Yesu re ta" ra". **8** Yesu wa yao: re To" wa,- Ni" yab qo re gaug: vo, yang:- su" lo" wa,- ga: ta" ra". **9** Ailao"- ai: yang wa gai: lo" mung: yao" yab qo re gaug; vo, yang: su" lo" ra". Ai: ba wa Dug No: Ba ngad: ra". **10** Aimung: kheim: so' qo" ra" Yuda qe wa ai: no gai: lo" yang re- Ana: ba wa Dug No: Ba ngad: ra"- Ni" yab qo vo; ru wa ngo=nhaung" Tarha" re lhoe" ru ngad: ra"- ga: ta" ako". **11** Ailao"- yao: wa Ngo re no gai byid' ra" yang wa ni" yab qo gaug: vo, yang: su" lo" wa,-ga: ngo re ta" ra"- ga: phaug' tau" ra". **12** Yao: bam wa yao: re- Nao re ceru: kad' nae" ta" yang wa khag' ngad: i? ga: myid' ako". **13** Ngadqere: ai: no gai: lo" ra" yang wa Yesu khag' ngad: rure yao: maba ngad: ra". Pe"mung:ga" re ai: jo,qo mae mo, byu qe ham: na ko" ru we' Yesu wa sae za: khug' phao: thug' lo" byaug yang: ngad: ra". **14** Aithao Yesu wa ai: yang re caung: pa" Yham mae the' myao mung: yao: re- Tae" gyo: wa,- Nao wa ana" no gai: ava"- Qobo dakad' lo: wa,- Airu: mangad: re nao wa cetho' xo: ru qhug' li" nae"- ga: ta" ra". **15** Ailao"- ai: yang wa thug' lo" mung:- yao: re no gai byid: yang wa Yesu ngad: rure kheim: so' qo" ra" Yuda qere lo" ta" kyo" ra".

**16** Airumung: yao: bam wa Dug No: Ba mae Yesu no gai byid' ruyang yao: re yhin" qhid: li" ako". **17** Yesu wa yao: bam re- Nga" Pho" wa khonhae" re: mau" zaii" na:- Amung: ngo re: mau" zaii: ca"- ga: ta" ra". **18** Ce: dao: thoe: yang kheim: so' qo" ra" Yuda qe wa yao: re se' nae" je yang: myid: phyid' ako". Pe"mung:ga"re yao: wa Dug No: Ba: tarha" re lhoe" ruyang za: re: mangad:- Mao"So re yao: Pho" ga: ta" mung:- Yao: yao" gaung re Mao"So we' daqi" ngad: ra" khyo" kad' ruyang ngad: ra".

Yao: Zo" Nho: Kheim:so'

**19** Airumung: Yesu wa yao: bam re Nao=nhaung" re ngo dang za: ta" geli"- Yao:Zo: wa yao: yao" myid khyo" pe" re: maqo" kad' ngad: ra". Yao:Pho" kad' na: rure yao: myao: ra" gu: reza: yao: kad' ra"- Yao:Pho" kad' rure Yao:Zo: re: kad' ra". **20** Pe"mung:ga" re Yao:Pho" wa Yao:Zo: re jhid' de, mung: yao: yao: kad' na: ra" mau" zo" alhab' Yao:Zo: re qhu" byid' ra". Cetho' je: qi" ra" mau" re zaii: nae" lhao" re:- Yao:Zo: re qhu" byid' li" nae". Amung: nao=nhaung" wa mug' hao" byaug: li" genae". **21** Yao:Pho" wa shid: ra" mo, re tau: to' yu mung:- yao: bam re kao so' byid' ru we' dakhyo:- Yao:Zo: re: yao: o ngai: ra" mo, re kao so' byid' ra". **22** Yao:Pho" yao: yao: wa khag' rere: dao: makho' ngad: ra". **23** Byu alhab' wa Yao:Pho" re phug' te' byid' ru we' dakhyo:- Yao:Zo: rere: phug' te' byid: genae" qhid' mae" yao: Pho" wa dao: kho' nae: akho: akhang" alhab' Yao:Zo: re byid' to" ra". Yao: Zo: re nga: mayhe' byid: yang khag' ngadqere: yao: Pho" re nga: mayhe' byid: ngad: ra". **24** Nao=nhaung" re ngo dang za: ta" geli"- Nga" dao: thoe re gyo" yu mung:- Ngo re nhao: ke' ra" yang re lam" ra" yang wa apyad ato: kaoso' qo" yu: ra"- Shid: rumae" kaoso' dau: ru khyo lai: lo va" yang ngad mung: yao: wa dao: kho' ru maqhu' nae". **25** Nao=nhaung" re ngo dang za: ta" geli"- Shid: jo; ra" mo, wa Mao"So: Yao: Zo" thoe re the' gyo: nae" ayo, joe" lo: li" nae"- Ai: ayo, wa ana" lhao" joe" ava". Aimung: ai: thoe re the' gyo" ra" mo, wa kaoso' qo" dau: li" genae". **26** Yao: Pho" wa yao: yao: kao so' ajhaung ngad: ru we' dakhyo:- Yao:Zo: rere: kao so' ajhaung boe" nhao: to" ra. **27** Yao: wa Byu:Yao:Zo: ngad: ruyang dao: kho' nae" akho: akhang" yao: re ab byid' to" ra". **28** Ceru re damug' ge,- Shid: jo; ra" mo, alhab' wa yao" thoe re the' gyo: mung:- Yao: bam: lab mae" thug' li" genae" ra" yo, khyin joe" lo: li" nae". **29** Gai: ra" mau" zo" kad' ra" mo, wa kao so' dau: ra" khyo- magari: ra" mau" kad' ra" mo, wa dao: phyid' qhug' nae" ra" khyo- dau: to" li" genae".

Yesu Nho: Sags: Qe

**30** Ngo wa ngoyao" kheim: so' khyo" pe" re: maqo" kad'- Mao"So ngo re ta" ru we' dakhyo: za: ngo wa dao: kho' ra". Amung: nga" dao: kho' ru wa din: vang" ra"- Pe"mung:ga"re ngo wa ngoyao: myid: o: ra" khyo" kad' ru mangad:- Ngo re nhao: ke' ra" yang myid o: rure za: kad' ra". **31** Ngo wa ngoyao" gaung re sags: kham: yu: ngad: re wa nga" sag se: kham: ra" dao: wa tarha" mavao ngad: ra". **32** Ngadqere: nga" khyo re sags: kham byid: yang gatau dayaug na: ra"- Yao: kham: ra" sags: dao: wa dang: rure ngo ba:. **33** Nao=nhaung" wa Yohan jhao" nao=nhaung" lagyo: nhao: ke' mung:- Yao: wa dang man" rure sags: kham byid' ra". **34** Ai wa nga" qhid' mae" byu dayaug yang: yang sags: kham byid: qo mung: mangad:- Ngo ce: dao: re ta" ru wa nao=nhaung" khyad' yu: ru qhug' genae" qhid' mae" ngad: ra". **35** Yohan wa myishae de, mung: bao: jo; ra" myibaung: ngad: ra". Nao=nhaung" wa yao" bo" bao khug mae dazab za: pyo" na nug: ako". **36** Ngadqere: Yohan kham byid' ra" sag se: tho' je: qi" ra" sags: ngo qo" ra". Ngo kad' ra" mau" wa Nga" Pho" yang ngo re nhao: ra" mau" ngad mung:- ai jham wa ngo re Nga"Pho" yang nhao: ke' ru ngad: rure sags: qhu" byid' ra". **37** Ngo re nhao: ke' ra" Nga"Pho" yao: re:- Nga" khyo re sag se: kham byid' ra". Nao=nhaung" wa yao" thoe re khonhae" re: magyo" qu" ru we' yao" myo,khung: re mamyo: qu" ko" ngad: ra". **38** Yao" mung dao: re: nao=nhaung" nhag' lam: khug mae make' to: ngad: ako". Pe"mung:ga"re nao=nhaung" wa yao" yang nhao: ke' ra" yang re malam" ko" ngad: ra". **39** Nao=nhaung" wa jham: mugsug' mae apyad ato: kaoso' the' myao: li" nae"- ga: myid: jho geyang: jham: mug sug' jham re nghe' xeim: ako". **40** Ai: jham: mugsug' jham yao: re:- Nga" khyo re sags: kham byid' ako". Ngadqere: nao=nhaung" wa kaoso' qo" yu nae" qhid' mae" ngo jhao" manug: li" ko" ngad: ra". **41** Ngo wa byu: yang caung: khin" nae" khyo re maqho- **42** Ngadqere: nao=nhaung" pe" ru" ra" byu qe ngad ko" rure ngo ba: ra". Nao=nhaung" aung khug mae Mao"So re jhid' de; ra" myid mabo ko" rure ngo ba:. **43** Ngo wa Nga"Pho" kheim: so' we' joe" li" yang ngad:- Ngadqere: nao=nhaung" ngo re malham: khae: yu ko" ngad: ra". Dayaug yang yao: yao" kheim: so' we' joe" li" re wa yao: re nao=nhaung" lham: khae: yu genae" ngad: ako". **44** Nao=nhaung" wa yao: cao: yao" yang caung: khin" rure kham: yu nae"

o mo, ngad: ako". Ngadqere: date: za: ngad: ra" Mao" So: yang caung: khin" rure qo" kham: yu nae" wa nao=nhaung" qam: make' ko" ngad: ra". Airu: angad: re wa nao=nhaung: ngo re khoru: qo" lam" genae" i? **45** Ngadqere: ngo wa nao=nhaung" re Nga" Pho" qhid' kheim: mae qobo zhaug' nae" yaug ngad: ein: dajho ge,- Nao=nhaung" re qobo zhaug' nae" yaug wa nao=nhaung: yao: myid: lao" na ko" ra" Moshe yaug angad: li" nae". **46** Nao=nhaung" Moshe re gai gai: yao: lam" vako" ngad: re wa ngo rere: lam" genae" ngad: ra"- Pe" mung: ga" re Moshe wa nga" khyo re tung" to" ra". **47** Moshe tung" to" rure nao=nhaung" malam" gere wa nao=nhaung" nga" dao: re khoru: qo" lam" genae" i? ga: ta" ra".

### Yesu Byu Ngo" Taung Re Da" Zho" Ru

**6:1** Aithao re Yesu wa Galile tham: (Tiberi tham: ga: re: mhang" ako") thoete' khyo gau" ye" lo" ra". **2** No phyo: qhug' ra" mo, re gai byid' ra" mug' pho: ve, lho jham re mo, byu qe the' myao gemung:- byu phung: mo" zang Yesu thao cao" ako". **3** Yesu wa bug gaung dalam: khyo Do, ye: mung:- yao" mho"zo: qe we' daga" yezaung: jo; ra". **4** Lai Co' Poe kad' nae" ba na jhao" li" na: ava". **5** Yesu qu" ke' re mo, byu qe ajham ataung- yao: jhao" li" na ko" rure myao mung:- Philib re ai: mo, byu qere laug: zho: nae" zo: ve ngo=nhaung" khai: mae yevai zai laug i? ga: myid' ra". **6** (Yesu airu: myid' ru wa Philib re jham" qu" ru ngad: ra". Yao: wa khoru: kad' nae" rure ba: to: gau ngad: ra".) **7** Ailao" Philib wa yaug khao: ngo" re dajhid' jhid' za: byid: zho: nae" lhao" re:- ngau shid' yo: yang vai: re lhao" re: malaug zai ngad: ra"- ga: phaug' tau" ra". **8** Yesu mho"zo: qemae" Simun Petru; yao: nhaung: Andre wa **9** Ba:li: mug ngo" khai" we' ngo: shid' dau: vin: ra" yauggai nau" dayaug cetau mae na: ra"- Ngadqere: aigu" yang za: wa mo, byu qe alhab' qhid' mae" laug nae" mangad:- ga: ta" ra". **10** Yesu wa Mo, byu qere zaung nhao ge,- ga: yao: bam re ta" ra". (Aimae vahau: gyai yaug: ra") Aimung: mo, byu qe alhab' zaung: jo; ako"- Yauggai qe ngo" taung ko ngad: ako". **11** Yesu wa ai: mug re yu: yu mung: Mao" So re je" ju" bin: caung: byid: lao"- aimae zaung: jo, ko" ra" mo, byu qere gae byid' ra". Ngo: rere: ai we' dakhyo: kad' ra"- Mo, byu qe wa yao: bam o: nho" zo" ako". **12** Yao: bam alhab' mo, zo" gyi: vagelao"- Yesu wa Amyid avho: maboe" vashao:- zo" tang" ra" aje, aman" jham re gaug: zhang: yu ge,- ga: yao" mho"zo: qere ta" ra". **13** Aimung: yao: bam wa alhab' re gaug: zhang: yu ko" re- Ba:Li: mug ngo" khai" mae" mo, byu qe zo" tang" ko" ra" aje, aman" jham daxe: shid' gyan byang" sho' qo" gaug: zhang: yu: ako". **14** Yesu kad' ra" ce: mug' pho: ve, lho re the' myao ko" ra" mo, byu qe wa Ceyaug wa dang za: mug: myid dao khyo joe" li" nae" ga: ta" to" ra" lapa yao: ngad nhaung? ga: ta" ako". **15** Yesu wa yao: bam li" yang: taung" yu yang:- maqad maqui" kho: kham kad' nhao: li" genae" rure ba mung:- buggaung khyo yao: za: dam: do, ye" lo" ra".

### Yesu Qid Dao Mae Su" Ru

**16** Myi" thao joe" lao"- Yesu mho"zo: qe wa Galile tham: khyo gyo" ye" lo" mung:- **17** lha dakhye' dao yedo; zaung yang:- tham: thoete' mae" Kaperna-um khyo dam: tug' gau" phao: lo" ako". Mug: cad' lo ngadqere: Yesu wa yao: bam jhao" majoe" lo shingad: ra". **18** Ai: au: re la qam" hug' lo mung:- tham: mae bang: lhung" to" li" ra". **19** Mho"zo: qe wa khyo sam byid man: vha" ko bin: gau" lo" gethao re- Yesu wa qid dao mae khyo su" lo: na mung:- lha khyo te' lo: na: rure yao: bam myao gelao"- yao: bam wa gyaug: din: pye' ako". **20** Yesu wa dagaug ge,- Ngo angad: ga: yao: bam re ta" ra". **21** Ailao"- yao: bam wa Yesu re ngau bau: za: lha dao khyo lham: to' yu: ako". Ailao" jao"- lha wa yao: bam thang nug: ra" jo, qo khyo joe" lo: ra".

### Mo, byu Qe Yesu Re Qho Ko" Ra" Khyo

**22** Thao: ba re- tham: thoete' mae thang: na geco' ra" mo, byu qe wa ai: tau mae lha dakhye' za: jo; rure myid: beim" li" ako". Amung: ai: lha dao mae Yesu maye: bozaung lo:- yao" mho"zo: qeza: gau" lo" ko" rure yao: bam ba: ako". **23** Ngadqere: Tiberi te' mae" lha jham wa Yesu je" ju" bin: caung: byid: thao re mo, byu qe mug zo" gyi: ko" ra" jo, qo nhae khyo joe" lo: ako". **24** Mo, byu qe wa- ai: tau mae- Yesu re:- Yao" mho"zo: qere: mana loko" ga" rure ba gelao"- yao: bam wa ai: lha jham: dao mae yedo; zaung mung:- Yesu re qho nae" qhid' mae" Kaperna-um khyo gau" de; ye" ako".

### Yesu Wa Kaoso' Zo:ve



**25** Mo,byu qe wa tham: thoete' mae Yesu re yemyao gelao"- yao: bam wa Mho" pho" we"- Nao cekhyo khonhae" joe" lo: i? ga: yao: re myid' ako". **26** Yesu wa Nao=nhaung" re ngo dang za: ta" geli"- Nao=nhaung" ngo re qho ko" ru wa ngo kad' qhu" ra" mug' pho: ve, lho jham: lajheim: re ba: gyo: geyang: mangad: ko" ngad: ra". Nao=nhaung" o: ra" nho" mug qo" zo" gyi: geyang: angad ko" ra". **27** Bab: qeim: lo" ba: ra" zo: ve qhid' mae" qam: dake' ge,- Mabab maqeim: lo" ra" apyad ato: kao so' zo: ve qhid' mae" qam: ke' ge,- Byu:Yao:Zo: wa ce: zo: ve nao=nhaung" re byid' li" nae". Pe" mung: ga" re Pho" Mao" So wa yao: myid vang" ra" aso: dazid re yao" dao mae thaung" te' to" ra". **28** Airumung: yao: bam wa Mao" So o: ra" mau" re qo" zai: nae" qhid' mae" ngo=nhaung" khoru: kad' nae" i? ga: Yesu re myid' ako". **29** Yesu wa Nao=nhaung" re zai: nhao: ra" Mao" So o: ra" mau" wa yao" yang nhao: ke' ra" yang re lam" nae" qhid' mae" ngad: ra" ga: tau" ra". **30** Yao: bam wa Ngo=nhaung" nao re lam" nae" qhid' mae" nao ngo=nhaung" re pe" ve, lho kad' qhu" nae" i? Nao pe" mau" kad' nae" i? ga: phaug' tau" ako". **31** Jham: mug sug' mae Mao" So wa yao: bam re mug: gaung mae" mug byid: zho" ra"- ga: ta" to" ru we' dakhyo:- ngo=nhaung" phug' phyd' qe wa din" pyad' yo mae Mana mug zo: vako" ra" ga: phaug' tau" ako". **32** Yesu wa Ngo nao=nhaung" re dang za: ta" geli"- Moshe nao=nhaung" re byid' ru wa mug:gaung mae" mug mangad:- Ngadqere: nga" Pho" wa nao=nhaung" re mug:gaung mae" mug agyang" byid: yang ngad: ra". **33** Pe"mung:ga"re Mao" So byid' ra" ai: zo:ve agyang" wa mug:gaung mae" gyo" li" mung:- Myid gaung byu qere kao so' byid' ra" yang ngad: ra"- ga: ta" ra". **34** Yao: bam wa Nhap' bo we"- Ngo=nhaung" re ce: mug khonhae" re: byid' na la,- ga: mho' ako". **35** Yesu wa yao: bam re Ngo wa kao so' zo:ve ngad:- Ngo jhao" li" ra" yang wa khonhae" re: vae: mamoe; nae"- Ngo re lam" ra" yang wa khonhae" re: qid mashab' nae"- **36** Ngadqere: nao=nhaung" wa ngo re myao gengadqere: malam" genae"- ein: ngo nao=nhaung" re ta" va". **37** Nga" Pho" yang ngo re byid' to" ra" mo, yang khao: ngo" ngo jhao" li" li" genae". Ngo jhao" li" ra" yang khag' rere: ngo khonhae" re: manhao: tug' ke' nae". **38** Pe"mung: ga"re ngo wa ngoyao: myid o: ra" khyo" kad' nae" qhid' mae" mug: gaung khyo" gyo" li" ru mangad:- Ngo re nhao: ke' ra" yang: myid o: ra" khyo" kad' nae" qhid' mae" gyo" li" ru angad:- **39** Ngo re nhao: ke' ra" yang myid o: ru wa yao" yang ngo re byid' to" ra" mo, alhab' mae" dayaug rere: majeim: nhao lo:- lo" thao" ra" ba na mae shid: rumae" dam: dau: to" li" nhao nae" qhid' mae" ngad: ra". **40** Pe"mung: ga"re nga" Pho" myid o: ru wa Yao:Zo: re myao: ra" mo, alhab' wa lam" mung: apyad ato: kao so' qo" yu genae" qhid' mae" ngad: ra". Amung: ngo wa lo" thao" ra" ba na mae shid: rumae" kaos'o' dau: to" li" nhao nae"- ga: ta" ra". **41** Ailao" Yesu wa ngo wa mug:gaung mae" gyo" li" ra" mug ngad:- ga: ta" ra" dao" yang mo,byu qe wa nyhung: li" ako". **42** Aimung: yao: bam wa ce: yang wa Yoseb: yao: zo: Yesu mangad: i? Yao: pho" yao: myhi" tao rere: ngo=nhaung" ba: mangad: i? Aire khorumung: ngo wa mug:gaung mae" gyo" li" yang ngad: ga: yao: ta" i? ga: ta" ako". **43** Yesu wa nao=nhaung" yao: cao: nyhung: na: ru thang: pye' ge,. **44** Ngo re nhao: ke' ra" Pho" yang ngo jhao" malao" te' byid: re khag' re: ngo jhao" maqo" te' li" ngad: ra". Ngo wa ngo jhao" li" ra" yang re lo" thao" ra" ba na mae shid: rumae" dau: to" li" nhao nae"- **45** Byu yang khao: ngo" wa Mao" So: yang mho" byid' ru qhug' li" genae"- ga: lapa qe tung" to" ako". Nga" Pho" ta" ra" dao: re the' gyo: mung:- zhao: yu: ra" yang wa ngo jhao" li" ra". **46** Ceru: ta" ru wa Mao" So re myao: qu" byu dayaug yang na: ein: khyo" ngo ta" nug: ru mangad:- Mao" So mae" joe" li" ra" yang za: Pho" re myao: qu" ra". **47** Nao=nhaung" re ngo dang za: ta" geli"- Lam" ra" yang wa apyad ato kao so' qo" ra". **48** Ngo wa kaos'o' mug ngad:- **49** Nao=nhaung" phug' phyd' qe wa din" pyad' yo mae Mana mug re zo: gengad yang: re:- yao: bam shid: lo" byaug: ako". **50** Ngadqere: mug:gaung mae" gyo" li" ra" ce: mug re zo" ra" yang wa mashid nae". **51** Ngo wa mug: gaung mae" gyo" li" ra" kaos'o' mug ngad:- Ce: mug re zo" ra" yang wa apyad ato kaos'o' dau: na: li" nae"- Ngo byid: nae" ra" mug wa myid gaung byu qe dau: na nae" qhid' mae" nga" gaung sho: ngad: ra" ga: ta" ra". **52** Ailao" yao: bam wa- Ngo=nhaung" re yao" gaung sho: khoru: qo" byid: zho: nae" ga" laug i? ga: ta" mung: yao: bam yao: cao: ayo: athaung" jho" ta" ngag: qhid: li" ako". **53** Yesu wa yao: bam re- Nao=nhaung" re ngo dang za: ta" geli"- Nao=nhaung" wa Byu:Yao:Zo" nho: gaung sho: re mazo:- yao" sa: re mashaug' ko" re wa nao=nhaung" yao" khug mae kao so' mabo genae"- **54** Nga" gaung sho: re zo: mung:- nga" sa: re shaug' ra" yang khag' ngadqere: apyad ato: kao so' qo" ra"- Aimung: lo" thao" ra" ba na mae ngo wa yao: re shid: rumae" dau: li" nhao nae". **55** Pe" mung: ga" re nga" gaung sho: wa zo:ve agyang" ngad:- Nga" sa: re shaug' ja: agyang" ngad:- **56** Nga" gaung sho: re zo: mung:- nga" sa: re shaug' ra" yang khag' ngadqere: yao: wa nga" khug mae kaos'o' dau: mung:- ngo re: yao: mae kaos'o' dau: na: ra". **57** Dau: na: ra" nga" Pho" wa ngo re nhao: ke' mung: yao" mathao: yang ngo wa kaos'o' dau: na: ru we' dakhyo:- nga" gaung sho: re zo" ra" yang khag' ngadqere: nga" mathao: yang kaos'o' dau: na: li" nae". **58** Ce: mug wa mug:gaung mae" gyo" li" ra" zo: vae

ngad: ra"- Nao=nhaung" phug' phyid' qe zo: mung:- thao re shid: lo" ba: ra" ai: mug ru" ru mangad:- Ce: mug re zo" ra" yang wa apyad ato kaoso' dau: na: li" nae" ga: ta" ra". **59** Ceru wa Kaperna-um vogaung: mae" Tarha" Jung Yham mae mho" shid' na: ra" au:- Yesu ta" ra" dao: ngad: ra".

Apyad Ato: Kaoso' Mungdao: Jham

**60** Yao" thao cao" ra" mo, myo: sho' wa cedao: re the' gyo: gelao"- Ce: mho" shid' khyo wa saung" qug' ra"- Khag' qo" kham: yu nae" i? ga: ta" ako". **61** Yao: bam airu: nyhung: na ko" rure Yesu ba mung: yao: bam re- Ce: dao" yang nao=nhaung" qam: shan vako" i? **62** Byu:Yao:Zo: wa azhao yao: na: ra" jo, qo khyo dam: do, lo" rure nao=nhaung" myao gelao"- khoru: ein genae" i? **63** Kaoso' dau nhao: ru wa Mao" So: Byo ngad: ra"- Byu: qam: so' yang pe" maqo" kad' ngad: ra". Nao=nhaung" re ngo ta" kyo" ra" mung dao: jham wa kaoso' dau nhao: ra" Mao" So: Byo re qo" nhao: ra". **64** Ngadqere: nao=nhaung" mae" damyo" wa malam" ko" ngad: ra"- (Malam" ra" mo, khobam ngad ko" ru we' yao: re ab byid' pye' nae" yang khag' ngad: rure re:- Yesu yao: sao qhid' mae" ba: to: va" ra".) **65** Byu dayaug re Pho" yang ngo jhao" li" nae" khyo" makad' byid: ngad: re wa khag' re: ngo jhao" qo" li" genae" mangad:- ein: nao=nhaung" re ngo ta" ru wa cemung: yang: ta" ru ngad: ra"- ga: Yesu xo' ta" ra". **66** Ce: dao: thoe: yang Yesu nho: thao cao" mo, myo: sho' wa dam: phaug' phao: lo" gemung:- yao" thao macao" lo: gengad: ra". **67** Aimung: Yesu wa mho"zo: daxe: shid' yang re- Nao=nhaung" re: phao: lo" nug ko" i? ga: myid' ra". **68** Simun Petru wa Asang we"- Ngo=nhaung" khag' jhao" ba: lo" nae" i?- Nao wa apyad ato kaoso' dau nhao: ra" mung dao: qo" yang ngad: ra". **69** Nao wa Mao" So mae" joe" li" ra" Gyang" Lho" ra" yang ngad: rure ana" ngo=nhaung" lam" mung: ba: bam va"- ga: ta" ra". **70** Yesu wa Nao=nhaung" daxe: shid' yang re ngo khyin: yu: mangad: i? Ngadqere: nao=nhaung" mae" dayaug wa Min: Yui ngad: ra"-ga: phaug' tau" ra". **71** Yesu wa- Simun Iskarut yao: zo: Yuda; khyo re ta" na: ru ngad: ra". Pe" mung: ga" re Yuda wa mho"zo: daxe: shid' yang mae" dayaug ngad sho' ngadqere:- yao: re ab byid: nae" yang ngad: ra".

Yesu We' Yao: Nhaung: Qe

**7:1** Aithao Yesu wa- Galile mung" khaung: mae su" gam" qin" ra". Pe" mung: ga" re kheim: so' qo" ra" Yuda qe wa- Yesu re se' pye' nae" qhid' mae" seim" na geyang:- yao: wa Yuda mung" khaung: mae manug: su" qin" ru ngad: ra". **2** Yuda qe: Zaung Khyae: Poe kad' nae" ba na jhao" li" na: ra"- Aimung: Yesu yao: nhaung: bam wa- **3** Nao kad' ra" mau" zo" jham re ni" mho"zo: qe the' myao: lo" genae" qhid' mae" cemung" mae" thug' mung:- Yuda mung" khyo ye" lo" wa, **4** Mang qi: nug: ra" yang khag' ngadqere: yao: kad' ra" mau" re anyham: avho' mae pe" re: malhaung" kad' gengad: ra"- Nao wa ai: mau" jham re kad' na: ruyang ni" khyo re mug: myid byu qe alhab' mo,- ba sho' kad' wa, ga: ta" ako". **5** (Yesu yao: nhaung: bam lhao" re:- yao: re malam" ko" ngad: ra".) **6** Yesu wa yao: bam re- Nga" ayo, majoe" shi:- Nao=nhaung" ayo, kam" wa khonhae" re: ngad: ako". **7** Mug: myid byu qe wa nao=nhaung" re magari: nghan: ngad: ra". Ngo re kam" wa nghan" ako"- Pe"mung:ga"re ngo wa yao: bam: lo, mau" magari: rure ta" na: ruyang ngad: ra". **8** Ai: poe khyo nao=nhaung" ye: ge,- Nga" ayo, majoe" shimung:- ngo wa poe khyo maye: nae"- ga: ta" ra". **9** Yesu wa airu: ta" mung:- Galile mung" mae thang: na: jo; ra".

Yesu Zaung Khyae: Poe Yeleim: Ru

**10** Ai: poe khyo yao: nhaung: bam ye" lo" gethao re Yesu re: ai: poe khyo anyham: avho' kad' mung: sae za: ye" lo" ra". **11** Kheim: so' qo" ra" Yuda qe wa- poe mae Yesu re qho mung:- yao: khai: mae ngad: ra" i? ga: myid' ako". **12** Mo,byu qe: phaung mae Yesu khyo re sae sae za: gyai jho" ta" na: ako". Mo,byu qe daqhae: wa Yao: wa byugai ngad: ra"- ga: ta" ako". Ngadqere: gatau daqhae: wa Byugai mangad:- Yao: wa mo, byu qere khyonghung: jhui" nghan" na yang ngad: ra"- ga: ta" ako". **13** Ngadqere: yao: bam wa- kheim: so' qo" ra" Yuda qere gyaug geyang:- Yesu khyo re de: de: za: mata" ko" ngad: ra". **14** Poe ba na agaung: ba lai lao"- Yesu wa Caung: Pa" Yham khyo ye: mung:- mho" shid' qhid: na: ra". **15** Yuda kheim: so' qo" ra" mo, wa qi: sho' mug' hao" byaug ko" ru we' Ceyaug wa dalhang re: mamho" zhao: yu: qu" ru khoru: mung: ceqhi" sho' ba: ra" i? ga: ta" ako". **16** Yesu wa Ngo mho" shid' ra" khyo wa ngoyao" nho: mho" shid' khyo mangad:- Ai wa ngo re nhao: ke' ra" Mao" So mae" li" ra" mho" shid' khyo ngad: ra". **17** Mao" So myid o: ra" khyo re kad'

nae" kao bau: ra" yaug khag' ngadqere:- Ngo mho" shid' ru wa Mao" So mae" li" ra" mho" shid' khyo ngad: ra" i? Ngoyao" mho" shid' khyo ngad: ra" i? ga" rure ba: kho' yu: li" nae". **18** Yao: yao" akho: akhang" khyo" jhau: ra" yaug wa yao: yao" phung bao qo" nae" qhid' mae" qam: ke' ra". Ngadqere: yao: re nhao: ke' ra" yaug: phung bao qo" nae" qhid' mae" myid o: ra" yaug wa dang man" ra" yaug ngad: ra"- Yao: mae mhug' pyag' ru pe" mabo ngad: ra". **19** Moshe wa nao=nhaung" re Tarha" byid' ra" mangad: i? Ngadqere: nao=nhaung" mae" dayaug re: ai: Tarha" re maphug' cao" ko" ngad: ra". nao=nhaung" wa ngo re pe" mung: se' pye' nae" seim" na ko" i? ga" ta" ra". **20** Ailao"- mo,byu qe wa Nao wa yui vao: jaung" yaug ngad: ra"- Nao re se' pye' nae" khag' seim" na: ra" i? ga: tau" ako". **21** Yesu wa Ngo Dug No: Ba mae mug'pho: ve,lho dalam: za: kad' qhu" re nao=nhaung" alhab' mo, mug' hao" byaug: ako"- ga: phaug' tau" ra". **22** Moshe wa nao=nhaung" nho: yauggai zo: qere au: qid lhai: nae" qhid' mae" nao=nhaung" re amyin" byid' to" ra"- (gai gai: yao: ga" re wa Dug No: Ba mae au: qid lhai" ru kad' ako"- aire qhid yaug wa Moshe mangad:- nao=nhaung" phug' phyd' qe ngad: ako".) Airumung: nao=nhaung" wa Dug No: Ba mae yauggai zo: re au: qid lhai: khyo kad' byid' ako". **23** Airu: nao=nhaung" wa Moshe Tarha" re mashad' lhoe" nae" qhid' mae" Dug No: Ba mae yauggai nau" dayaug re au: qid lhai: khyo byid: ko" re wa ngo Dug No: Ba mae byu dayaug re no saug za: gai byid' ruyang nao=nhaung" wa ngo re pe"mung: nhag' yo: ko" i? **24** Adao: pyae ave, re qu" yang: dao: dakho' ge,- Dang man" ra" khyo" dao: kho' ge,- ga: yao: bam re ta" ra".

Yao: Wa Meshia Ngad: I?

**25** Yerusalem mae" mo, byu qe da=qhae: wa Kheim: so' qo" ra" mo, se' pye' nae" seim" ko" ra" yaug wa ce:yaug mangad: i? **26** Qu" ge,- Yao: wa de: de: za: kho" kyo" na: ra"- Yao: bam wa yao: re khag' pe" maga: gen=haung i? Yao: wa Meshia ngad: ra" ga" rure yao: bam gai gai: yao: ba geyang: ngad: laug i? **27** Ceyaug khai: mae" ngad: rure wa ngo=nhaung" ba: ra". Ngad=qere: Meshia joe" li" re wa yao: khai: mae" joe' li" rure khag' re: maba genae"- ga: ta" ako". **28** Yesu wa Caung: Pa" Yham mae mho" shid' na: au:- thoe qi: we' Nao=nhaung" ngo re gai gai: yao: ba: ako"- Ngo khai: mae" ngad: rure nao=nhaung" ba: ako". Ngo wa ngoyao" nho: akho: akhang" khyo" joe" li" ru mangad:- Ngo re nhao: ke' ra" yaug wa dang man" ra" yaug ngad: ra"- Nao=nhaung" wa yao: re maba ko" ngad: ra". **29** Ngadqere: ngo wa yao: mae" joe" li" yaug ngad: ru we' yao: wa ngo re nhao: ke' yaug ngad: ruyang ngo wa yao: re ba: ra"- ga: ta" ra". **30** Ailao" yao: bam wa Yesu re taung" yu nae" seim" ako". Ngadqere: yao" ayo, majoe" shiyang: yao: re khag' re: maqo" taung: ko" ngad: ra". **31** Mo,byu qemae" myo: sho' mo, Yesu re lam" ko" ru we' Meshia joe" li" lao"- yao: wa ceyaug kad' qhu" ra" ve,lho tho' je: myo: sho' ve,lho kad' qhu" li" li" nae" i? ga: ta" ako".

Yesu Re Taung" Yu Nae" Gug: Gam Gyezo: Qere Nhao: Ke' Ko" Ru

**32** Mo,byu qe Yesu khyo re airu: jho" so' na: rure Pharishe qe the' gyo: ge mung:- Yao: bam: khinjaung qi: qe wa Yesu re taung: nae" qhid' mae" gug: gam gyezo: qe damyo" re nhao: ke' ako". **33** Yesu wa Ngo wa nao=nhaung" we' dayo, zo: na mung:- Ngo re nhao: ke' ra" yaug jhao" dam: lo" zai ngad:- **34** Ailao" nao=nhaung" wa ngo re qho: li" genae"- Ngadqere: nao=nhaung" ngo re mamyo genae"- Pe"mung: ga"re ngo na: ra" jo, qo khyo nao=nhaung" maqo" ye: geyang: ngad: ra"- ga: ta" ra". **35** Kheim: so' qo" ra" Yuda qe wa- Ngo=nhaung" maqho: myao losho'- yao: wa khai: khyo ye: nae" ga" laug i? Ngo=nhaung" Yuda byu qe na: ra" Greek vogaung: jham khyo ye: mung:- Greek byumyu" qere yemho" shid' byid: nae" ga" laug i? ga: yao: cao: jho" myid' ako". **36** Yao: wa ngo=nhaung" yang yao: re qho ngad qere: maqhug' genae". Aimung: yao: joe" na: jo, nae" jo, qo khyo ngo=nhaung" maqo" ye: genae" ga: ta" ra". Yao: pe" ga: nug: laug i? ga: jho" ta" ako".

Kaoso' Qid Gyaung:

**37** Poe lo" thao" ba- poe mae" je: akhyag: ra" ba na mae Yesu wa to" ye, mung:- Qid shab' ra" yaug khag' ngadqere: ngo jhao" lo mung: shaug' ge, **38** Jham: mugsug' mae tung" to" ru we' dakhyo:- Ngo re lam" ra" yaug khag' ngadqere: yao" aung khug' nhag' lam: mae" kao so'qid zo: gyaung: yug: thug' li" na: ra"- ga: thoe qi: we' ta" ra". **39** Yesu airu: ta" ru wa yao: re lam" ra" mo, qo" khae: yu genae" ra" Byo re qang yang: ta" ru ngad: ra". Ai: ayo, re Yesu wa phung bao byid' ru maqhug' shimung: yang: Byo mabyid' to: shingad: ra".

Mo,byu Qe: Phaung Mae Phung: Jho" Kho' Lo" Ru

**40** Mo, phaung mae" mo, byu qe damyo" wa ce: dao: re the' gyo: gelao"- Ceyaug wa gaigai: yao: lapa ngad: ra"- ga: ta" ako". **41** Amung: gatau damyo" wa Yao: wa Meshia ngad: ra" ga: ta" mung:- gatau damyo" wa-Dang za: Meshia wa Ga=li=le mung" mae" thug' li" nae" mangad:- **42** Jham: mugsug' mae Meshia wa kho:kham: myid: zo: ngad: li" nae"- Davi na: lo: ra" Bed=le=hem vogaung: mae khau: li" zai ngad:- ga: ta" to" ra" mangad: i? ga:ta" ako". **43** Aimung: mo,byu qe wa Yesu mathao mae majho" vang" gemung:- phung: jho" kho' lo" ako". **44** Damyo" wa Yesu re taung: nug: ako"- Ngad=qere: khag' re: yao: re maqo" zai: ko" ngad: ra".

Kheim:so' Qo" Ra" Yuda Qe Malam" Ko" Ru

**45** Gug: gam gyezo: qe dam: tug' joe" lo gelao"- khinjaung qi: qe we' Pharishe qe wa yao: bam re- Yao: re nao=nhaung" pe"mung: mataung" lo ko" i? ga: lham: myid' ako". **46** Yao: bam wa ceyaug re" ru: khag' re: mamho" byid' qu" gengad: ra"- ga: phaug' tau" ako". **47** Ailao" Pharishe qe wa yao: bam re Nao=nhaung" rere: yao" yang lham: mhug' pyag' vanhaung i? **48** Kheim: so' qo" ra" mo, we' Pharishe qemae" yao: re lam" ra" byu dayaug yang na: ga" rure nao=nhaung" gyo" qu" ko" i? **49** Ce: mo,byu qe wa Moshe Tarha" re maba gemung:- Mao" So: nhang: kheim: qao: mae ngad: ako"- ga: ta" ako". **50** Qhid' phyao: Yesu jhao" yeqhug' qu" ra" Nikodi ga" ra" Pharishe dayaug na: ra". **51** Nikodi wa ngo=nhaung" tarha" jo; ru we' dakhyo: ga" re byu dayaug re sao qhid' shi" maca: qu" lo: yao: re dao: maqo" phyd' ngad: ra"- ga: ta" ra". **52** Yao: bam wa Nao re:- Galile byu ngad: i? Jham: mugsug' mae xeim: qu" wa,- Galile mung" mae" lapa dayaug re: mathug' li" qu" rure nao myao: li" nae"- ga: yao: re ta" ako".

Su: Lao We' Shad' Na Au: The' Taung" Yu: Ra" Myiqe:

**8:1** (Ai:thao yao: bam alhab' mo, yao: yao" yham khyo phao: lo" ako". Ngad qere: Yesu wa Zhan:lun: bam khyo ye" lo" ra". **2** Thao: ba ne, seim no' mae" Yesu wa Caung: Pa" Yham khyo dam: ye" lo" ra". Mo,byu qe alhab' mo, wa Yesu jhao" zang" ham: li" gemung:- Yesu wa zaung: jo, yang: yao: bam re mho" shid' byid' ra". **3** Jham: Tung" Pho" qe we' Pharishe qe wa- su: lao we' shad' na: au: the' taung" yu: ra" myiqe: dayaug re jhui" li" mung:- yao: bam alhab' mo; qhid' kheim: mae ai: myiqe: re yhe' to" ako". **4** Aimung: yao: bam wa Yesu re-Mho" pho" we"- Ce: myiqe: wa su: lao we' shad' na: au: yao: khyag' myao yang: taung" to" ako". **5** Airu" ra" myiqe: re wa laug bauri: yang pye' se' pye' ca"- ga: Moshe wa Kham" To" Ra" Tarha" mae amyin" byid' to" ra"- Ana" nao wa khoru: ein: ta" nae" i? ga: myid' ako". **6** Yao: bam ceru: ta" ko" ru wa Yesu re qobo qo" zhaug' nae" qhid' mae" ta" ru ngad: ako"- Ngadqere: Yesu wa gam" mung: yao" lo,nyhug' yang myid gaung mae khyang" tung" na: ra". **7** Ai:tau mae ye; jo; ra" mo, wa Yesu re dao: myid: paug' myid: mung: kad' ako". Ailao" Yesu wa tau: qu" ke' mung:- Yao: bam re Nao=nhaung" mae" qobo mashad' ra" yang: yang shi" sao qhid' ai: myiqe: re laug bauri: yang pye' ge,- ga: ta" ra". **8** Aithao Yesu wa dam: gam" lo" mung: myid gaung mae thug' khyang" na: ra". **9** Yao: bam wa cedao: re the' gyo: gelao"- qi: mo, shi" sao qhid' ai:tau mae" thug' lo" mung:- Yao: bam alhab' mo, dayaug: thao dayaug thug' lo" byaug: ako". Yesu za: dang: jo, mung:- ai: myiqe: wa aimae ye; jo; ra". **10** Ailao" Yesu wa tau: qu" ke' mung: myiqe: re- Yao: bam khai: lo" vako" ra" i? Nao re dao: phyd' nae" dayaug re: mana i? ga: myid' ra". **11** Ai: myiqe: wa Nhag' bo we"- dayaug re: mana ga: tau" ra". Ailao" Yesu wa Ngo re:- Nao re dao: maphyd' nae"- Lo" se,- qobo dadam: kad' lo- ga: ai: myiqe: re ta" ke' ra".)

Yesu Wa Mug: Myid Dao: Bo" Bao Ngad:

**12** Yesu wa Pharishe qere Ngo wa mug:myid dao: nho: bo" bao ngad:- Nga" thao cao" ra" yang khag' ngadqere: kao so' bo" bao qo" yu mung:- mug:cad' mae khonhae" re: masu: nae"- ga: ta" ra". **13** Ailao" Pharishe qe wa Yesu re- Nao wa naoyao" khyo re sagse: kham: na: ra"- Aimung: ni" sagse: kham: ru wa tarha" mavao ngad: ra"- ga: ta" ako". **14** Yesu wa Ngo wa- ngoyao" khyo re ngoyao: sagse: kham ngadqere: nga" sagse: kham dao: wa tarha"vao: ra"- Pe"mung:ga"re ngo khai: mae" li" ru ngad: ru we' khai: khyo lo" zai ngad: rure ngo ba:- Nao=nhaung" wa ngo khai: mae" joe" li" mung:- Khai: khyo lo" nae" rure maba ngad:

ako". **15** Nao=nhaung" wa xao su byu: li khyo" za: dao: kho' ako"- Ngo wa khag' rere: dao: maphyid'- **16** Ngadqere: ngo dao: phyid' ngad: re wa ngo dayaug za: dao: phyid' ru mangad:- Ngo re nhao: ke' ra" Nga"Pho" we' daga" dao: phyid' ru ngad mung:- nga" dao: phyid' ru wa dang man" ra". **17** Sagsa: shid' yaug: dao: jho" zhaung: lao" wa Tarha" vao:- ga: nao=nhaung" tarha" mae tung" to"ako". **18** Ngo wa ngoyao" khyo re sagsa: kham: ra"- Amung: ngo re nhao: ke' ra" Nga"Pho" re: nga" khyo re sagsa: kham: ra"- ga: ta" ra". **19** Yao: bam wa Ni" pho" khai: mae i? ga: yao: re myid' ako". Ailao" Yesu wa nao=nhaung" ngo rere:- Nga"Pho" rere: maba ngad: ako"- Nao=nhaung" ngo re ba ko" ngad: re wa Nga" Pho" rere: nao=nhaung" ba genae" ngad: ra"- ga: yao: bam re tau" ra". **20** Ce: dao: jham alhab' wa Yesu Caung: Pa" Yham mae" alu: ngauai ban" jham zhaung: to: ko" ra" qe, mae mho" shid' na: ra" au: ta" ra" dao: jham ngad: ra". Yao" ayo, majoe" shiyang: yao: re khag' yang re: mataung: ko" ngad: ra".

Ngo Lo" Nae" Ra" Jo, Qo Khyo Nao=nhaung" Maqo" Ye:

**21** Aimung: Yesu yao: bam re dam: ta" ru wa- Ngo wa phao: lo" zai ngad:- Nao=nhaung" wa ngo re qho: li" genae"- Ngo ye" lo" ra" jo, qo khyo nao=nhaung" maqo" ye: ko" ngad: ra"- ga: ta" ra". **22** Airumung: kheim: so' qo" ra" Yuda qe wa Ngo ye"lo" ra" jo, qo khyo nao=nhaung" maqo" joe" genae" ga: yao: ta" ra". Ce wa yao: yao" gaung re yao: yao: se' shid nae"- ga: ta" nug: ru laug i? ga: ta" ako". **23** Yesu wa Nao=nhaung" wa ce: o: gye, mug:myid we' sin" ra" mo, ngad: ako"- Ngo kam" wa tho' mae" joe" li" ru ngad:- Nao=nhaung" wa ce: mug:myid mae" mo, ngad: ako". Ngadqere: ngo wa ce: mug:myid mae" mangad:- **24** Aimung: nao=nhaung" wa yao: yao" qobo mae shid: li" genae"- ein: nao=nhaung" re ngo ta" va". Ngo wa Ngo- ga: yaug ngad: rure nao=nhaung" malam" ko" re wa nao=nhaung" wa yao: yao" qobo mae shid: li" genae"- ga: ta" ra". **25** Yao: bam wa Nao khag' ngad: i? ga: yao: re myid' ako". Ailao" Yesu wa yao: bam re Nao=nhaung" re ngo sao qhid' mae" ta" kyo" to: gau ngad va"- ga: tau" ra". **26** Nao=nhaung" khyo ngo ta" nae" khyo myo: sho' jo; ra"- Nao=nhaung" re dao: phyid' nae" rure: myo: sho' jo; ra". Ngadqere: ngo re nhao: ke' ra" yaug wa dang man" ra" yaug ngad mung:- ngo wa yao: mae" the' gyo" yu: ra" gu: reza: mug:myid byu qere ta" kyo" ru ngad:- ga: ta" ra". **27** Yesu wa Pho" khyo re ta" kyo" na: rure yao: bam maba: gyo: ko" ngad: ra". **28** Airumung: yao: wa Byu: Yao: Zo: re nao=nhaung" tau: to' to: gelao"- ngo wa Ngo ga: yaug ngad: rure nao=nhaung" ba: li" genae". Ailao" ngo wa Nga"Pho" yang mho" byid' to" gu: reza: ta" mung:- ngo wa ngoyao" kheim: so' khyo" yang pe" daja: re: makad' rure ba: li" genae"- ga: yao: bam re ta" ra". **29** Amung: ngo re nhao: ke' ra" yaug wa ngo we' daga" ngad: na: ra"- Ngo khonhae" re: yao: o ngauai: rure zai" na: ruyang yo: wa ngoyao: reza: mashapye' to: ngad: ra"- ga: ta" ra". **30** Yesu ta" ra" dao: ai jham re the' gyo" ra" mo, myo: sho' wa yao: re lam" ako".

Jeim Qe We' Jeim Mangad: Mo,

**31** Airumung: Yesu wa yao: re lam" ko" ra" mo, re- Nao=nhaung" nga" mho" shid' dao: re phug' cao" ko" re wa nao=nhaung" wa nga" mho"zo: gyang" qe ngad: ako". **32** Nao=nhaung" wa ai: dang man" rure ba: li" genae"- Amung: ai: dang man" ru wa nao=nhaung" re lhoe' ke' byid' li" nae"- ga: ta" ra". **33** Ailao" yao: bam wa Ngo=nhaung" wa Abraham nho: myid:zo: qe ngad: ra"- Ngo=nhaung" wa khag' jeim re: madoe; qu"- Aire nao=nhaung" re lhoe' ke' byid' li" nae"- ga: nao ta" ru wa pe" re ta" nug: i? ga: myid' ako". **34** Yesu wa yao: bam re Nao=nhaung" re ngo dang za: ta" geli"- Qobo kad' ra" yaug khag' ngadqere: qobo: nho: jeim ngad: ra". **35** Jeim wa din khu: mae khonhae" re: maqo" na ngad: ra"- Yao: zo: kam" wa khonhae" re: qo" na: ra". **36** Yao: zo" yang nao=nhaung" re lhoe' ke' byid' ngad: re wa loe; beim: li" genae". **37** Nao=nhaung" wa Abraham: nho: yao: zo: qe ngad: rure ngo ba:- Ngadqere: nao=nhaung" wa nga" mho dao: re makhae: yu nug gemung: yang: ngo re se' pye' nae" seim" na: ako". **38** Ngo wa Pho" yang ngo re qhu" byid' ra" gu: re ta" ra"- Nao=nhaung" kam" wa nao=nhaung" yao: pho" yang ta" ra" gu: re kad' ako"- ga: ta" ra". **39** Yao: bam wa Ngo=nhaung" pho" wa Abraham ngad:- ga: yao: re tau" ako". Yesu wa nao=nhaung" wa Abraham nho: myid:zo: qe gaigai: yao: ngad ko" ngad: re wa Abraham kad' ra" mau" jham re nao=nhaung" kad' li" genae". **40** Ngo kad' ra" gu: alhab' wa Mao" So mae" the' gyo" yu: ra" khyo re nao=nhaung" re ta" kyo" na: ru ngad: ra"- Ngadqere: nao=nhaung" wa ngo re se' pye' nae" seim" na: ako". Abraham wa airu: makad' lai: lo ngad: ra". **41** Nao=nhaung" wa nao=nhaung" yao: pho" kad' lai: lo: ru we' dakhyo:- kad' na: ako"-ga: ta" ra". Yao: bam wa- Mao"so yao:za: nganhaung" nho: dayaug za" Pho" ngad mung: ngo=nhaung" wa yao" nho: yauggai

zo: agyang" ge ngad:- ga: phaug' tau" ako". **42** Ailao" Yesu wa yao: bam re- Mao" So wa nao=nhaung" yao: pho" ngad: re wa ngo re jhid' de, genae" ngad: ra". Pe" mung: ga" re ngo wa Mao" So mae" joe" li" mung:- ana" cemaie ngad va"- Ngo wa ngoyao" akho: akhang" khyo" joe" li" ru mangad:- Mao" So wa ngo re nhao: ke' ra". **43** Ngo ta" ra" dao: re nao=nhaung: pe" mung: maba: gyo: ko" i? Pe" mung: ga" re aiwa nga" mung dao: nao=nhaung" maqo" tho' tae" gyo" yu geyang: ngad: ako". **44** Nao=nhaung" wa nao=nhaung" yao: pho" ai: min:yui: nho: myid: zo: qe ngad gemung:- nao=nhaung" yao: pho" myid: o: ra" khyo re cao" nug mo, ngad: ako". Yao: wa sao qhid maqhid mae" byu se' yaug ngad: ra". Yao: mae dang man" ru mabo: ru: yang yao: wa dang man" ra" shad' mae khonhae" re: mana: qu" ngad: ra". Yao: mung dao: ta" lao" yao: wa yao" ave, ngad: ru we'dakhyo:- kad' na: ru ngad: ra"- Pe" mung: ga" re yao: wa mhug' hab' ngad mung: mhug' hab' qe alhab' mo; yao: pho" ngad: ra". **45** Ngadqere: ngo wa dang man" ru ta" mung: ai: mathao: yang nao=nhaung" ngo re malam" ko" ngad: ra". **46** Ngo wa qobo qo" yaug ngad: rure nao=nhaung" mae" khoyaug lam: sagse: qo" kham ko" i? Ngo wa dang man" ru ta" re pe" mung: nao=nhaung" ngo re malam" ko" i? **47** Mao" So mae" ngad: ra" yaug wa Mao" So: dao: jham re tae" gyo" ra"- Ngadqere: nao=nhaung" wa Mao" So mae" mangad: gemung: nao=nhaung" matae" gyo: ko" ngad: ra".

### Yesu We' Abraham

**48** Ailao" yao: bam wa Nao wa Samari byu ngad: ra"- Amung: yui zaung: ra" yaug ngad: ein: ngo=nhaung" ta" ru wa dang: mangad: i? ga: myid' ako". **49** Yesu wa Ngo wa yui zaung yaug mangad:- Ngo wa Nga" Pho" re phug' te' yaug ngad: ra"- Ngadqere: nao=nhaung" wa ngo re phug' mate' ko" ngad: ra". **50** Ngo wa ngoyao" gaung re phug' te' byid: genae" rure qho: na yaug mangad:- Ngadqere: aire qho byid' na yaug we' nga" bo: de, yang: dao: kho' byid' na ru dayaug na: ra". **51** Nao=nhaung" re ngo dang za: ta" geli"- Nga" mho" shid' dao: re phug' cao" ra" yaug wa khonhae" re: mashid nae"- ga: tau" ra". **52** Ailao" yao: bam wa Nao wa gaigai: yao: yui zaung yaug ngad: rure ngo=nhaung" ana" khyag' za: ba va". Abraham wa shid: byaug va"- Lapa qere: shid: byaug vako" ra"- Ngadqere: nao wa nga" mho" shid' dao: re phug' cao" ra" yaug wa khonhae" re: mashid nae"- ga: ta" ra" ga: ta" ako". **53** Ngo=nhaung" yao: pho" Abraham wa shid: byaug: ava"- Nao wa Abraham tho' je: qi: yaug ngad: i? Lapa qere: shid: byaug: avako"- Nao wa khag' ngad: ein: myid: i? ga: myid' ako". **54** Yesu tau: mung:- Ngo wa ngo yao" gaung re phug' te' nga: yhe' byid' ngad: re wa ai: phug' te' byid' ru wa akeim ngad: ra"- Ngo re nga: yhe' byid: yaug wa nga" Pho" ngad: ra"- Ai: yaug reyao: ngo=nhaung" Mao" So ngad: ga: nao=nhaung" ta" ako". **55** Ngadqere: nao=nhaung" wa yao: re maba ko" ngad: ra"- Ngo kam" wa yao: re ba:- Ngo wa yao: re maba ein: ta" ngad: re wa ngo wa nao=nhaung" we' dakhyo: mhug' hab' ngad: li" nae". Ngadqere: ngo wa yao: re ba mung:- yao" dao: re ngo phug' cao" ra". **56** Nao=nhaung" yao: pho" Abraham wa ngo joe" li" nae" ba na re the' myao nae" rure ngau: ra"- Yao: wa aire the' myao mung: ngau: bau" ra" ga: ta" ra". **57** Yao: bam wa Yesu re Nao wa apyad ngo" xe zin lhao" re: madau shingad: ra"- Abraham re nao myao va" ga" o? ga: ta" ako". **58** Yesu wa- Nao=nhaung" re ngo dang za: ta" geli"- Abraham mana shimae" ngo na va"- ga: tau" ra". **59** Ailao" yao: bam wa Yesu re pye' nae" ga: laug bau: jham gaug: yu: ako"- ngadqere: Yesu wa phao: vho' mung: Caung: Pa" Yham mae" thug' lo" ra".

### Khau: Mae" Myo, Jid: Ra" Yaug Re Yesu Gai Byid' Ru

**9:1** Yesu khyo su" lo" na: ra" au:- khau: mae" myo, jid: ra" byu dayaug re yao: myao: ra". **2** Yao" mho" zo: qe wa yao: re Mho" Pho" we"- Aiyaug khau: mae" myo, jid: ru wa khag' qobo: yang i? Yao: yao" qobo: yang ngad: ra" i? Mangad: lao" yao: myhi" yao: pho" nho: qobo ngad: ra" i?- ga: myid' ako". **3** Yesu wa Yao: myo, jid: ru wa yao" qobo: yang re: mangad:- Yao: myhi" yao: pho" tao: qobo: yang re: mangad:- Yao: myo, jid: ru wa Mao: So: qam: so' myao: thug' li" nae" qhid' mae" ngad: ra". **4** Ngo re nhao: ke' yaug: mau" re na" ngad shi" au:- ngo=nhaung" zai: ca" ra". Khag' re: mau" magari: zai" ra" myi" ayo, joe" lo: li" nae". **5** Ngo wa mug: myid dao mae na: jo; au:- mug: myid: dao: nho: bo" bao ngad:- ga: ta" ra". **6** Ceru: bin: ta" lao"- Yesu wa myid gaung mae khata: phoe: mung: tham: bab dajhid' lhag' yu yang:- ai: myo, jid pho" nho: myo, jid' re gyad byid: mung:- **7** Silom qidham: mae ni" myo, khung: yecid' pye' wa,- ga: ta" ra". (Silom ga" ru wa nhao: ke'- ga" ru ngad: ra.) Airumung: ai: myo, jid pho" wa yao" myo, khung: yecid' yu yang: myo, myao mung: dam: phao: lo" ra". **8** Ailao" yao" yham kyo: cao: qe we' qhid' phyao: yao: mho' zo" na: rure myao: qu" va" ra"- mo, byu qe wa Ceyaug wa lhaung" mho' zo" zaung: jo, yaug mangad: i? ga: ta" ako". **9** Damyo" wa Ngad: ra"- ga: ta"

mung: gatau damyo" wa Ceyaug mangad:- Yao: we' dau yaug ngad: ra-" ga: ta" ako". Aimung: ai: yaug wa yao: yao:- Ngo wa ai: myo,jid yaug ngad va"- ga: ta" ra". **10** Yao: bam wa nao ana" khoru: myo, qo" myao: lo: i? ga: myid' ako". **11** Yao: wa Yesu ga: mang yaug wa tham: bab dajhid' lhag' yu yang: nga" myo,jid' re gyad byid: mung:- Silom qitham: mae nga" myo,khung: yecid' pye' nhao: ra"- Ngo re: ye" lo" mung:- myo,khung: yecid' pye' we' nga" myo, myao: li" ra"- ga: tau" ra". **12** Yao: bam wa Yao: wa khai" mae ngad: ra" i? ga: myid' ako". Ailao" yao: wa Ngo maba- ga: tau" ra".

Gai Byid' Ra" Khyo Re Pharishe Qe Ca: Qu" Ru

**13** Ailao" yao: bam wa qhid' phyao: myo, jid: ra" yaug re Pharishe qejhao" jhui" ye" ako". **14** Yesu tham: bab lhag' yu mung: ai: myo, jid pho" re myo, myao nhao: ra" ba na wa Dug No: Ba ngad: ra". **15** Pharishe qe wa ai: myo, myao: li" va" yaug re yao" myo, dam: myao: li" ra" khyo re dam: myid' ako". Aimung: yao: wa yao: bam re Yao: wa nga" myo,jid' mae tham: bab: gyad byid' ra"- Nga" myo,khung: yecid' pye' lao"- nga" myo, myao: li" ra"- ga: ta" ra". **16** Pharishe qemae" damyo" wa Ai: yaug wa Dug No: Ba: tarha" re phug' cao" yaug mangad' ruyang Mao:So mae" joe" li" ra" yaug wa magari: boe" ngad: ra"- ga: ta" mung: gatau damyo" wa Qobo qo" ra" byu dayaug wa airu" ra" mug' pho: ve,lho jham re khoru: qo" kad' nae" i? ga: ta" ako". Aimung: yao: bam yao: cao: myid majho" vang" ko" ngad: ra". **17** Aimung: Pharishe qe wa ai: myo, myao: li" ra" yaug re- Yao: wa ni" myo,jid' re myao nhao: ra"- ga: nao ta" ra". Yao" khyo re nao khoru: ein: ta" nae" i? ga: dalhang dam: myid' ako". Ailao" yao: wa Aiyaug wa lapa ngad: ra" ga: tau" ra". **18** Ngadqere: kheim: so' qo" ra" Yuda qe wa ai: yaug qhid' phyao: myo, jid pho" ngad: ga" rure we' ana" yao: myo, myao: li" rure manug: lam" ko" ngad: ra". **19** Aimung: yao: bam wa yao: myhi" we' yao: pho" tao re khai: yu yang:- Ceyaug wa ni" shid' tao: nho: yaug gai zo: ngad: i? Khau: mae" myo, jid ngad: ga: ni" shid' tao ta" ako"- Aire ana" yao: khoru: myo, myao: li" ra" i? ga: yao: shid' tao re myid' ako". **20** Yao: myhi" yao: pho" tao wa Yao: wa nga" shid' tao: nho: yaug gai zo: ngad: ru we' khau: mae" myo,jid ngad: rure nga" shid' tao ba:. **21** Ngadqere: yao: ana" khoru: myo, myao: li" ra" khyo we' yao" myo,jid' re khag' yang myao nhao: rure wa nga" shid' tao maba- Yao: re: apyad qi: va"- Aimung: yao: re myid: ge,- Yao" khyo re yao: yao: qo" ta" naeva"- ga: tau" ako". **22** Yao: myhi" yao: pho" tao ceru: tau: ko" ru wa kheim: so' qo" ra" Yuda qere gyaug geyang: ngad: ako". Pe"mung: ga"re Yesu re Meshia ngad: ra" ga: lam" ra" yaug khag' re ngadqere: Tarha" Jung Yham mae" phoe' pye' nae" qhid' mae" kheim: so' qo" ra" Yuda qe myid vang" to: vako" ra". **23** Ce: mathao: yang: yao: myhi" yao: pho" tao wa Yao: re: apyad qi: va"- Yao: re myid' qu" ge,- ga: ta" ru ngad: ako". **24** Yao: bam wa ai: khau: mae" myo, jid: ra" yaug re shid' lhang ein: lhang dam: khai: yu gemung:- Mao"So: qhid' kheim: mae dang man" ra" dao: ta" wa,- Nao re myo, myao nhao: ra" yaug wa qobo qo" ra" yaug ngad: rure ngo=nhaung" ba:- ga: ta" ako". **25** Ailao" aiyaug wa Yao: wa qobo qo" yaug- maqo" yaug ngad: rure ngo maba- Ana" ngo myo, myao va"- ein: ce daja: za: ngo aba: ga: tau" ra". **26** Yao: bam wa Yao: wa nao re pe" kad' byid' ra" i? Ni" myo,jid' re khoru: kad' yang: myao nhao: ra" i? ga: myid' ako". **27** Ailao" aiyaug wa Nao=nhaung" re ngo ta" kyo: gau ngad va"- Nao=nhaung" manug: tae" gyo: ko" ngad: ra". Nao=nhaung" pe" mung: dam: gyo: nug ko" i? Ngo qu" re nao=nhaung" re: yao" mho" zo: qe boe" nug gesam" ra"- ga: ta" ra". **28** Yao: bam wa aiyaug re Nao yaug lam: aiyaug: mho"zo: ngad: ra"- Ngo=nhaung" kam" wa Moshe nho: mho"zo: qe ngad:- **29** Mao"So wa Moshe re mung dao: byid' rure ngo=nhaung" ba:- Ngadqere: aiyaug re wa yao: khai: mae" li" yaug ngad: rure lhao" re: ngo=nhaung" maba ga: ta" mung:- Yao: re jung" ako". **30** Ai: myo, myao: li" yaug wa Yao: wa ngo re myo, myao: li" nhao: ra" yaug ngad: ra"- Ngadqere: nao=nhaung" wa yao: khai: mae" joe" li" rure maba ko" ru wa mug' ja: yao: ngad: ra". **31** Mao"So wa qobo jab qe: akyu" mho' thoe re matae" gyo: ngad: ra". Yao: re phug' myao" ra" mo, we' yao: myid o: ra" khyo" phug' cao" ra" mo; akyu" mho' thoe re wa Mao"So tae" gyo: byid' rure ngo=nhaung" ba: ra". **32** Khau: mae" myo, jid: ra" yaug re myo, myao: li" nhao: ra" byu dayaug na:- ga" rure mug: myid dao mae mug: thug' sao peim mae" ana" joe" sho' magyo" qu" shi:- **33** Ceyaug wa Mao"So mae" joe" li" yaug mangad: re wa yao: wa pe" daja: re: maqo" kad' nae" ngad: ra" ga: tau" ra". **34** Ailao" yao: bam wa- Nao ru" qobo khug mae khau mung: qi" li" ra" yaug: yang ngo=nhaung" re mho" shid' nae" seim" na: i? ga: ta" mung: yao: bam wa yao: re Tarha" Jung Yham mae" khe' thug' pye' ako".

Byo We' Sin: Yang: Myo, Jid: Ru

**35** Ai: myo, myao: li" ra" yaug re airu: khe' thug' pye' ko" rure Yesu the' gyo" ra". Yesu wa yao: re myao lao"-

Byu: Yao: Zo: re nao lam" i? ga: yao: re myid' ra". **36** Aiyaug wa Nhag' bo we"- Ngo wa yao: re qo" lam" sho' yao: khag' ngad: rure ngo re ta" kyo: la,-ga: tau" ra". **37** Yesu wa yao: re Nao wa yao: re myao: qu" ava"- Yao: wa ana" nao we' jho" jhau: na: ra" yaug yao: ngad: ava"- ga: ta" ra". **38** Aiyaug wa Asang we"- Ngo lam" va"- ga: pad' thaug' thaug' yang: Yesu re goe; pa" ra". **39** Yesu wa Ngo wa myo, jid qe myo, myao: li" genae" re:- myo, myao mo, myo, jid: lo" genae" qhid' mae" re:- ce: mug:myid dao khyo dao: kho' nae" qhid' mae" joe" li" ru ngad:- ga: ta" ra". **40** Ai:mae bo: ra" Pha=ri=she qe damyo" wa ce:dao: re the' gyo: gelao"- Ngo=nhaung" re: myo, jid qe ngad ko" ra" ein: nao ta" nug: i? ga: myid' ako". **41** Yesu wa Nao=nhaung" myo, jid qe ngad ko" ngad: re wa nao=nhaung" qobo qo" mo, mangad: genae"- Ngadqere: ana" nao=nhaung" wa ngo=nhaung" myo, myao: ga: ta" ko" ruyang nao=nhaung" wa qobo qo" jo; ako"- ga: ta" ra"

Yao Lhaug' Yaug: Dao: Tau"

**10:1** Yesu wa Nao=nhaung" re ngo dang za: ta" geli"- Yao yham khyo kham: dung: khyo" mavao lo:- gatau khyo" do; lhoe" vao: ra" yaug wa khug' hab' damya, ngad: ra". **2** Kham: dung: khyo" vao ye" ra" yaug wa- yao lhaug' yaug ngad: ra". **3** Kham: lhaug' yaug wa yao: re kham: phung" byid' ra". Yao jham re: yao" thoe re tae" gyo: gemung: yao: wa yao" yao jham re mang lao: yang khai mung: taung gaung khyo jhui" thug' lo" ra". **4** Yao jham re taung gaung khyo bin: jhui" thug' lo" lao"- yao: wa yao jham: qhid' au: mae ye" lo" ra". Yao jham wa yao" thoe re ba geyang: yao" thao cao" ye" lo" ako". **5** Su gaje dayaug: thoe khyo" wa yao jham macao" genae". Pe" mung: ga" re- Yao jham wa ai: yaug: thoe re maba gemung: yang: ai: yaug mae" tao" phao: lo" li" genae"- ga: ta" ra". **6** Yesu wa ce: dao: tau" re yao: bam re ta" kyo" ke' ra". Ngadqere: yao: bam wa dao: tau" lajheim: re maba: gyo: ko" ngad: ra".

Yao Zam: Yaug Agai Yesu

**7** Airumung: Yesu wa Nao=nhaung" re ngo dang za: ta" geli"- Ngo wa yao jham vao: ra" kham: dung: ngad:. **8** Nga" qhid' re joe" li" ko" ra" gaje alhab' wa khug' hab' qe we' damya, qe ngad: ako". Yao jham wa yao: bam: thoe re matae" gyo: ko" ngad: ra". **9** Ngo wa kham: dung: ngad:- Ngo khyo" vao: ra" yaug khag' ngadqere: khyad' yu: ru qhug' nae". Yao: wa thug' thug' vao vao kad' mung: mhin: gyo, jao: myao: li" nae". **10** Khug' hab' wa khug' nae" se' tam" pye' nae" qhid' mae" za: li" ra". Ngo wa nao=nhaung" kao so' qo" yu mung: magan: mago" ra" kao so'mae qo" dau: na genae" qhid' mae" joe" li" ru ngad: **11** Ngo wa yao jham: qhid' mae" kao so' byid' pye' ra" gai: ra" yao lhaug' yaug ngad:. **12** O:kaung wa yao lhaug' yaug mangad:- yao jham re sang yaug re: mangad: mung:- zag ne li" na: rure the' myao lao" yao: wa yao jham re to: co' mung: tao" phao: lo" ra". Airumung: ai: zag ne wa bin" cad' zo: mung:- yao jham re khe' sin" ke' ra". **13** Okaung wa okaung za: ngad: ruyang yao jham re pe" sang: makho: lo: tao" phao: lo" ra". **14 -15** Ngo wa gai: ra" yao lhaug' yaug ngad:. Nga" Pho" wa ngo re ba mung: ngo wa nga" Pho" re ba: ru we' dakhyo: ngo wa nga" yao jham re ba mung:- yao jham re: ngo re ba: ako". Aimung: ngo wa yao jham: qhid' mae" kao so' byid: nae" qo" dan: pye' ra". **16** Amung:- ce: yao jham mae mabo: ra" ngo sang: ra" yao gatau na shi" ra". Ngo wa ai: yao jham rere: jhui" yu ca" ra". Yao: bam wa nga" thoe re tae" gyo" li" genae". Ailao" ai: yao jham wa dakyaung" za: yao lhaug' yaug dayaug za: ngad: li" genae". **17** Ngo wa kao so' re dam: qo" khae: yu genae" qhid' mae" nga" kao so' re qo" dan: pye' ruyang nga" Pho" wa ngo re jhid' de; ra". **18** Kao so' re khag' re: ngo mae" maqo" yu: pye' ngad: ra". Ngo wa nga" kao so' re ngoyao" myid khyo" byid' pye' ru ngad: ra". Ngo wa nga" kao so' re byid' pye' ru we' dam: tug' yu nae" akho: akhang" qo" yaug ngad:- Ceru: kad' nae" nga" Pho" wa ngo re amyin" byid' to: va". **19** Ce: dao: jham: mathao mae mo,byu qe: phaung mae yao: cao: majho" vang" lo: dam: boe" li" ko" ra". **20** Yao: bam mae" myo: sho' mo, wa Yao: wa yui zaung: ra" ago ngad: ra". Nao=nhaung" pe" mung: yao" dao: re tae" gyo: ko" i? ga: ta" ako". **21** Ngadqere: damyo" wa yau: zaung: ra" yaug wa ceru" ra" dao: maqo" jhau ngad: ra". Yui wa myo, jid re khoru: myo, qo" myao nhao zai i? ga: ta" ko" ra".

Yesu Re Ha: Pye' Ko" Ra" Khyo

**22** Yerusalem vogaung: mae" Caung: Pa" Yham re Qhaug' Byid' ra" Poe kad' na: ako". Ai: ayo, wa gyo, yo, ngad: ra". **23** Yesu wa Caung: Pa" Yham mae" Sho=lu=mon zaung mae su" qin" ra". **24** Mo,byu qe wa Yesu lhang" gam: mae zang" ham: li" mung: Nao wa ngo=nhaung" re khomyhao" joe" sho' lao" nhao nae" i? Nao



wa Meshia ngad: i? Ngo=nhaung" re de: de: za: ta" kyo: la, ga: myid' ako". **25** Yesu wa- Ngo nao=nhaung" re ta" kyo" to: gau ngad va". Ngaqere: nao=nhaung" ngo re malam" ko" ngad: ra". Nga" Pho" kheim: so' khyo" yang ngo zaii" ra" mau" zo" jham wa nga" atha" dao: jhau: na: ako". **26** Ngadqere: nao=nhaung" wa nga" yao jham mangad: gemung: nao=nhaung" malam" ko" ngad: ra". **27** Nga" yao jham wa nga" thoe re tae" gyo" ako". Ngo wa yao: bam re ba mung:- yao: bam wa nga" thao cao" ako". **28** Ngo wa yao: bam re apyad ato: kao so' byid: mung: yao: bam wa khonhae" re: mashid genae". Yao: bam re nga" lo, mae" khag' re: maqo" lhad' yu genae". **29** Nga" Pho" yang ngo re byid' to" ru wa cao jab alhab' tho' je: qi" rumung:- yao: bam re nga" pho" lo, mae" maqo" lhad' yu ko" ngad: ra". **30** Nga" Pho" we' ngo wa dadang: dalam: za: ngad: ga: yao: bam re ta" ra". **31** Alao" mo, byu qe yao: re ceim" pye' genae" ga: laug baii gaug: yu: ako". **32** Yesu wa yao: bam re Ngo wa nga" Pho" kad' nhao: ra" gai: ra" mau" zo" myo: sho' re nao=nhaung" qhid' kheim: mae kad' va". Ai: mau" zo" kholam" mathao mae nao=nhaung" ngo re laug baii: yang pye' se' nug ko" i? ga: myid' ra". **33** Yao: bam wa- Gai: ra" lo, mau" daja: ja" mathao: yang ngo=nhaung" nao re laug baii: yang pye' se' nug: ru mangad:- Nao wa xao su byu angad: ru naoyao" gaung re Mao" So we' daqi" za: kad' nae" seim" yang: Mao" So re jung" dao: jhau: ruyang ngo=nhaung" ceim" pye' nug: ru ngad: ra"- ga: tau" ako". **34** Yesu wa Nao=nhaung" Mao" So re ngag: ako" ga: Mao" So ta" to" ra" dao: re Nao=nhaung" yao" Tarha" jham: paug' mae tung" to" ra". **35** Jham: mugsug' mae ta" to" ra" dao: jham wa dapyad daqae: dang man" jo; ga" rure nao=nhaung" ba: ako". Mao" So wa yao" mungdao: re byid' to" ra" mo, re so qe ga: ta" ra". **36** Nga" Pho" wa ngo re khyin: yu mung:- mug: myid' dao khyo nhao: ke' ra". Airu:mung: ngo wa Mao" So: Yao: Zo: ngad: ein: ta" ruyang- ngo wa Mao" So re jung" dao: ta" ra" ga: nao=nhaung" khoru: mung: qo" ta" ko" i? **37** Nga" Pho" zaii: nhao: ra" mau" re- mazaii" ru ngad: re wa nao=nhaung" ngo re dalam" ge., **38** Ngadqere: ai: mau" zo" jham re ngo zaii: yang: ngad: re wa ngo re malam" gesho' ngadqere: nang" thao" nga" lo, mau" jham re khalhao" lam" ge,- Ailao" nga" Pho" wa nga" khug mae na mung: ngo wa nga" Pho" khug mae na: rure nao=nhaung" phiyid' phiyid' kho' kho' ba: li" genae"- ga: ta" ra". **39** Yao: bam wa Yesu re taung: nae" dalhang dam: seim" ako". Ngadqere: Yesu wa- yao: bam: lo, mae" phao: loe; lo" ra". **40** Aithao Yesu wa Yodan: gyaung: thoete' mae" qhid' phyao: Yohan Babtizam byid' ra" jo, qo khyo dam: gau" de; ye: mung: ai: tau mae yena: ra". **41** Mo, byu qe myo: sho' yao: jhao" joe" li" mung: yao: bam wa Yohan wa mug' pho: ve, lho jham makad' qhu" ngad: ra". Ngadqere: ceyaung we' sin: mung: Yohan ta" ru alhab' wa dang: ra"- ga: ta" ako". **42** Aitau mae" mo, byu qe myo: sho' Yesu re lam" ako".

#### Lazaru Shid: Ra" Khyo

**11:1** Bethani vogaung: mae Lazaru ga: mang: ra" byu dayaung na: ra". Yao: wa no: na: ra". Bethani vogaung: wa Mari we' yao: bai: Matha tao na: ra" vogaung: ngad: ra". **2** (Mari ai:yaug wa Asang: khyid mae sheim nae pyo" ra" xau gyad byid; mung:- yao" xae: yang sad' byid' ra" yaug ngad: ra". No: na yaug Lazaru wa- yao: maung ngad: ra".) **3** Yao: nhae tao wa Asang we"- Nao jhid' de; ra" ba nam pho" wa no: na: ra"- ga: Yesu re dao: pyang: ke' ako". **4** Yesu wa aire the' gyo: lao"- Ce: no wa shid no mangad: ngad: ra"- Mao" So: phung bao bao: thug' li" nae" qhid' mae" no: ru ngad mung:- ce: no khyo" yang Mao" So: Yao: Zo: re: phung bao bao: thug' li" nae"- ga: ta" ra". **5** Yesu wa Matha - Mari - Lazaru maung nhae tao ho' re jhid' de; ra". **6** Ngadqere: Yesu wa Lazaru no: na: ga" rure the' gyo: thao re yao: na: ra" jo, qo mae shid' ba jan" thang: na: ra". **7** Aithao Yesu wa Ngo=nhaung" Yuda mung" khyo dam: tug' ye: gelang:- ga: yao" mho" zo: qere ta" ra". **8** Mho" zo: qe wa Mho" Pho" we"- Ai: mung" mae" mo, byu qe wa ana" gyo: za: lhao" re: laug baii: yang pye' nae" seim" ko" ra"- Ana" re: aikhyo dam: ye: shinae" ein: i? ga: ta" ako". **9** Yesu wa Daba mae daxe: shid' yo, qug bo: ra" mangad: i? Aimung: na" gaung re khyo su" ra" yaug wa ce: mug:myid' dao: bo" bao re myao mung: matha" lang: ngad: ra". **10** Ngadqere: mug: cad' yo mae khyo su" ngad: re wa bo" bao maqo" yang: yao: wa tha" lang" ra"- ga: ta" ra". **11** Yesu wa ceru: bin: ta" thao re xo' mung:- Ngo=nhaung" ba nam pho" Lazaru wa yab: myhid' jo; ra"- Yao: re yenhug' nae" qhid' mae" ngo ye: nae"- ga: ta" ra". **12** Mho"zo: qe wa Asang we"- yao: yab: myhid' jo; ru angad: re wa yao: wa byan" so" li" li" nae"- ga: tau" ako". **13** Yesu wa Lazaru shid va"- ga: ta" ru ngad: ra". Ngadqere: mho"zo: qe wa gai gai: yao: yab: myhid' jo; rure ta" ru ngad: ga: jho: ako". **14** Aimung: Yesu wa yao: bam re Lazaru wa shid: ava". **15** Ngadqere: nao=nhaung" lam" genae" qhid' mae" ngo ai: jo,qo mae mana: ang: ruyang nao=nhaung" qhid' mae" ngo bau" ra". Yao: jhao" ngo=nhaung" ye" lo" gelang:- ga: de: de: za: ta" ra". **16** (Zozam ga" ra") Thoma wa Ngo=nhaung" yebocao: shid nae" qhid mae"

mho"pho" we' daga" ngo=nhaung" alhab' mo, cao" ye: gelang:- ga: yao" byin cao: mho"zo: qere ta" ra".

Yesu wa Dam: Dau: To" Li" Ru we' Kaoso' Ngad: Ra" Khyo

**17** Yesu joe" ye" lo" re Lazaru re nyhab' pye' ru byid ba ngad va" rure yemyao: ra". **18** Bethani vogaung: wa Yerusalem mae" khyo shid' man: ko za: va" ra". **19** Yuda byu myo: sho' mo, wa Matha we' Mari shid' nhae: nho: yao: maung shid yang: yao: nhae tao re nhag' tang" byid: nae" joe" li" ako". **20** Yesu li" na: ra" ga" rure Matha the' gyo: lao"- yao: wa Yesu re yetug: yu nae" qhid' mae" thug' ye" lo" ra". Ngadqere: Mari wa yham khug mae na: jo; ra". **21** Matha wa Yesu re Asang we"- Nao ce:mae na: ngad: re wa nga" maung mashid zai ngad: ra". **22** Ana" ngadqere: Mao" So wa nao mho' ra" ja: pe" ngadqere: nao re byid' li" nae" ein: rure ngo ba:- ga: ta" ra". **23** Yesu wa- Ni" maung dam: dau: li" zai ngad:- ga: yao: re ta" ra". **24** Ailao" Matha wa Lo" thao" ra" ba na mae yao: dam: dau: to" li" nae" rure wa ngo ba: ga: phaug' tau" ra". **25** Yesu wa Ngo wa- dam: dau: to" li" ru we' kao so' ngad: Ngo re lam" ra" yaug khag' ngadqere: yao: wa shid ngadqere: dau: na: li" nae". **26** Khag' ngadqere: dau: na mung: ngo re lam" ra" yaug wa khonhae" re: mashid lonae"- Cedao: re nao lam" i? ga: myid' ra". **27** Matha wa Asang we"- Ngo lam" ra"- Nao wa mug:myid dao khyo joe" li" nae" ra" Mao" So: Yao: Zo: Meshia ngad: rure ngo lam" va"- ga: phaug' tau" ra".

Yesu Ngug: Ru

**28** Matha wa ceru: bin: ta" lao"- yao: wa lo" mung: yao: nhaung: Mari re sae za: lo" khai mung:- Mho" Pho" wa cetau mae li" joe" na: ra"- Amung: yao: wa nao re myid' na: ra"- ga: Mari re ta" ra". **29** Cedao: re Mari the' gyo: lao"- yao: wa phyad za: to" li" mung: Yesu jhao" thug' ye" lo" ra". **30** (Yesu wa vogaung: khug khyo majoe" ye: shingad: ra"- Matha yetug: yu: ra" jo, qo mae na: jo; ashi") **31** Yham khug mae Mari we' daga" na mung: yao: re nhag' tang" byid' na ko" ra" mo, byu qe wa Mari phyad za: to" li" mung: thug' ye" lo" rure myao gelao"- yao" thao cao" ye" ako". Pe" mung: ga" re Mari wa lab khyo yengug nae" qhid' mae" thug' ye" lo" sam" ra"- ga: yao: bam jho: ako". **32** Mari wa Yesu na: ra" jo, qo mae joe" ye: mung: yao: re myao we' Yesu khyid qao: mae goe, mung: yang:- Asang we"- Nao cetau mae na: ngad: re wa nga" maung mashid: byaug zai ngad: ra"- ga: Yesu re ta" ra". **33** Yesu wa Mari ngug: rure we' yao: we' daga" cao" li" ra" mo, byu qe re: ngug ko" rure the' myao lao"- Yesu wa yao" nhag' lam: mae zao" mung: nhag' lam: mamyan: makhyad' kham zo" ra". **34** Ailao" Yesu wa Yao: re khai: mae nyhab' to: ko" i? ga: yao: bam re myid' ra". Yao: bam wa Asang we"- Li" mung: qu" qu" wa,- ga: tau" ako". **35** Yesu ngug byid gyo" ra". **36** Mo, byu qe wa Qu" ge,- Yao: wa Lazaru re gyai jhid' de, nhaung- ga:" ta" ako". **37** Ngadqere: yao: bam mae" damyo" wa yao: wa myo, jid re myo, myao nhao: ra" yaug mangad: i? Yao: wa Lazaru rere: mashid losho' maqo" tam" to: nhaung i? ga: ta" ako".

Lazaru Dam: Dau: To" Li" Ra" Khyo

**38** Ailao" Yesu wa nhag' lam: mamyan: makhyad' dam: kham zo: mung: lab khyo ye" lo" ra". Ai: lab wa laug khyau ng lab ngad mung:- lab nhad' mae laug zang: yang jhid' to" ako". **39** Yesu wa ai: laug zang re qhui" pye' ge,- ga: amyin" byid' ra". Ailao" shid yaug: yao: bai: Matha wa Asang we"- Bab sheim nae naeva"- Yao: re nyhab' to" ru byid ba ngad va"- ga: ta" ra". **40** Yesu wa- Nao lam" ngad: re wa Mao" So: phung bao re nao the' myao: li" nae" ein: nao re ngo ta" va" mangad: i? ga: ta" ra". **41** Ailao" yao: bam wa ai: laug zang re yu: pye' ako". Yesu wa mug: khyo tau: qu" mung:- Nga" Pho" we"- Nao wa nga" akyu" mho' thoe re tae" gyo: byid' ruyang nao re je"ju" caung: byid' ra". **42** Nao wa nga" akyu" mho' thoe re khonhae" re: tae" gyo: byid' rure ngo ba". Ngadqere: ngo wa nao: yang nhao: ke' yaug ngad: rure yao: bam lam" genae" qhid' mae" cema na: ra" mo; akyu" mathao mae ngo ceru: ta" ru ngad: ra"- ga: ta" ra". **43** Yao: wa airu: bin: ta" lao"- Lazaru we"- Thug' lo wa,- ga: thoe qi: we' khai: ke' ra". **44** Ailao" Lazaru wa yao" khyid lo, mae pin: cug' yang thab' to" ru we' myo, khung: re pin: cug' yang thab' to: gau yao: thug' lo: ra". Yesu wa yao: bam re- Yao: re thab' to" ra" pin: cug' jham re pheim: pye' byid: mung: nhao: ke' ge,- ga: ta" ra".

Yesu Re Gye Khug' Kad' Ko" Ru

45 Aimung: Mari jhao" li" ko" ra" mo,byu qe myo: sho' mo, wa yao: kad' ra" lo, mau" re the' myao gelao"- yao: bam wa Yesu re lam" ako". 46 Ngadqere: damyo" wa Pharishe qe jhao" tug' phao: lo" mung:- Yesu zaii" ra" mau" re lo" ta" kyo" ako". 47 Aimung: Pharishe qe we' khinjaung qi: qe wa Yuda Tarha" Qe, Do, Phung: zabphaung khai: qham mung:- Qu" ge,- Ceyaung wa mug'pho: ve,lho jham myo: sho' kad' qhu" na: ava"- Ngo=nhaung" pe" kad' zai i? 48 Ngo=nhaung" wa yao: re ceru: xo' yang: nha: to: lao" wa yaug khao: ngo" yao: re lam" lo" li" genae"- Aimung: kheim: so' qo" ra" Roma zug: qe wa akhyag li" yu mung: ngo=nhaung" nho: Caung: Pa" Yham re we' ngo=nhaung" amyu" re li" phyo' pye' li" genae"- ga: ta" ako". 49 Yao: bam mae" aizin re khinjaung yin" kad' na: ra" Kayapha ga: mang: ra" yaug wa- Nao=nhaung" pe" ba mo, mangad:- 50 Byumyu" damyu" geim" jeim" lo" nae" tho' ai: byumyu" geim" qhid' mae" byu dayaung shid; ru wa je: gai: rure nao=nhaung" mamyd: beim: ko" i? ga: ta" ra". 51 Yao: airu: ta" ru wa gai gai: yao: yao" myid khyo" ta" ru mangad:- Yao: wa ai: zin qhid' mae" khinjaung yin" ngad mung:- Yesu wa Yuda byumyu" alhab' qhid' mae" shid kham" li" nae" ga" rure we' 52 yao: bam: qhid' mae" za: mangad:- byo: sin" na: ra" Mao" So: byumyu" qe alhab' re dadang: dalam: za: boe" nhao nae" qhid' mae" re: Yesu shid kham: byid: nae" ra" khyo re lapa pa: ru ngad: ra". 53 Ai: ba na mae" kheim: so' qo" ra" Yuda qe wa Yesu re se' pye' nae" qhid' mae" pha,jhi" khyug' ako". 54 Aimung: Yesu wa Yuda mung" mae de: de: za: gyaung: masu" qin" lo: ngad: ra". Din" pyad' yo nhae mae" Ephrim ga" ra" vogaung: khyo thug' ye" lo" mung:- ai: mae yao" mho"zo: qe we' yena: jo; ra". 55 Lai Co' Poe ba na jhao" li" na mung:- seyo: vogaung: vojhe' khaung: mae" mo,byu qe wa poe majoe" shire yao: yao" gaung re caung: pa" thung" khyo" kyang" san: ru kad' nae" qhid' mae" Ye=ru=sa=lem vogaung: khyo do, ye" lo" ako". 56 Yao: bam wa Yesu re qho: na: ako". Yao: bam wa Caung: Pa" Yham mae yezang" ham: na: bam gemung:- Nao=nhaung" pe" ru: myid ko" i? Yao: wa gai gai: yao: poe khyo mali" nae" laug i? ga: yao: bam yao: cao: jho" myid' na: ako". 57 Khinjaung qi: qe we' Pharishe qe wa yao: bam Yesu re qo" taung" yu nae" qhid' mae" Yesu na: ra" jo, qo re ba yaug khag' ngad qere: lota" kyo: ca"- ga: amyin" khyo" to" ako".

#### Bethani Vogaung: Mae Yesu Re Xau Gyad Byid' Ru

12:1 Lai Co' Poe joe" nae" khyaug' ba ca" shi" au:- Yesu wa shid: rumae" yao" yang dam: dau: li" nhao: ra" Lazaru na: ra" Bethani vogaung: khyo ye" lo" ra". 2 Yao: bam wa Yesu re myi" xeim lham: nyhang" zho" ako". Matha wa zo:ve da" byid' na: ra"- Yesu we' vae: zo: jaung: mae daga" zaung: jo; ra" mo, mae Lazaru re: bobo: ra". 3 Ailao" Mari wa gyai phug' de; ra" sheim nae pyo" ra" Nardu xau gyang" daxe laung ko yu: yu yang: Yesu khyid mae vhe' gyad byid: mung:- yao" xae: yang sad' pye' byid' ra". Ai: xau wa dayham geim" mae byang" sho' nae: jo; ra". 4 Yao: re ab byid' pye' nae" yaug ngad: ra" Yesu mho"zo: Yuda Iskarud wa 5 Ce: sheim nae pyo" ra" xau re pe" mung: ngau sam yo kye' mae aung: yang: ai: ngau re myaung sho" ra" mo, re magae byid: i? ga: ta" ra". 6 Yao: ceru: ta" ru wa myaung sho: mo; qhid' mae" myid: ci" yang: ta" ru mangad:- Yao: wa khug' hab' ngad mung: ta" ru ngad: ra". Yao: wa ngau thaung vin yaug ngad mung:- aimae" lhaung" khug' phoe' aung: zo: yaug ngad: ra". 7 Ngadqere: Yesu wa Yao: re dakhin jang wa,- Ngo re nyhab' shaung: pye' ra" ba na qhid' mae" ai: sheim nae pyo" ra" xau re yao: vai: to" ru ngad: ra". 8 Myaung sho" ra" mo, wa khonhae" re: nao=nhaung" we' daga" za: na: ako". Ngadqere: ngo wa nao=nhaung" we' daga" khonhae" re: na: jo, nae" mangad:- ga: ta" ra".

#### Lazaru Re Se' Pye' Nae" Pha, jhi" Khyug' Ru

9 Mo,byu qe myo: sho' mo, wa Bethani vogaung: mae Yesu na thoe re the' gyo" ako"- Aimung: yao: bam wa Yesu mathao: yang za: re: mangad:- Shid: rumae" Yesu yang dau: li" nhao: ra" Lazaru rere: myao nae" qhid' mae" Bethani vogaung: khyo ye" lo" ako". 10 Aimung: khinjaung qi: qe wa Lazaru rere: se' pye' nae" pha, jhi" khyug' ako". 11 Pe"mung: ga"re Lazaru mathao mae Yuda byu qe wa khinjaung qi: qere to: co' mung:- Yesu re lam" lo" geyang: ngad: ra".

#### Yerusalem Khyo Aung Doe; Poe Khyo" Yesu Vao Ye" Ru

12 Ai: thao: ba re Lai Co' Poe khyo joe" li" ko" ra" mo,byu qe myo: sho' mo, wa Ye=ru=sa=lem khyo Yesu li" na: ra"- ga" rure the' gyo" ako". 13 Aimung: yao: bam wa Zhunpalun akaung jham re yu yang: yao: re tug: yu nae" qhid' mae" ye" lo" ako". Amung: yao: bam wa Mao" So re caung: khin" byid: ge,- Asang: mang we' joe'

li" ra" yaug wa ngau lho" vashao: wo"- Israel kho:kham wa ngau lho" vashao: wo"- ga: zag: hug' ako". **14** Ailao" Yesu wa loze re myao mung: ai: dao mae do; zaung: ra". **15** Ai wa Ziun vomo" we"- Dagaug- Ni" kho:kham pho" wa loze nau" dao mae zaung yang: joe" li" ra"- ga: jham: mug sug' mae tung" to" ru we' dakhyo: ngad: ra". **16** Yao" mho"zo: qe wa ce: khyo jham re ai: au: maba: gyo: ko" ngad: ra". Ngadqere: Yesu wa phung bao re qo" khae: yu lao" yao: bam wa ce: jham: dao: wa yao" khyo re ta" to" rure re:- Yao: bam wa yao" qhid' mae" ceru: kad' byid: ko" rure re:- dam: myid: beim" li" ako". **17** Lazaru re lab khug mae" khai: thug' yu yang:- shid: rumae" dau: li" nhao: ra" au:- Yesu we' daga" na ko" ra" mo,byu qe wa boe" lo: ra" khyo re ta" kyo" ako". **18** Aimung: mo,byu qe wa yao: re li" tug: yu: ako"- Pe"mung: ga" re yao: ce: mug' pho: ve, lho kad' ra" ga" rure yao: bam the' gyo: geyang: ngad: ra". **19** Ailao" Phari=she qe wa Ngo=nhaung" wa khoru: re: maaung longad: ra"- Qu" ge,- Mug: myid geim" yao" thao cao" byaug: avako"- ga: yao: cao: jho" ta" ako".

Greek Byumyu" Qe Yesu Re Qho Ko" Ra" Khyo

**20** Poe ba na gyo: mae caung: pa" nae" qhid' mae" Ye=ru=sa=lem khyo ye" lo" ko" ra" mo,phaung mae Greek byumyu" damyo" bobo: ako". **21** Yao: bam wa (Galile mung" mae" Bedsaida vobyu) Philip jhao" ye: mung:- Nhag' bo we"- Ngo=nhaung" wa Yesu re myao nug: ra"- ga: yeta" ako". **22** Ailao" Philip wa Andre re yeta" kyo: mung: yao: shid'zo: wa Yesu jhao" ye: yang: yeta" kyo" ako". **23** Yesu wa yao: shid' zo: re- Byu: Yao: Zo: phung bao qi: qo" khae: yu nae" yo, khyin: ana" joe" ava"- ga: tau" ra". **24** Nao=nhaung" re ngo dang za: ta" geli"- Jung: gaug ce' wa myid gaung mae ke' yang: nyhab' pye' ru maqhub' ngad: re wa dace' mae" je yang: gatau mamyo" li" ngad: ra". Nyhab' pye' ru qhub' ngad: re wa ashi: myo: sho' zai" li" ra". **25** Yao: yao" kaoso' re qhaung: ra" yaug wa kaoso' jeim: nae"- Ce: mug:myid dao mae yao: yao" kao so' re mabyag: ra" yaug kam" wa apyad ato: kaoso' re shaung: to" li" nae". **26** Ngo re caung da" nug: ra" yaug wa nga" thao cao" ca" ra"- Amung: ngo na: ra" jo, qo mae nga" dau dau yaug re: na: li" nae"- Nga" Pho" wa ngo re caung da" ra" yaug re phug' te' nga: yhe' li" nae".

Yao: Shid Kham: Nae" Khyo Yesu Ta" Ru

**27** Ana"- nga" nhag' lam: mae myid: qug: myid: ci" na: ra"- Ngo pe" ta" nae" i? Nga" Pho" we"- Ce: yo, qug nga" dao mae dajoe" li" nhao wa,- ein: ta" nae" laug i? Ngadqere: ngo ce: qug' khai: khyag' qhui: rure kham zo: nae" qhid' mae" joe" li" ru ngad: ra". **28** Nga" Pho" we"- Ni" mang re phung bao bao: li" nhao wa,- ga: ta" ra". Ailao" mug:gaung mae" thoe dathoe jhau: thug' li" mung:- Ngo phung bao bao nhao va"- Ana" re: ngo wa phung bao dam: bao nhao shinae"- ga: ta" ra". **29** Ai: mae ye; jo; ra" mo,byu qe wa ai: thoe re the' gyo: geyang:- yao: bam mae" damyo" wa Mug:dam: dam" ru ngad: ra" ga: ta" gemung:- damyo" wa Mug lagyo: yao: re dao: jhau: ru ngad: ra"- ga: ta" ako". **30** Yesu wa yao: bam re ce: dao: thoe wa nga" qhid' mae" jhau: thug' li" ru mangad:- Nao=nhaung" qhid' mae" ngad: ra". **31** Ce: mug:myid re dao: kho' ru wa ana" ngad: ava"- Ce: mug:myid dao: zug: pho" re ana" khe' thug' pye' ru qhub' naeva" myao:- **32** Ngo wa myid gaung mae" tau: to' to" ru qhub' lao"- ngo wa yaug khao: ngo" re- ngojhao" lao" yu nae"- ga: ta" ra". **33** (Ceru: ta" ru wa yao: wa shid; rure khoru: kham zo: nae" ga" rure ta" shid' ru ngad: ra") **34** Mo,byu qe wa Ngo=nhaung" nho: tarha" mae Meshia wa apyad ato dau: na: li" nae"- ga: ta" to" ra". Aire nao wa Byu: Yao: Zo: wa to' to" ru qhub' ca" ra"- ga: khoru:mung: qo" ta" i? Byu: Yao: Zo: wa khag' ngad: ra" i? ga: ta" ako". **35** Yesu wa yao: bam re- Ai: bo"bao wa nao=nhaung" phaung mae dazab myao" sho' na shizai ngad: ra"- Mug:cad' wa nao=nhaung" dao mae macad' nghoe' lo vashao:- Nao=nhaung" wa bo"bao qo" jo, shiko" au: re xo' su" na ge,- Pe"mung: ga"re mug: cad' khug mae su" lhau: ra" yaug wa yao: khokhyo ye" lo" na: rure maba ngad: ra". **36** Aimung: nao=nhaung" wa bo" bao: nho: zo:dau qe boe" genae" qhid' mae" nao=nhaung" wa bo"bao ajo; jo, shi" au: re ai: bo" bao re lam" ge,- ga: ta" ra".

Malam" Ko" Ra" Mo,Byu Qe

Cedao: re bin: ta" lao"- Yesu wa thug' lo" mung: yao: bam mae" phao: vho' lo" ra". **37** Yesu wa yao: bam: qhid' kheim: mae mug' pho: ve, lho jham ainho" kad' qhu" ngadqere: yao: bam wa yao: re malam" ko" ngad: ra". **38** Airu: malam" ko" ru wa Asang we"- Ngo=nhaung" ta" ra" mungdao: re khag' lam" ra" i? Asang wa

yao" qam: so' re khag' re qhu" byid' ra" i? ga: lapa Esaia ta" to" ru jab byang" li" nae" qhid' mae" ngad: ra". **39**-**40** Ai:tho' mago" Esaia wa yao: bam: myo,jid' mamyo geshao:- Yao: bam: nhag' lam: maba: gyo: geshao:- Ngo yao: bam re gai byid: nae" yao: bam ngo jhao" matug' lo geshao:- ga: Mao" So wa yao: bam: myo,jid' re jid nhao mung:- yao: bam: nhag' lam: rere: nhag' cad' cad' nhao: ra"- ga: Mao" So ta" ra"- ga: re: ta" to" ruyang yao: bam maqo" lam" ko" ngad: ra". **41** Esaia wa Yesu phungbao re the' myao yang: Yesu khyo we' sin: mung:- ceru: ta" ru ngad: ra". **42** Ailao" kheim: so' qo" ra" Yuda qe myo: sho' Yesu re Lam" ako". Ngadqere: yao: bam re Phari=she qe- yang Tarha" Jung Yham mae" phoe' pye' ru maqhug' nae" qhid' mae"- yao: bam wa aikhyo re de: de: za: mata" ko" ngad: ra". **43** Yao: bam wa Mao" So: yang caung: khin" ru tho' byu: yang caung: khin" rure je: o: ako".

Yesu Dao: Thoe: Yang Dao: Kho' Ru

**44** Yesu wa thoeqi: we' Ngo re lam" ra" yaug wa ngo re za: mangad:- Ngo re nhao: ke' ra" yaug rere: lam" yaug ngad: ra". **45** Aimung: ngo re myao: ra" yaug wa ngo re nhao: ke' ra" yaug rere: myao: ra". **46** Ngo re lam" ra" mo, alhab' wa mug: cad' yo mae mana: jo, nae" qhid' mae" ngo wa bo" bao khyo" ce: mug:myid dao khyo joe" li" va". **47** Nga" mung dao: re gyo" yu mung: maphug' cao" ra" yaug re wa ngo wa- yao: re dao: makho' nae". Ngo wa mug: myid byu qere dao: kho' nae" qhid' mae" joe' li" ru mangad:- Khyad' yu nae" qhid' mae" joe' li" ru ngad: ra". **48** Ngo re ha: pye' mung: nga" mung dao: re makhae: yu: ra" yaug re dao: kho' nae" dayaug na: ra". Amung: ngo ta" to" ra" dao: thoe wa lo" thao" ra" ba na mae yao: re dao: kho' ra" tarha" zug: ngad: li" nae" **49** Pe"mung: ga"re ngo wa ngoyao" akho: akhang" khyo" ta" ru mangad:- Ngo re nhao: ke' ra" Nga" Pho" wa ngo pe" ta" pe" jhau nae" rure ngo re amyin" byid' to" ra". **50** Yao" amyin" dao: wa apyad ato: kaos' re qo" nhao: rure ngo ba:. Aimung: ngo ta" ru wa Nga" Pho" yang ngo re ta" nhao: to" ra" gu: re ta" ru ngad:- ga: ta" ra".

Yesu Yao" Mho"Zo: Qe: Khyid Cid' Byid' Ru

**13:1** Ayo, wa Lai Co' Poe joe" nae" daba ca" shi" au: ngad: ra". Yesu wa ce: mug:myid dao mae" yao: Pho" jhao" phao: lo" nae" yo, khyin: joe" li" va" rure ba: ra". Yao: wa ce: mug:myid dao mae na: ra" yao" byu qere jhid' de, mung:- lo" thao" yo, joe" sho' yao: bam re jhid' de; ra". **2** Yesu we' yao" mho"zo: qe wa myi"xeim zo" na: ako". Ai: yui wa Simun Iskarud yao: zo: Yuda nho: nhag' lam: khug mae Yesu re ab byid: nae" qhid' mae" myid ke' to: byid' ava". **3** Yesu wa yao: Pho" yang yao: re kheim: so' alhab' ab byid' to: va" rure: yao: wa Mao" So mae" joe" li" mung: Mao" So jhao" dam: phao: lo" zai ngad: rure: ba: ra". **4** Aimung: yao: wa vae: zo: jaung: mae" to" yang: yao" adao: bau: qhang re khyad' pye' mung: pha,jad: yang yao" phyd' dam: re yag: ra". **5** Aithao Yesu wa jarung: dalam: mae qid vhe' ke' yang: mho"zo: qe: khyid re cid' byid; mung:- yao" phyd' dam: mae yag: ci: ra" pha, jad: yang sad' pye' byid' ra". **6** Simun Petru jhao" cid' joe" lo lao"- Petru wa Asang we"- Nao nga" khyid re cid' byid: nae" ein: i? ga: Yesu re myid' ra". **7** Yesu wa Petru re- Ngo pe" kad' na: rure ana" wa nao maba: gyo: ngad: ra". Ngadqere: thao phyao: nao ba: gyo" li" nae"- ga: tau" ra". **8** Ailao" Petru wa Nga" khyid re khonhae" re: nao maqo" cid' nae"- ga: ta" ra". Yesu wa Ni" khyid re ngo maqo" cid' ngad: re wa nao wa nga" mho"zo: mangad: lonae"- ga: ta" ra". **9** Ailao" Petru wa Asang we"- Nga" khyid reza: mangad:- Nga" lo. we' au: rere: cid' byid; la,- ga: phaug' tau" ra". **10** Yesu wa Gaung bin: cid' va" yaug wa gaung geim" san sin" va" rumung: yao" nho: khyid za: cid' qo: ra". Dayaug mae" je yang: nao=nhaung" alhab' mo, wa san sin" vako" ra"- ga: ta" ra". **11** (Yesu wa yao: re ab byid' pye' nae" yaug khag' ngad: rure ba: to: gau ngad: ruyang yao: wa dayaug mae" je yang: nao=nhaung" alhab' mo, wa san sin" vako" ra"- ga: ta" ru ngad: ra".) **12** Yesu wa mho"zo: qe: khyid re bin: cid' byid: thao re yao" nho: adao: bau: qhang dam: ve, mung:- yao" zaung jo,qo mae lo" dam: zaung: ra". Aimung: yao: wa Ana" shi" za: ngo nao=nhaung" re kad' ra" lo,mau" re nao=nhaung" ba: gyo: ko" i? **13** Nao=nhaung" wa ngo re Mho" Pho" we' Asang ga: mhang" ako"- Ngo re: ngad va" ruyang nao=nhaung" mhang" ko" ru wa jo: ra"- **14** Ngo wa nao=nhaung" nho: Asang we' Mho" Pho" ngad sho' qere: ngo lhao" re: nao=nhaung" khyid re cid' byid: va"- Aimung: nao=nhaung" re: nao=nhaung" yao: cao: khyid jho" cid' byid: gai: ra". **15** Nao=nhaung" re ngo kad' byid: va" ru we' dakhyo:- nao=nhaung" re: kad' genae" qhid' mae" ave, aso: qhu" to: byid: va". **16** Nao=nhaung" re ngo dang za: ta" geli"- Jeim wa yao" jeim sang tho' maje: qi: ngad: ra". Aimung: lagyo: re: yao: re nhao: ke' ra" yaug tho' maje: qi: ngad: ra". **17** Nao=nhaung" wa ce: dang man" rure ana" ba: avako". Aimung: nao=nhaung" aire phug' cao"

ko" ngad: re wa nao=nhaung" wa khoqhi" sho' ngau' lho" genae" i? **18** Ngo wa nao=nhaung' alhab' re ein: ta" na: ru mangad:- Ngo khyin: yu va" mo, re wa ngo ba: ra". Ngadqere: nga" zo re boca: zo" ra" yaug wa ngo re gye tug' kad' ra"- ga" ra" jham: dao: wa jab byang" li" ca" ra". **19** Airu: boe" li" lao"- ngo wa Ngo ga: yaug ngad: rure nao=nhaung" lam" genae" qhid' mae" ana" mabo" li" shimae" nao=nhaung" re ngo ta" kyo" to: va". **20** Nao=nhaung" re ngo dang za: ta" geli"- Ngo: yang nhao: ke' ra" yaug re lham: khae: yu: ra" yaug wa ngo rere: khae: yu yaug ngad: ra". Aimung: ngo re khae: yu: ra" yaug wa ngo re nhao: ke' ra" yaug re khae: yu yaug ngad: ra"- ga: ta" ra".

Yesu Yao: Ab: Pye' Qhug' Nae" Khyo Gau: Qhid' Khae" Yang: Ta" Ru

**21** Yesu wa cedao: re bin: ta" lao"- yao: wa gyai myid: ci" mung:- Nao=nhaung" re ngo dang za: ta" geli"- Nao=nhaung" mae" dayaug wa ngo re gyevo qe: lo, khyo ab byid' pye' naemyao:- ga: de: de: za: ta" ra". **22** Mho"zo: qe wa yao: khag' re ta" nug: rure maba: gyo: myid: mug' gemung:- yao: bam yao: cao: jho" qu" ako". **23** Ailao" Yesu jhid' de; ra" mho"zo: yaug wa Yesu we' te' te' zaung: jo; ra". **24** Simun Petru wa Yesu khag' re ta" na: rure myid: nae" qhid' mae" aiyaug re ave, byid' ke' ra". **25** Aimung: ai: mho"zo: wa Yesu jhao" te' te' qui" ye: yang:- Asang we"- Ai: yaug wa khag' ngad: ra" i? ga: myid' ra". **26** Ailao" Yesu wa mug dakhai" re xeim: qang: khug' mae jam yang: ngo byid' ra" yaug wa ai: yaug ngad: ra"- ga: tau" ra". Aimung: Yesu wa mug dakhai" re yu: yu mung: xeim: qang: khug' mae jam yang: Simun Iskarud yao: zo: Yuda re byid' ra". **27** Yuda wa ai: mug re bin: yu zo: we' Satan wa yao" khug khyo vao ye" ra". Aimung: Yesu wa Nao kad' ca" ra" mau" re phyad kad' wa,- ga: yao: re ta" ra". **28** Yesu wa Yuda re pe" mung: ceru: ta" rure vae: zo: jaung: mae zo" na mo, dayaug re: maba: gyo: ko" ngad: ra". **29** Yuda wa ngau' thaung zam: yaug ngad: ruyang Yesu wa yao: re poe mae ca" ra" zai yevai nae" we' myaung sho: mo, re daja: ja: yegae byid: nae" qhid' mae" ta" ke' ru ngad: ga: mho"zo: qe damyo" jho: ako".

Amyin" Dao: Asag'

**30** Yuda wa ai: mug dakhai" re yu zo: mung:- ailao" jao" taung gaung khyo thug' lo" ra". Ai: yo, khyin: wa myi" mug: cad' yo, ngad: ra". **31** Yuda bin: thug' lo" thao re Yesu wa Byu: Yao: Zo" nho: phung bao ana" bao: jo, va"- Byu: Yao: Zo: khyo" yang Mao" So: phung bao re: ana" bao: jo; ava". **32** Mao: So wa Byu: Yao: Zo: khyo" yang yao" phung bao bao va" ngad: re wa Mao" So wa yao: khyo" yang Byu: Yao: Zo" phung bao rere: bao nhao: li" nae". Yao: wa ana" yao: jao" bao nhao: li" nae". **33** Nga" jhid' de; ra" byin cao: qe we"- Ngo wa nao=nhaung" we' myao" sho' mana lonae"- Nao=nhaung" wa ngo re qho: li" genae"- Ngo lo" ra" jo, qo khyo nao=nhaung" maqo" ye: genae" ein:- kheim: so' qo" ra" Yuda byu qere ngo ta" va" ru we' dakhyo:- nao=nhaung" rere: ngo ta" ra". **34** Dayaug we'dayaug jho" jhid' de, ge,- Ngo nao=nhaung" re jhid' de; ru we' dakhyo:- nao=nhaung" yao: cao: re: jho" jhid' de, ca" ra". Ce: tarha" asag' ana" ngo nao=nhaung" re byid' ra". **35** Amung: nao=nhaung" yao: cao: jho" jhid' de, ko" ngad: re wa nao=nhaung" wa nga" mho"zo: qe ngad: rure yaug khao: ngo" ba: li" genae"- ga: ta" ra".

Yesu Re Petru Ha: Pye' Nae" Ru

**36** Ailao" Simun Petru wa Asang we"- Nao khai: khyo ye" lo" nae" i? ga: myid' ra". Yesu wa ngo ye" lo" ra" khyo re nao wa ana" maqo" cao" nae"- Ngadqere: thao phyao: wa nao nga" thao cao" li" nae"- ga: tau" ra". **37** Petru wa Asang we"- Ana" ngo ni" thao pe" mung: maqo" cao" zai i? Ngo wa ni" qhid' mae" shid nae" jin" jin" ngad:- ga: tau" ra". **38** Yesu wa- Nao wa gai gai: yao: nga" qhid' mae" shid nae" jin" jin" ngad: i? Nao re ngo dang za: ta" li"- Qo, mateim shi: re nao wa ngo re maba- ga: sam lhang ha: pye' li" nae"- ga: tau" ra".

Yesu Wa Yao: Pho" Jhao" Ye" Ra" Khyo Ngad:

**14:1** Yesu wa yao: bam re Nao=nhaung" nhag' lam: damyid: ci" ge,- Mao" So re lam" ge,- Ngo rere: lam" gela,- **2** Nga" Pho" yham mae na jo, qo myo: sho' jo; ra"- Nao=nhaung" qhid' mae" na jo, qo lo" nyhang" to: nae" qhid' mae" ngo lo" zai ngad: ra". Airu: mangad: re wa nao=nhaung" re ngo ceru: ta" nae" mangad:- **3** Ngo wa nao=nhaung" qhid' mae" na jo, qo lo" bin: nyhang" to: mung: ngo na: ra" jo, qo mae nao=nhaung"

qhug' na genae" qhid' mae" ngo dam: li" mung: nao=nhaung" re li" jhui" yu nae". **4** Ngo lo" nae" ra" jo, qo khyo joe" ra" khyodang re nao=nhaung" ba: ako"- ga: ta" ra". **5** Ailao" Thoma wa Asang we"- Nao khai: khyo ye" lo" nae" rure ngo=nhaung" maba- Khorumung: ngo=nhaung" wa khyodang re qo" ba nae" i? ga: myid' ra". **6** Yesu wa yao: re- Ngo wa khyodang ngad:- Dang man" ru we' kao so' re: ngad:- Ngo khyo" za: mangad: re wa Nga" Pho" jhao" khag' re: maqo" joe" ye: ngad: ra"- ga: tau" ra". **7** Yesu wa yao: bam re Nao=nhaung" wa ana" ngo re ba: avako"- Nga" Pho" rere: nao=nhaung" ba: li" genae". Aimung: ana" mae" thoegu: nao=nhaung" wa yao: re ba mung:- myao re: the' myao: avako"- ga: ta" ra". **8** Ailao" Philib wa Asang we"- Pho" re ngo=nhaung" re qhu" byid: la,- Ailao" wa ngo=nhaung" alhab' mo, nhag' dag naeva"- ga: Yesu re ta" ra". **9** Yesu wa Philib we"- Ngo wa nao=nhaung" we' daga" cemyhao" joe" sho' na: lo ngadqere: ngo re nao maba i? Ngo re myao: qu" va" yaug wa Pho" rere: myao: qu" va" yaug ngad: ra". **10** Philib we"- Ngo wa Pho" we' dadang: dalam: za: ngad mung:- Pho" re: ngo we' dadang" dalam: za: ngad: rure nao malam" i? ga: myid' ra". Yesu wa yao" mho"zo: qere Nao=nhaung" re ngo ta" kyo: va" mungdao: jham wa nga" mungdao: jham mangad:- Ngo we' dadang: dalam: za: ngad: ra" Pho" zai: so" ra" yao" mau" zo" ngad: ra". **11** Ngo wa Pho" mae Pho" wa nga" khug mae na: ein:- ngo ta" rure lam" ge,- Ngo ta" rure malam" gelao" re: ngo zai" ra" mau" zo" jham: mathao: yang lam" ge,- **12** Nao=nhaung" re ngo dang za: ta" geli"- Ngo re lam" ra" yaug wa ngo zai" ra" mau" zo" re qo" zai" li" nae". Pe"mung: ga"re ngo wa Pho" jhao" phao: lo" zai ngad: ra". **13** Yao:Zo: khyo" yang Pho" nho: phungbao bao: thug' li" nae" qhid' mae" nga" mang re lao: yang: nao=nhaung" mho' ra" gu: alhab' re ngo byid: nae" ngad: ra". **14** Nao=nhaung" nga" mang re lao: yang: ngo re pe" mho' gengad qere: nao=nhaung" re ngo byid: nae"- ga: ta" ra".

Gyang" Lho" Byo Nhao: Ke' Byid: Nae" Ga" Ra" Dao: So:

**15** Amung: nao=nhaung" ngo re jhid' de, ko" ngad: re wa nga" amyin" dao: jham re nao=nhaung" phug' cao" li" genae". **16** Ngo wa Pho" re mho' nae"- Ailao" yao: wa nao=nhaung" we' daga" apyad ato na nae" bao" thaug' yaug gatau dayaug re nao=nhaung" jhao" nhao" ke' byid' li" nae". **17** Ai:yaug wa Mao" So: nho: khyo re dang man" ra" khyo" qhu" byid' ra" dang man" ra" Byo ngad: ra". Mug:myid byu qe wa yao: re mamyo maba ko" ruyang maqo" khae: yu ko" ngad: ra". Ngadqere: ai: Byo wa nao=nhaung" we' daga" na mung:- nao=nhaung" nhag' lam: khug mae yena: jo; ruyang nao=nhaung" wa yao: re ba: ako". **18** Ngo phao: lo" lao"- nao=nhaung" reza: masho: majhin cug'zo: qere ru: nha: to: co' nae" mangad:- Nao=nhaung" jhao" ngo dam: li" nae". **19** Dazab zo: ngad lao" mug:myid byu qe wa ngo re mathe' myao lo: genae". Ngadqere: nao=nhaung" wa ngo re the' myao genae"- Pe"mung: ga"re ngo wa dau: na: ruyang nao=nhaung" wa dau: na: li" genae". **20** Ai: ba na joe" lo lao"- ngo wa nga" Pho" we' dadang: dalam: za: ngad mung:- ngo wa nao=nhaung" we' dadang: dalam: za: ngad: ru we' dakhyo:- nao=nhaung" re: ngo we' dadang: dalam: za: ngad: rure nao=nhaung" ba: li" genae". **21** Nga" amyin" dao: jham re khae: yu mung: phug' cao" ra" yaug wa ngo re jhid' de; ra" yaug ngad: ra". Ngo re jhid' de; ra" yaug khag' rere: nga" Pho" yang yao: re jhid' de; li" nae". Ngo re: yao: re jhid' de, mung:- yao: re ngoyao" gaung qhu" byid: nae"- ga: ta" ra". **22** (Yuda Iskarud mangad: yaug) Yuda wa Asang we"- Nao=yao" gaung re mug: myid byu qere maqhu" byid: lo:- ngo=nhaung" re naoyao" gaung qhu" byid: nae" ru wa khoru: gai: boe" nae" i? ga: myid' ra". **23** Yesu wa ngo re jhid' de; ra" yaug khag' ngadqere: nga" mho" shid' dao: re phug' cao" li" nae". Pho" wa yao: re jhid' de; li" nae". Ailao" nga" Pho" we' ngo wa yao: jhao" li" mung: yao: we' daga" na zai ngad: ra". **24** Ngo re majhid' de; ra" yaug khag' ngadqere: nga" mho" dao: re maphug' cao" ngad: ra". Nao=nhaung" the' gyo: vako" ra" mho" shid' dao: wa nga" mho" shid' dao: mangad:- Ngo re nhao: ke' ra" Pho" nho: mho" shid' dao: ngad: ra". **25** Ngo nao=nhaung" we' daga" na shi" au: mae" cegu: re ngo nao=nhaung" re ta" kyo" to: va". **26** Pho" yang nga" mang mae nhao: ke' byid: nae" ra" ai: bao" thaug' yaug Gyang" Lho" Byo wa nao=nhaung" re ja: khao: ngo" mho" byid: mung:- nao=nhaung" re ngo ta" to" ra" dao: alhab' re myid: beim: nhao: li" nae". **27** Ngo wa nao=nhaung" re yaug yo: ru to: byid: co'. Nga" nho: yaug yo: ruyao: ngo nao=nhaung" re byid'. Mug:myid: yang byid' ruru: ngo byid' ru mangad:- Nao=nhaung" nhag' lam: damyid: ci" ge,- Gyaug re: dagyaug ge,- **28** Ngo wa phao: lo" nae"- Ngadqere: nao=nhaung" jhao" ngo dam: li" nae"- ein: nao=nhaung" re ngo ta" to" ra" dao: re nao=nhaung" the' gyo" avako". Nao=nhaung" ngo re jhid'de, ko" ngad: re wa Pho" jhao" ngo phao: lo" rure nao=nhaung" bau: gezai ngad: ra"- Pe"mung: ga"re yao: wa ngo tho' je: qi: yaug ngad: ra". **29** Airu: boe" li" lao"- nao=nhaung" wa ngo re lam" genae" qhid' mae" ai:gu: mabo"e" li" shima"e" nao=nhaung" re ngo ta" kyo" to:

va". **30** Ngo wa nao=nhaung" we' dao: myao" sho' maqo" jhau lonae" ngad: ra". Pe" mung: ga" re ce: mug:myid: zug: pho" wa joe" li" na: ava"- Yao: wa ngo re eib nae" qam: so' bo nae" mangad:- **31** Ngadqere: Pho" re ngo jhid' de; rure mug:myid byu qe ba ca". Ai: mathao mae ngo wa yao" yang amyin" byid' to" ru we' dakhyo:- ja: khao: ngo" re ngo zau" ra". Sage,- Cejo, qo mae" ye" lo" gelang: se,- ga: yao: re ta" ra".

Yesu Wa Sabyi Naui Agyang" Ngad:

**15:1** Yesu wa Ngo wa sabyi naui agyang" ngad:- Amung: nga" Pho" wa khyae mau" zau: yaug ngad: ra". **2** Yao: wa ngo mae ashi: mazau" ra" akaung khao: ngo" re cu: pye' mung:- ashi: zau" ra" akaung khao: ngo" re wa ashi: je: zau" li" nae" qhid' mae" sho' pye' byid' ra". **3** Nao=nhaung" wa ngo kho" kyo: byid: va" mung dao: khyo" yang gyao: gyao: za: ngad: avako". **4** Ngo we' xo' de; jo, ge,- Ngo re: nao=nhaung" we' xo' de; jo, nae". Sabyi kaung wa sabyi naui dai we' maxo' made, lo: yao: za: ashi: maqo" zau" ru we' dakhyo:- nao=nhaung" re: ngo we' maxo' made, re wa nao=nhaung" yao: za: ashi: maqo" zau: ko" ngad: ra". **5** Ngo wa sabyi naui dai ngad:- Aimung: nao=nhaung" wa sabyi akaung jham ngad: ako". Ngo we' xo' de; jo; ra" yaug khag' ngadqere: ngo re: yao: we' xo' de; jo, mung:- yao: wa ashi: myo: sho' zau" li" li" nae". Pe"mung: ga"re ngo we' gao: yang: nao=nhaung" pe" re: maqo" kad' ko" ngad: ra". **6** Ngo we' maxo' made; jo; ra" yaug khag' ngadqere: akaung re we' dakhyo:- shapye' pye' ru qhug' mung: kyaug' lo" ra". Airu" ra" akaung jham re wa su: yang li" gag: vo; yu mung:- myikhyeim" mae pye' zau: ngha" pye' ako". **7** Nao=nhaung" wa ngo we' xo' de; jo, mung: nga" mung dao: re: nao=nhaung" khug mae bo: jo; ngad: re wa nao=nhaung" o: ra" ja: pe" mho' gengad yang: re: qo" yu: li" genae". **8** Nao=nhaung" ashi: myo: sho' zau" ra" khyo" yang nga" Pho" nho: phungbao bao: thug' li" ra". Cekhyo" yang nao=nhaung" wa nga" mho"zo: boe' lo: ako". **9** Pho" wa ngo re jhid' de; ru we' dakhyo:- ngo re: nao=nhaung" re jhid' de; ra". Nga" jhid' de, myid mae zaug: jo, ge,- **10** Ngo wa nga" Pho" nho: amyin" dao: jham re phug' cao" mung:- yao" jhid' de, myid mae zaug: jo; ru we' dakhyo:- nao=nhaung" re: nga" amyin" dao: jham re phug' cao" ko" ngad: re wa nao=nhaung" wa nga" jhid' de, myid mae zaug: jo; li" genae". **11** Nga" ngau" bau" ru wa nao=nhaung" mae bo: jo, mung:- nao=nhaung" ngau" bau" ru byang" li" nae" qhid' mae" ngo nao=nhaung" re cedao: ta" ru ngad: ra". **12** Nao=nhaung" re ngo jhid' de; ru we' dakhyo:- nao=nhaung" re: dayaug we' dayaug jho" jhid' de; na ge,- Ce wa nga" amyin" dao: ngad: ra". **13** Yao" banam qe: qhid' mae" yao: yao" kaoso' re dan: pye' sho' jhid'de; ru wa qi" thao" ra" jhid' de, myid ngad: ra". **14** Nao=nhaung" re ngo amyin" byid' ru we' dakhyo:- nao=nhaung" kad' ko" ngad: re nao=nhaung" wa nga" ba nam qe ngad: ako". **15** Ana" mae" thoe gu: ngo wa nao=nhaung" re jeim qe ein: mamhang" lonae"- Pe"mung: ga"re dau" dau" yaug wa asang kad' ra" mau" re maba ngad: ra". Ai: atha" ngo nao=nhaung" re banam qe ein: amhang" lonae"- Pe"mung: ga"re nga" Pho" mae" ngo the' gyo" yu: ra" gu: alhab' re ngo nao=nhaung" re ta" kyo: va". **16** Nao=nhaung" wa ngo re khyin: yu ko" ru mangad:- Ngo yaug lam: nao=nhaung" re khyin: yu: ru ngad: ra". Nao=nhaung" thug' ye" lo" mung: gang" tang: ra" ashi: myo: sho' zau" jo, genae" qhid' mae" nao=nhaung" re ngo khyin: san: to" ru ngad: ra". Aimung: nga" mang re lao: yang: nao=nhaung" yao: re pe" ja: mho' gengadqere: Pho" wa nao=nhaung" re byid' li" nae". **17** Nao=nhaung" yao: cao: jho" jhid' de; na ge,- ein: ce: amyin" dao: ngo nao=nhaung" re byid' ra".

Mug:myid: Yang Nghan" Ru

**18** Mug:myid: yang nao=nhaung" re nghan: ko" re wa ai wa ngo re shi" saoqhid' nghan: va" rure nao=nhaung" myid: beim: ge,- **19** Nao=nhaung" wa mug:myid dao we' sin" ra" mo, ngad ko" re wa mug:myid wa yao: yao" banam ug zo: qere we' dakhyo:- nao=nhaung" re jhid' de; li" genae". Ngadqere: ngo wa nao=nhaung" re ce: mug:myid dao mae" khyin: yu mung:- nao=nhaung" wa ce: mug:myid dao we' masin: ko" ngad: ra". Ce: mathao: yang mug:myid wa nao=nhaung" re nghan" ra". **20** Jeim wa- yao" asang tho' maje: qi: ngad: ra" ein: nao=nhaung" re ngo ta" rure myid: beim: ge,- Yao: bam ngore yhin" ko" re wa yao: bam wa nao=nhaung" rere: yhin" li" genae". Amung: yao: bam nga" mho" shid' dao: re tae" gyo: ko" ngad: re wa nao=nhaung" mho" shid' dao: rere: tae" gyo" li" genae". **21** Nao=nhaung" wa nga" byu qe ngad ko" ruyang yao: bam wa nao=nhaung" re airu: kad' li" genae". Pe"mung: ga"re yao: bam wa ngo re nhao: ke' ra" yaug re maba yang: ngad: ako". **22** Yao: bam re ngo mali" kho" kyo: byid: ngad: re yao: bam wa qobo maqo" genae"- Ana" wa yao: bam: qobo loe, khyo ta" pye' nae" khyo mabung" lo: gengad: ra". **23** Ngo re nghan" ra" yaug khag' ngadqere: nga" Pho" rere: nghan" ra". **24** Yao: bam: phaung mae su gaje khag' re: makad' qu" ra" mau"



re ngo makad' lo: ngad: re wa yao: bam qobo qo" nae" mangad:- Ana" wa ngo kad' ra" mau" re yao: bam the' myao: yu: avako". Ngadqere: ngo rere:- nga" Pho" rere: yao: bam nhang" ako". **25** Ngadqere: ce wa pe" yug: mabo: rumae yao: bam ngo re nhang: ko" ra"- ga: yao: bam: Tarha" mae tung" to" ra" jham: dao: jab byang" li" nae" qhid' mae" ngad: ra". **26** Mao" So wa dang man" ra" khyo re qhu" byid' ra". Ai: Bao" Thaug' Yaug ga" ra" Byo wa Pho" mae" joe" li" zai ngad: ra". Ngo wa yao: re Pho" mae" nhao: ke' nae"- Ailao" yao: wa nga" khyo re sagse: li" kham byid' li" nae". **27** Nao=nhaung" wa sao qhid' mae" ngo we' daga" na: lo vako" rumung:- nao=nhaung" re: nga" khyo re sagse: kham byid' li" genae".

**16:1** Nao=nhaung" lam khug: myid mabyo; lo" genae" qhid' mae" ngo wa nao=nhaung" re cegu: ta" to: va". **2** Nao=nhaung" wa Tarha" Jung Yham jham mae" khe' thug' pye' ru qhug' li" genae". Aimung: nao=nhaung" re se' ra" yaug wa yao: nao=nhaung" re se' ru wa Mao" So: mau" re vin vo; na: ru ngad: ga:- myid: jho: yu nae" ra" ba na joe" lo: li" nae". **3** Yao: bam wa Pho" rere: maba ko" ruyang nao=nhaung" re airu: kad' li" genae". **4** Ngadqere: airu: kad' nae" yao: bam: ba na joe" lo lao" nao=nhaung" wa ngo ta" to" rure myid: beim: genae" qhid' mae" ngo nao=nhaung" re cedao: ta" to: byid: va".

Gyang" Lho" Byo: Mau" Zo"

Qhid' phyao: wa ngo nao=nhaung" we' daga" za: na: jo, shiyang: aijham re ngo mata" kyo" qu"- **5** Ana" kam" wa ngo re nhao: ke' ra" yaug jhao" ngo phao: lo" zai ngad: ra". Ngadqere: ngo khokhyo phao: lo" nae" rure nao=nhaung" mae" khag' re: ngo re mamyd: ko" ngad: ra". **6** Ana" wa ngo nao=nhaung" re ta" kyo: va" rumung: nao=nhaung" nhag' lam: khug mae nhag' kaug' ru byang" sheim: jo; avako". **7** Ngadqere: nao=nhaung" re ngo dang za: ta" geli"- Ngo phao: lo" ru wa nao=nhaung" qhid' mae" je: gai: ra". Pe" mung: ga" re ngo maphao: lo" re wa ai: Bao" Thaug' Yaug re: nao=nhaung" jhao" joe" li" nae" mangad:. Ngadqere: ngo phao: lo" lao" kam" wa ai: Bao" Thaug' Yaug re nao=nhaung" jhao" ngo lo" nhao: ke' byid: nae". **8** Ai: Bao" Thaug' Yaug joe" li" lao"- yao: wa mug:myid byu qere qobo we' sin: yang: yao: bam myid: shad' ra" khyo rere:- Din: man" ra" khyo rere:- Mao" So: dao: kho' ra" khyo rere:- li" ceim" shid' byid' li" nae". **9** Yao: bam: qobo we' sin: yang: shad' ko" ru wa yao: bam wa ngo re malam" geyang: ngad: ako". **10** Yao: bam din: man" ru we' sin: yang: yao: bam shad' ko" ru wa- ngo wa Pho" jhao" lo" nae" ngad mung:- nao=nhaung" ngo re mamyao lonae" ngad: ruyang ngad: ra". **11** Dao: kho' ru we' sin: yang: yao: bam shad' ko" ru wa ce: mug:myid dao: zug: pho" wa dao: kho' ru qhug' va" ruyang ngad: ra". **12** Nao=nhaung" re ngo ta" nae" khyo myo: sho' jo, shi"- Ngadqere: ana" nao=nhaung" aire maqo" khae: yu shiko" ngad: ra". **13** Ngadqere: Mao" So: dang man" ra" khyo re qhu" byid' ra" ai: Byo joe" li" lao"- yao: wa dang man" ra" khyo alhab' khyo nao=nhaung" re jhui" ye" li" nae". Yao: wa yao: yao" kheim: so' khyo" majhau nae"- Yao: wa yao: the' gyo" ra" gu: re jhau mung:- thao phyao: boe" li" nae" ra" khyo jham nao=nhaung" re ta" kyo" li" nae". **14** Yao: wa nga" mungdao: re gaug: yu yang: nao=nhaung" re ta" kyo" li" nae"- Aimung: yao: wa nga" phung bao re bao: thug' li" nhao nae". **15** Nga" Pho" qo" ra" gu: alhab' wa nga" mae" ngad: ra". Aimung: ai: Byo wa nga" mungdao: re gaug: yu mung: nao=nhaung" re ta" kyo" li" nae"- ein: ngo ta" ru ngad: ra".

Nhag' Kaug' Ru We' Ngau Bau" Ru

**16** Dazab zo: ngad lao"- nao=nhaung" wa ngo re mamyao lo: genae". Amung: dazab kyo thao re nao=nhaung" wa ngo re dam: myao: li" genae"- ga: ta" ra". **17** Yao" mho"zo: qemae" damyo" wa dazab zo: ngad lao" yao: re mamyao lo: genae"- Amung: dazab zo: kyo thao re ngo=nhaung" yao: re dam: myao genae"- ga: yao: ngo=nhaung" re ta" ra". Ai wa- Pho" jhao" ngo lo" yang: ngad: ra"- ga: re: yao: ngo=nhaung" re ta" ra". Ceru wa pe" re ta" nug: laug i? ga: yao: bam yao: cao: jho" myid' ako". **18** Dazab zo: ngad lao"- ga" ru wa pe" re ta" nug: ru laug i? Yao: pe" ja" khyo re ta" na: rure ngo=nhaung" maba: gyo: ga: jho" ta" ako". **19** Yesu yao" mho"zo: qe yao: re dao:myid: myid; nug ko" rure ba mung: yao: bam re- Nao=nhaung" yao: cao: jho" myid' na ko" ru wa dazab zo: ngad lao"- nao=nhaung" ngo re mamyao lo: genae"- Amung: dazab zo: kyo thao re nao=nhaung" ngo re dam: myao: li" genae"- ein: nao=nhaung" re ngo ta" ra" khyo mangad: i? **20** Nao=nhaung" re ngo dang za: ta" geli"- Nao=nhaung" wa ngugbyid ngugnhe' we' kaug' ngug: li" genae"- Ngadqere: mug:myid byu qe wa ngau bau" li" genae"- Nao=nhaung" wa kaug' li" genae"- Ngadqere: nao=nhaung" kaug' ru wa ngau bau: ngau lho" ru dam: tha" lo" li" nae". **21** Myiqe: dayaug wa zokhau nae"

ba na loe" lao"- zokhau no no: rure kham zo: nae" yo, qug joe" lo yang: nhag' kaug' nhag' ngai: ra". Ngadqere: zo: bin: kham lao"- ce: mug:myid dao khyo zonau" dayaug re qo" myhung: ke' va" ruyang ngau bau: mung: yao: kham zo" lo: ra" zokhau no re yao: to"myhid' pye' ra". **22** Ai we' dakhyo: nao=nhaung" re: ana" wa kaug' na: ako". Ngadqere: ngo wa nao=nhaung" we' dam: jho" myao mung: nao=nhaung" nhag' lam: wa ngau bau: ngau lho" ru byang" sheim: jo; li" genae". Ai: ngau bau: ngau lho" rure khag' re: nao=nhaung" mae" maqo" yu: pye' byid: genae". **23** Ai: ba na joe" lo lao"- nao=nhaung" wa ngo re pe" re: mho' lo: genae" mangad:- Nao=nhaung" re ngo dang za: ta" geli"- Nao=nhaung" wa nga" mang re lao: yang: yao: re pe" mho' gengadqere: Pho" wa nao=nhaung" re byid' li" nae". **24** Ana" joe" sho' nga" mang re lao: yang: nao=nhaung" wa pe" daja: re: mamho' shiko" ngad: ra"- Nao=nhaung" ngau bau" ru jab byang"li" nae" qhid' mae" mho' ge,- Mho' ru we' dakhyo: qo" khae: yu: li" genae".

Mug: Myid Re Aung: Pye' Ru

**25** Cegu: re ngo wa nao=nhaung" re dao: tau" khyo" ta" kyo" ru ngad: ra"- Dao: tau" khyo" mangad: lo: Pho" khyo re de: de: za: nao=nhaung" re ta" kyo: nae" ra" ba na joe" lo: li" ne". **26** Ai: ba na joe" lo lao"- nao=nhaung" wa nga" mang re lao: yang: yao: re mho' li" genae". Ngadqere: nao=nhaung" gaung tha" Pho" re ngo mho' byid: nae"- ein: ngo ta" to" ru mangad: **27** Pe"mung: ga"re Pho" yao: yao: re: nao=nhaung" re jhid'de; ra". Nao=nhaung" wa ngo re jhid' de, ko" ru we' ngo wa Mao" So mae" joe" li" yaug ngad: rure nao=nhaung" lam" vako" ru: yang yao: wa nao=nhaung" re jhid' de; ru ngad: ra". **28** Ngo wa Pho" mae" ce: mug:myid dao khyo joe" li" ru ngad: ra". Aimung: ana" ngo wa ce: mug:myid dao mae" thug' lo" yang: Pho" jhao" dam: phao: lo" zai ngad: ra". **29** Ailao" yao" mho"zo: qe wa Yesu re- ana" wa dao: tau" maci lo:- de: de: za: nao ta" na: ava"- **30** Nao wa ja: khae: ngo" alhab' re ba yaug ngad: rure ana" ngo=nhaung" ba va". Nao re khag' yang re: dao: myid: mamyid: ca" lo: ngad: ra". Aimung: nao wa Mao" So mae" joe" li" yaug ngad: rure ngo=nhaung" lam" va"- ga: ta" ako". **31** Yesu wa yao: bam re- Ana" nao=nhaung" lam" vako" i? **32** Nao=nhaung" alhab' mo, wa yao: yao" yham khyo phao: byo: sin" lo" gemung: ngo re nao=nhaung" alhab' yang phao: cug' to: co' li" genae" ra" ba na joe" lo: li" nae". Ana" lhao" joe" jo; ava". Ngadqere: ngo wa gai gai: ngoyao: za: mangad:- Pe"mung: ga"re Pho" wa ngo we' daga" na: ra". **33** Nao=nhaung" wa ngo we' dadang: dalam: za: ngad: na: ra" khyo" yang ngau pyo: yaug yo: rure nao=nhaung" qo" yu genae" qhid' mae" ngo nao=nhaung" re ce: dao: ta" ru ngad: ra". Nao=nhaung" wa mug:myid dao mae khyag' qhui: ru kham zo: qo: li" genae"- Ngadqere: nhag'lam: dagyug: ge,- Ngo wa ce: mug:myid re aung: pye' va"- ga: ta" ra".

Yesu Yao" Mho"Zo: Qe: Qhid' Mae" Akyu" Mho' Ru

**17:1** Yesu wa cedao: jham re bin: ta" lao"- mug:gaung khyo tau: qu" mung:- Nga"Pho" we"- yo,qug joe" lo: ava". Yao: zo: wa Yao: Pho" re phung bao byid: nae" qhid' mae" ni" zo: re phung bao byid: wa, **2** Pe" mung: ga" re yao: zo: re nao byid' to" ra" mo, alhab' re apyad ato: kaos'o' qo" byid: nae" qhid' mae" nao wa yao: re xao su byu alhab' mo; dao mae eib: ra" kheim: so' byid' to" ava". **3** Apyad ato: kaos'o' ga" ru wa date: za: ngad: ra" dangman" ra" Mao" So re ba: ru we' nao: yang nhao: ke' ra" Yesu Khristu re ba: ru ngad: ra". **4** Nao ngo re kad' nhao: ra" mau" zo" re ngo bin: zai: va". Aimung: mug:myid dao mae ni" phung bao re bin: qhu" byid: va". **5** Nga"Pho" we"- Mug:myid re maphan" shima" ngo nao we' daga" qo" to" ra" phung bao re ni" qhid' kheim: mae ana" ngo re byid: la,- **6** Mug:myid dao mae" nao: yang ngo re ab byid' to" ra" mo, nao re ba gesho' ngo qhu" byid: va". Nao wa yao: bam re sang mung: yao: bam re nao ngo re byid' to" ra". Yao: bam wa ni" mung dao: re phug' cao" avako". **7** Aimung: yao: bam wa nao: yang ngo re byid' ra" gu:- ja: khae: ngo" nao mae" thug' li" ru ngad: rure ana" yao: bam ba: avako". **8** Nao: yang ngo re byid' to" ra" mung dao: re ngo wa yao: bam rere: ai: mung dao: byid: mung:- yao: bam wa ai: mung dao: re khae: yu: ako". Ngo wa nao mae" joe" li" yaug ngad: ru dang: rure re:- yao: bam lam" ako". **9** Ngo wa yao: bam: qhid' mae" akyu" mho' ra". Ngo wa mug: myid byu qe: qhid' mae" akyu" mamho'. Ngadqere: ngo re ab byid' to" ra" mo; qhid' mae" ngo akyu" mho' ra". Pe"mung: ga"re yao: bam wa nao sang: ra" mo, ngad: ako". **10** Ailao" ngo qo" ra" gu: alhab' ni" mae" ngad mung:- nao qo" ra" gu: alhab' re: nga" mae" ngad: ra". Yao: bam: mathao mae nga" phung bao bao: li" ra". **11** Ana" ngo wa nao jhao" phao: lo nae" ngad mung:- mug:myid dao mae mana lonae"- Ngadqere: yao: bam wa mug:myid dao mae na: jo, gezai ngad: ra". Gyang" lho" ra" Pho" we"- nao we' ngo wa dadang: dalam: za: ngad: ru we' dakhyo:- yao: bam re: dadang: dalam: za: ngad genae" qhid' mae" nao ngo re byid' ra" ni"

mang qam: so' khyo" yang yao: bam re gug: gam byid: wa,- **12** Ngo wa yao: bam we' daga" na shi" au:- nao ngo re byid' to" ra" ni" mang qam: so' khyo" yang yao: bam re ngo gug: gam byid: va". Ngo wa yao: bam re gug: gam byid' lo va" ruyang jham: mugsug' jab byang" li" nae" qhid' mae" byaug: jeim" lo" ca" ra" dayaug mae" je yang: yao: bam mae" dayaug re: mabyaug: jeim" lo" gengad: ra". **13** Ngo wa ana" nao jhao" phao: lo zai ngad: ra". Amung: yao: bam wa nga" ngau bau" rure yao: bam: nhag' lam: khug mae byang" sho' qo" yu genae" qhid' mae" mug:myid dao na shi" au: re cedao: jham re ngo ta" ra". **14** Ngo wa yao: bam re ni" mung dao: byid' ra". Ngo wa mug:myid we' sin" ra" yaug mangad' ru we' dakhyo:- yao: bam re:- mug:myid we' sin" ra" mo, mangad: ko" ruyang mug:myid wa yao: bam re nghan" ra". **15** Yao: bam re mug:myid dao mae" jhui" yu nae" qhid' mae" ngo mamho'- Ngadqere: ai: makhyang" ra" yaug: lo, mae" yao: bam re gug: gam zam: so: byid: nae" qhid' mae" ngo nao re mho' ra". **16** Ngo wa mug:myid we' sin" ra" yaug mangad' ru we' dakhyo:- yao: bam re: mug:myid we' sin" ra" mo, mangad: ko" ngad: ra". **17** Dangman" ru khyo" yang yao: bam re naoyao" qhid' mae" kyang" san: yu: to: wa,- Ni" mungdao: wa dangman" ru ngad: ra". **18** Nao wa ngo re mug:myid khyo nhao: ke' ru we' dakhyo:- ngo re: yao: bam re mug:myid khyo nhao: ke' va". **19** Yao: bam re dang za: ni" qhid' mae" kyang" san: to" ra" mo, boe" li" genae" qhid' mae" ngoyao" gaung re ngo kyang" san: to: va". **20** Ngo wa yao: bam: qhid' mae" za: akyu" mho' ru mangad:- Yao: bam kho" kyo" ra" mungdao: khyo" yang ngo re lam" lo ko" ra" mo; qhid' mae" re:- mho' ra". **21** Yao: bam wa dadang: dalam; za: boe" genae" qhid' mae" ngo akyu" mho' ra". Nga" Pho" we"- Nao wa ngo we' dadang: dalam: za: ngad mung:- ngo re: nao we' dadang: dalam: za: ngad: ru we' dakhyo:- yao: bam rere: nga" shid' pha: we' dadang: dalam: za: boe" nhao wa,- Ngo wa nao: yang nhao: ke' yaug ngad: rure mug:myid byu qe lam" nae" qhid' mae" yao: bam re dadang: dalam: za: boe" nhao la,- **22** Nao we' ngo wa dadang: dalam: za: ngad: ru we' dakhyo:- yao: bam re: dadang: dalam: za: ngad genae" qhid' mae" nao: yang byid' to" ra" phung bao reyao: ngo wa yao: bam re byid: va". **23** Ngo wa yao: bam we' dadang: dalam: za: ngad mung:- nao wa ngo we' dadang: dalam: za: ngad: ruyang yao: bam wa jab byang" sho' dadang: dalam: za: boe" li" mung:- ngo wa nao: yang nhao: ke" ru ngad: rure we' nao wa ngo re jhid'de; ru we' dakhyo:- yao: bam re nao jhid' de; rure mug:myid wa ba nae" ngad: ra". **24** Pho" we" Nao wa yao: bam re nga" lo, mae ab byid' to" ava". Nao ngo re byid' to" ra" phung bao re yao: bam qu" myao genae" qhid' mae" ngo na: ra" jo, qo mae yao: bam ngo we' daga" qo" na: jo, nae" rure ngo o: ra". Pe"mung: ga"re mug:myid re maphan" shimae" nao ngo re jhid'de; ra". **25** Din: man" ra" Pho" we' mug:myid byu qe wa nao re maba gengadqere: ngo wa nao re ba: ra". Aimung: nao: yang ngo re nhao: ke' rure cebam ba: ako". **26** Nao ngore jhid' de; ra" jhid' de, myid wa yao: bam: khug mae bo: jo, mung:- ngo re: yao: bam: khug mae qo" bo: jo, nae" qhid' mae" ngo wa ni" khyo re yao: bam re ba nhao va"- Xo' yang: re: ba nhao shinae" ngad: ra"- ga: mho' ta" ra".

## Yesu Re Taung: Ko" Ra" Khyo

**18:1** Yesu wa airu: akyu" bin: mho' thao re yao" mho"zo: qe we' daga" ai: jo,qo mae" thug' ye" lo" mung:- Kidron qid gyaung: zo: thoete' khyo gau" de; ye" lo" ra". Aimaie khyae dalam: jo; ra". Yesu we' yao" mho"zo: qe wa ai: khyae khug khyo vao ye" ako". **2** Yesu we' yao" mho"zo: qe wa ai: jo, qo khyo myo: sho' lhang lhaung" ye" qu" vako" ruyang yao: re ab byid' pye' nae" yaug Yuda wa ai: jo,qo re ba: ra". **3** Aimung: Yuda wa Roma gyezo: daphung: we'- khinjaung qi: qe we' Pharishe qeyang nhao: ke' ra" Caung: Pa" Yham gug: gam gyezo: damyo" rere: jhui" li" ra". Yao: bam wa myibaung:- myidam jham we' shae lhae ci yang: ai: jo, qo khyo li" ako". **4** Yesu wa yao: mae boe" li" na: ra" khyo alhab' re ba mung: yao: wa qhid' au: khyo qui" ye: yang:- Nao=nhaung" khag' re qho: na ko" i? ga: yao: bam re myid' ra". **5** Yao: bam wa Nazaret mae" Yesu re qho: na: ga: tau" ako". Ailao" Yesu wa Aiyaug wa ngo ngad va"- ga: tau" ra". Yao: re ab byid' pye' nae"yaug Yuda wa yao: bam we' daga" aimae ye; jo; ra". **6** Yesu wa yao: bam re Ngo wa aiyaug ngad va"- ga: tau" ke' lao"- yao: bam wa naung zad: zad' lo" mung: myid gaung khyo gyang: lang" lo" ako". **7** Yesu wa yao: bam re Nao=nhaung" khag' re qho: na ko" i? ga: dam: myid' ke' ra". Yao: bam wa Nazaret mae" Yesu re qho: na: ga: dam: phaug' tau" ako". **8** Ailao" Yesu wa Aiyaug wa ngo ngad va: ein: nao=nhaung" re ta" va". Aimung: nao=nhaung" ngore qho: na ko" ru ngad: re wa ce: gatau qegu: wa phao: lo" vageshao: ga: ta" ra". **9** (Yao: ceru: ta" ru wa Pho" we"- Nao: yang ngo re ab byid' to" ra" mo, mae" dayaug re lhao" re:- ngo maci: phyaug'- ga: ta" to" ra" dao: jab byang" li" nae" qhid' mae" ta" ru ngad: ra".) **10** Simun Petru wa shae dakhyae: vin: ci mung:- she: yu yang: khinjaung yin" nho: jeim pho" dayaug re shaqam" ke' re ai: jeim pho" nho: lo, yo shad'

nokhye' qam" phyd' khyo" ke' byid' ra". Ai: Jeim pho" mang wa Malakhu ngad: ra". **11** Yesu wa Petru re Ni" shae re shae byao mae dam: ke' to: wa,- Ngo wa nga" Pho" yang byid' to" ra" ai: dayin dayo: khyag' qhui: ra" keim re mashaug' li" nae" ein: nao jho: i? ga: ta" ra".

Anna Qhid' Kheim: Khyo Yesu Joe" Ye" Ru

**12** Aithao re Roma gyezo: qe we' yao: bam: gyezug: pho" we' Yuda gug: gam gyezo: qe wa Yesu re taung" yu mung: tau: yang:- **13** Anna jhao" sao qhid' jhui" ye" ako". Anna wa ai: zin mae khinjaung yin" kad' na: ra" Kayapha nho: yang pho" ngad: ra". **14** Amung: Kayapha wa byu alhab' mo; qhid' mae" byu dayaug za:shid: ru wa je: gai: ra"- ga: kheim: so' qo" ra" Yuda qere pha, jhi" byid' ra" yang ngad: ra".

Yesu Re Petru Ha: Pye' Ru

**15** Simun Petru we' gatau: mho"zo: dayaug wa Yesu thao cao" ye" ako". Gatau: mho"zo: yang wa khinjaung yin" we' jho" se" mung: khinjaung yin" yham mo" vang" khug khyo Yesu we' daga" vao ye" lo" ra". **16** Petru wa taung gaung shad' vang" kham: nhae mae na: jo; ra". Ailao" ai: khijaung yin" pho" we' jho" se" ra" gatau: mho"zo: yang wa taung gaung shad' khyo dam: thug' lo mung:- kham: dung: lhaug' ra" myiqe: nau" re ta" yang: Petru re akhug shad' khyo jhui" vao lo" ra". **17** Kham: dung: lhaug' ra" myiqe: nau" wa Petru re- Nao re: aiyaug: mho"zo: qemae" dayaug ngad: ra" mangad: i? ga: ta" ra". Ailao" Petru wa ngo mangad:- ga: tau" ra". **18** Dau: dau mo, we' gyezo: qe wa gyo, geyang: vha: myi khyeim" mad: to: yang: myikhyeim" lhang" gam: ye; jo, mung: myi: gao: na: bam: ako". Alao" Petru wa ai: khyo ye: mung: yao: bam we' daga" ye; jo, yang: myi: yebogao: na: ra".

Khinjaung Yin" Pho" Yesu Re Myid' Ca: Qu" Ru

**19** Khinjaung yin" wa Yesu re yao" mho"zo: qe: khyo re we' yao" mho" shid' ra" khyo re myid' ra". **20** Yesu wa Ngo wa khonhae" re: byu alhab' mo; qhid' kheim: mae de: de: za: ta" lo va". Aimung: mo,byu qe alhab' mo, zang" ham: na: ra" Tarha" Jung Yham mae we' Caung: Pa" Yham mae ngo mho" shid' lo va". Ngo wa khonhae" re: anyham: avho' mae daja: re: mata" qu"- **21** Aire nao=nhaung" ngore myid: ko" i? Nga" mho" dao: re tae" gyo" ra" mo,byu qere myid' qu" ge,- Ngo pe" ta" lo: rure yao: bam re myid: ge,- Ngo pe" ta" rure yao: bam ba: ako"- ga: tau" ra". **22** Yesu ceru: ta" lao"- gug: gam qemae" dayaug wa Yesu re bopyo' pyo' mung:- khoru: mung: nao wa khinjaung yin" re airu: vae" ta" i? ga: ta" ra". **23** Yesu wa yao: re- Ngo dakheim: kheim: jhau: shad' re wa ce:moe na: ra" mo, alhab' mo; qhid' kheim: mae khokheim: shad' rure ceim" shid' la,- Ngadqere: ngo ta" ra" khyo dang: ngad: re wa pe"mung: ngo re pyo' i? ga: ta" ra". **24** Aithao re Anna wa airu: tau: to: lo, qo malhai: lo: Yesu re khinjaung yin" Kayapha jhao" dai" nhao: ke' ra".

Yesu Re Petru Dam: Ha: Pye' Ru

**25** Petru wa myi: gao yang: ai:tau mae ye; jo; ash"- Aimung: gatau damyo" wa Nao re: ai:yang: mho"zo: qemae" dayaug ngad: ra" mangad: i? ga: ta" ako". Ngadqere: Petru wa Ngo mangad: ga: ha: pye' ra". **26** Petru yang nokhye' qam" phyd' khyo" pye' byid' ra" khinjaung yin" nho: jeim pho" we' ba nam dau: ra" jeim gayaug re:- Nao re: ai: khyae khug mae yao: we' daga" na: rure ngo myao:- mangad: i? ga: ta" ra". **27** Petru wa Ngo mangad:- ga: dam: ha: pye' ra". Ailao"jao" qo, teim: ra".

Pilad Qhid' Kheim: Khyo Yesu Joe" Ye" Ru

**28** Ne, seim no' Yesu re Kayapha yham mae" Roma mung" zug: pho" yham khyo jhui" dai" ye" ako". Kheim: so' qo" ra" Yuda qe wa Lai Co' Poe myi" xeim re qo" zo: nae" qhid' mae" yao: yao" gaung re caung: pa" thung" khyo" yang san sin" jo, nug geyang: yham mo" khug khyo mavao ye: ko" ngad: ra". **29** Aimung: Pilad wa taung gaung khyo thug' ye: yang: nao=nhaung" ceyaug re pe" ja" qobo zhaug' ko" i? ga: yao: bam re myid' ra". **30** Yao: bam wa Ce:yang qobo daja: ja: kad' shad' yang: mangad: re wa ni" qhid' kheim: khyo ngo=nhaung" jhui" li" zai mangad:- ga: tau" ako". **31** Pilad wa Airu: lao" wa yao: re nao=nhaung" yao: jhui"

lo" mung:- nao=nhaung" yao" tarha" jo; ru we' dakhyo:- yao: re dao: lo" kho' ge,- ga: yao: bam re ta" ra". Yao: bam wa Ngo=nhaung" wa byuse' nae" akhang" maqo"- ga: tau" ako". **32** (Yao: bam airu: ta" ko" ru wa Yesu yao: khoru: shid: li" nae"- ga: ta" shid' to" ra" dao: jham jab byang" li" nae" qhid' mae" ngad: ra".) **33** Pilad wa yham mo" khug khyo dam: vao lo" mung: Yesu re khai: yu yang:- Nao wa Yuda qe: kho:kham ngad: i? ga: Yesu re myid' ra". **34** Yesu wa yao: re- Ce: dao: myid: wa naoyao" myid khyo" myid' ru i? Mangad: lao" nga" khyo re su gaje qe:yang nao re ta" kyo: vako" ra" i? ga: myid' ra". **35** Pilad wa Nao ngore Yuda byu dayaug ngad: ein: jho: i? Nao re nga" lo, khyo li" ab byid: ko" ra" mo, wa naoyao" amy" qe we' khinjaung qi: qe ngad: ako"- Nao pe" kad' shad' va" i? ga: phaug' tau" ra". **36** Yesu wa Nga" mung" dan: wa ce: mug:myid mae" mangad:- Nga" mung" dan: wa ce: mug:myid mae" angad: re wa Yuda kheim: so' qo" ra" mo; lo, khug khyo ngo mavao lo" sho' nga" byu qe khe' khyad' yu: li" genae". Nga" mung" dan: wa ce:mae mangad:- ga: ta" ra". **37** Airumung: Pilad wa yao: re- Airu: ngad: re wa nao wa kho:kham ngad: i? ga: myid' ra". Yesu wa Nao wa ngo re kho:kham ngad: ra"- ga: ta" ra". Ngo wa dangman" ra" khyo re ta" kyo: nae" qhid' mae" khau: li" mung: ce: mug:myid khyo joe" gyo" li" ru ngad: ra". Dangman" ru we' sin" ra" yang khag' ngadqere: nga" dao: re tae" gyo" ra"- ga: tau" ra". **38** Ailao" Pilad wa dangman" ru wa pe" ngad: i? ga: myid' ra".

Yesu Re Se' Pye' Nae" Dao: Phyd' Ru

Ai:thao Pilad wa taung gaung shad' khyo mo,byu qejhao" dam: thug' ye: mung: yao: bam re- Ngo wa yao: re dao: phyd' nae" akhyo: pe" mamyo- **39** Ngadqere: nao=nhaung" thung" jo; ru we' dakhyo:- Lai Co' Poe gyo: mae thaung: byu dayaug yang re ngo wa khonhae: re: lhaung" lhoe' ke' byid' ra". Aimung: nao=nhaung" qhid' mae" Yuda qe: kho:kham re lhoe' ke' byid: nae" nao=nhaung" o ko" i? ga: myid' ra". **40** Yao: bam wa Aiyang re dalhoe' ke'- Baraba re lhoe' ke' byid: la,- ga: yao: re zag: hug' ako". (Baraba wa damya, ngad: ra").

**19:1** Pilad wa Yesu re jhui" thug' lo" mung:- be, nhao: ra". **2** Gyezo: qe wa zau: kyao: yang ba maug: dalam: kad' yu mung: Yesu au: mae zhaung: byid' ako". Ai: thao re yao: bam wa Yesu re bau: qhang ane vhe' byid' ako". **3** Yao: bam wa Yesu jhao" qui" li" mung:- Yuda qe: Kho:kham we"- Kao qhang so' qhang vashao: wo"- ga: ta" yang: Yesu re bopyo' pyo' ako". **4** Pilad wa taunggaung shad' khyo dalhang dam: thug' ye: mung: mo,byu qere- Qu" ge, Ngo wa yao: re dao: phyd' nae" akhyo pe" daja: rere: mamyo: rure nao=nhaung" re ba nhao nae" qhid' mae" yao: re ngo ce: jo, qo khyo jhui" thug' li" nae"- ga: ta" ra". **5** Yesu wa zau: kyao maug zhaung:- bau: qhang ane ve; pye' yang: taunggaung shad' khyo thug' lo: ra". Pilad wa Qu" ge, Ceyaug ngad: ra" ga: yao: bam re ta" ra". **6** Khinjaung qi: qe we' Caung: Pa" Yham gug: gam qe Yesu re myao gelao" yao: bam wa Yao: re pyao:zang mae jin" se' pye' wa,- Yao: re pyao:zang mae jin" se' pye' wa,- ga: zag: hug' ako". Pilad wa yao: bam re airu: lao" wa yao: re nao=nhaung" jhui" lo" mung: pyao:zang mae lo" jin" se' pye' ge,- Ngo wa yao: re dao: phyd' nae" akhyo pe" daja: rere: mamyo- ga: ta" ra". **7** Alao" mo, byu qe wa- Yao: wa Mao" So: yao: Zo: ngad: ga: yao: yao" gaung re ta" na: ruyang yao: wa shid man" ra" yang ngad: rure ngo=nhaung" tarha" mae ta" to" ra"- ga: dam: phaug' tau" ako". **8** Pilad wa ai: dao: re the' gyo: lao" je yang: gyaug: li" ra". **9** Yao: wa yham mo" khug khyo dam: vao lo" mung: Yesu re Nao khai: mae" ngad: i?- ga: myid' ra". Ngadqere: Yesu wa pe" re: matau: ngad: ra". **10** Alao" Pilad wa Yesu re- Nao ngo re majhau nae" i?- Ngo wa nao re lhoe' ke' nae" kheim: so' re:- pyao:zang mae jin" se' pye' nae" kheim: so' re: qo" yang ngad: rure nao maba i? ga: myid' ra". **11** Yesu wa- Ai: kheim:so' wa Mao" So: yang nao re byid' to: yang: za: nao qo" ru ngad: ra". Aimung: ngo re ni" lo, khyo ab byid' ra" yang wa je yang: qobo qo" ra"- ga: ta" ra". **12** Pilad wa ce:dao: re the' gyo: lao" Yesu re lhoe' ke' nae" khyo qho: ra". Ngadqere: mo, byu qe wa- Nao yao: re lhoe' ke' lao" wa Roma Kho:sin" pho" ba nam mangad: lo:ngad: ra"- yao: Yao" gaung re Kho:kham ngad: ga: ta" yang wa Roma Kho:sin" pho" re tau: lhan: yang ngad: ra"- ga: hug' ako". **13** Ai: dao: jham re Pilad the' gyo: lao" yao: wa Yesu re taunggaung shad' khyo jhui" thug' ye: mung:- Laug Myhung: Jao: ga: mhang" ra" jo, qo mae" tarha" zug: pho" zaung tao" dao mae zaung: ra". (Hebre myan" khyo" Gabatha ga: mhang" ako"). **14** Ai: ayo, wa Lai Co'Poe ba qhid' ba- ba khaung tau: li" na: ra" ayo, ngad: ra". Pilad wa mo,byu qere- nao=nhaung" kho:kham pho" re qu" ge,- ga: ta" ra". **15** Yao: bam wa Yao: re- se' pye' wa,- Yao: re se' pye' wa,- Yao: re pyao:zang mae jin" se' pye' wa,- ga: zag: hug' ako". Ailao" Pilad wa yao: bam re- Ngo: yang nao=nhaung" kho:kham re pyao:zang mae jin" se' pye' nae" rure nao=nhaung" nug ko" i? ga: myid' ra". Khin jaung qi: qe wa Ngo=nhaung" qo" ra" kho:kham wa Roma Kho:sin" dayaug za: angad:- ga: tau" ako". **16** Ai:thao Pilad wa

Yesu re pyao: zang mae jin" se' pye' nae" qhid' mae" yao: bam: lo, khug khyo ab byid' ke' ra".

Yesu Re Pyao: Zang Mae Jin" Se' Pye' Ko" Ru.

Aimung: yao: bam wa Yesu re jhui" thug' lo" ako". **17** Yesu wa Au: Gao: Gye, ga" ra" jo,qo khyo yao" pyao:zang re vo, yang: ye" lo" ra". (Hebre myan" khyo" Golgotha ga: mhang" ako"). **18** Yao: bam wa ai: mae yao: re pyao:zang mae jin" se' pye' ako". Byu gatau shid' yaug rere: Yesu re agaung: mae to: mung:- dashad' mae dayaug pyao:zang mae jin" te' to" ako". **19** Pilad wa aso: tung" ce' tung" mung: Yesu nho: pyao:zang dao mae te' to: nhao: ra". Ai wa- Yuda qe: Kho:kham Nazaret vobyu Yesu- ga" ru ngad: ra". Aso: tung" ce' re Hebre- Latin- Greek myan" jham hkyo" tung" te' to" ako". **20** Yesu re pyao:zang mae jin" se' pye' ra" jo,qo wa vomo" mae" mataung" va" ru:yang byu myo: sho' mo, aire myao: nghe' ako". **21** Ailao" khin jaung qi: qe wa Pilad re- Yuda qe: Kho:kham ein: datung"- Ce:yaug wa Ngo wa- Yuda qe: Kho:kham ngad: ga:- ta" ra" ein: kam" tung" wa,- ga: ta" ako". **22** Pilad wa ngo tung" to" ru we' dakhyo: ngad va"- ga: tau" ra". **23** Gyezo: qe wa Yesu re pyao:zang mae bin: jin" te' pye' gelao"- yao" mai bau: re yu: yu mung:- byid bam khyo" yang: dayaug dabam jho" gae: yu: ako". Yao: bam wa bau: qhang rere: yu: ako". Ai: bau: qhang wa khyab' khyo: made, lo: qo; to" ra" bau: ngad: ra". **24** Aimung: gyezo: qe wa ce:bau: re wa macad' gejhao"- Khag' qo" yu nae" rure pha" be, gelang:- ga: yao: cao: jho" ta" ako". Gyezo: qe airu: ta" ko" ru wa "Yao: bam wa nga" mai bau: re yao: bam yao: cao: jho" gae: yu mung:- Nga" bau: qhang qhid' mae" pha" ce' khyo" ako"- ga" ra" jham: dao: jab byang" li" nae" qhid' mae" boe" ru ngad: ra"". Gyezo: qere: ai we' dakhyo: kad' ako". **25** Yesu nho: pyao:zang nhae mae yao: myhi"- yao: myhi" nho: yao: nhaung:- Kleopha nho: yham sang myhi" Mari-Magadala Mari bam ye; jo; ako". **26** Yesu wa yao: myhi" we' yao: jhid' de; ra" mho"zo: ai: mae ye; jo, ko" rure myao mung:- Yesu wa yao: myhi" re Yao: wa ni" zo: ngad: ra" ga: ta" ra". **27** Ai:thao re Yesu wa ai: mho"zo: re- Yao: wa ni" myhi" ngad: ra"- ga: ta" ra". Ai: ba mae" ai: mho"zo: wa Yesu yao: myhi" re yao" yham khyo lo" jhui" nha: to" ra".

Yesu Kao Gyo" Ru

**28** Yesu wa mau"zo" alhab' bin va" rure ba mung:- Jham: mug sug' mae tung" to" ru we' dakhyo:- jab byang" li" nae" qhid' mae" Ngo qid shab' kyi: ga: ta" ra". **29** Ai:mae sabyi' qang: jhin byang" sho' bo: ra" jarung: dalam: jo; ra". Aimung: yao: bam wa sabyi qang: jhin mae qid mug sad' jam: yu yang:- Husub kaung mae thug' ze; te' mung: Yesu nhad' khyo to' byid' ako". **30** Yesu wa ai: sabyi qang: jhin re bin: shaug' mung:- Mau" bin va"- ga: ta" yang: yao" au: goe; lo" mung: kao gyo" lo" ra".

Yesu Nho: Nae Dan: Re Lhae Tad' Yang Thug' Ru

**31** Ai:thao kheim: so' qo" ra" Yuda qe wa pyao: zang mae jin" se' pye' ra" mo; khyid jham re khyug' pye' mung:- pyao: zang dao mae" mao gaung jham re yu: khyo" yu nae" qhid' mae" Pilad re akhang" mho' ako". Yao: bam ceru: mho' ko" ru wa ai: ba wa banthug' ngo" ba: ba ngad mung:- Dug No: Ba re pyao:zang jham mae mao gaung jham re malao" jo, nhao nug geyang: ngad: ako". Pe"mung: ga"re ai: Dug No: Ba wa je: gyang" lho" ra" ba na ngad: ra". **32** Aimung: gyezo: qe wa ye" lo" mung:- Yesu we'daga" pyao: zang mae jin" te' to: qhug' ra" sao qhid' yaug: khyid re be; khyug' pye' mung:- thao mae" yaug: khyid rere: be; khyug' pye' byid' ako". **33** Ngadqere: yao: bam wa Yesu jhao" joe" lo gelao"- Yesu shid va" rure lomyao gemung:- yao" khyid re wa mabe; khyug' ko" ngad: ra". **34** Ngadqere: gyezo: dayaug wa lhae tad' yang Yesu nae dan: mae yethug' ke' we' aijao" sa: we' qid yug: thug' li" ra". **35** (Nao=nhaung" re: ce: khyo re lam" genae" qhid' mae"ceru: boe" rure yao" myo; yang yao: the' myao: ra" yaug yao: ta" ru ngad: ra". Yao: ta" ru wa dang: ra"- Aimung: yao: wa dangman" ra" dao: ta" ru ngad: rure yao: yao: ba: ra".) **36** Ceru: boe" ru wa- yao" shoqug: dakhe' re: khyug' ru maqhub' nae"- ga: ta" to" ra" jham: dao: jab byang" li" ru ngad: ra". **37** Amung: jham: mugsug' gatau dalam: mae re:- Yao: bam: yang lhae tad' yang thug' ra" yaug re yao: bam ceim" qu" li" genae"- ga: ta" to" ra".

Yesu Re Nyhab' Shaung: Ru

**38** Ai:thao Arimathia vogaung: mae" Yoseb wa Yesu nho: maogaung re yu: yu nae" qhid' mae" Pilad re akhang" yemho' ra". (Yoseb wa kheim: so' qo" ra" Yuda qere gyaug yang: anyham: avho' khyo" Yesu mho"zo: boe" na yaug ngad: ra"). Ailao" Pilad wa Yoseb re akhang" byid' ke' ra". Yoseb wa ye" lo" mung:- mao gaung re yeyu: yu: ra". **39** Qhid' phyao: myi" ayo, re Yesu jhao" li" ra" Nikodi wa Mura we' Ajho: lhag' ra" sheim nae pyo" ra" ja: sam xe: ngo" joe: ko yu: vin mung:- Yoseb we' daga" cao" ye" ra". **40** Yao: shid' zo: wa Yesu mao gaung re yu: yu mung:- Yuda byu qe: nyhab' shaung nae" mao gaung re nyhang" shaung: ra" thung" we' dakhyo:- sheim nae pyo" ra" ja: gyad mung: jid:mo" pin" yang mao gaung re thab' ako". **41** Yesu re pyao: zang mae jin" se' ra" jo,qo mae khyae dalam: jo; ra". Aimung: ai: khyae mae khag' re: manyhab' qu" shi" ra" lab asag' dalam: re: jo; ra". **42** Ai: ba wa Dug No: Ba: qhid' ba- seim" jin" ra" ba na ngad: ru we' lab re: ajhao" mae jo; ruyang yao: shid' zo: wa Yesu nho: mao gaung re ai: lab khug mae yeke' to" ako".

Yesu Dam: Dau: To" Li" Ru

**20:1** Laban ba ne, seim no' myo, mamyao shire- Magadala Mari wa lab khyo ye" lo" ra". Yao: wa lab nhad' mae" laug zang tau: qhui" pye' to: va" rure yemyao: ra". **2** Aimung: yao: wa Simun Petru we' Yesu jhid' de; ra" gatau: mho"zo: jhao" tao" ye: mung:- Yao: bam wa Asang re lab mae" yu: pye' vagenhaung- Khai: mae yeto" pye' vako" laug? Ngo=nhaung" maba lo: ga: yeta" ra". **3** Ailao" Petru we' ai: gatau: mho"zo: qe wa lab khyo ye" lo" ako". **4** Yao: shid' zo: shid' zo" geim" tao" ye" lo" ako". Ngadqere: gatau: mho"zo: yaug wa Petru tho' je: qao mung:- lab khyo qhid' joe" ye" ra". **5** Yao: gam" qu" ke' re jid:mo" pin: lung: jham bam: jo; rure myao: ra". Ngadqere: yao: wa lab khug khyo mavao ye: ngad: ra". **6** Simun Petru wa yao" thao mae joe" li" mung:- lab khyang khug khyo khyao za: vao ye" lo" ra". Yao: wa jid: mo" pin: lung: jham bam: jo; rure we' Yesu au: mae thab' ra" pin: dau re yemyao: ra". **7** Yesu au: mae thab' ra" pin: dau wa jid:mo" pin: lung: jham we' daga" majo, lo:- yao: yao: za: gatau mae kheim" bam: jo; ra". **8** Ai:thao re lab khyo sao qhid' joe" ye" ra" gatau: mho"zo: re:- lab khug khyo vao ye" lo" mung:- ai:ru re yao: yao: yemyao yang: lam" ra". **9** (Yesu wa shid: rumae" dam: dau: to" li" ca"- ga" jham: dao: re yao: shid' zo: maba: gyo: shiko" ngad: ra".) **10** Ai:thao mho"zo: shid' yaug wa yham khyo phao: lo" ko" ra".

Magadala Mari Re Yesu Yao" Gaung Na: Qhu" Byid' Ru

**11** Mari wa lab taunggaung shad' mae ngug: ye; jo; ra". Yao: wa airu: ngug zo" re" lab khyang khug khyo gam" qu" ke' re- **12** Maibau: phyu ve; ci: ra" mug: lagyo: shid' yaug re Yesu nho: mao gaung mhao" to" ra" jo,qo mae- au: tho' shad' mae dayaung- khyid thao shad' mae dayaung zaung: jo, ko" rure myao: ra". **13** Lagyo: shid' zo: wa Myiqe: we"- Nao pe" mung: ngug: na: i? ga: myid' ako". Ailao" Mari wa Yao: bam wa nga" Asang re yu: pye' mung:- khai: mae yeto" pye' ko" rure ngo maba yang: ngad:- ga: yao: shid' zo: re tau" ra". **14** Airu: ta" mung: lhang: lo: re Yesu aimae ye; jo; rure myao: ra". Ngadqere: Yesu ngad: rure yao: maba ngad: ra". **15** Yesu wa Myiqe: we"- Nao pe" mung: ngug: na: i? ga: yao: re myid' ra". Ailao" Mari wa Yesu re khyae lhaug' yaug ngad: ga: jho mung:- Nhag' bo we"- Yao" mao gaung re nao vo; yu: pye' ngad: re wa nao khai: mae yeto" rure ngo re ta" kyo: la,- Ngo wa yao: re yeyu: yu nae"- ga: ta" ra". **16** Yesu wa yao: re Mari we"- ga: yao: ra". Mari wa Yesu shad' khyo lhang: lo mung: Hebre myan" khyo" Raboni ga: tau" ra". (Raboni ga" ru wa mho"pho"- ga" ru ngad: ra".) **17** Yesu wa yao: re- Ngo re dazau: la,- Pe"mung: ga"re ngo wa Pho" jhao" mado, lo" shi:- Ngadqere: nga" mao: nhaung: qe jhao" lo" mung:- yao: bam re- ngo wa nga" Pho" we' yao: bam: Yao: Pho" ngad: ra" nga" Mao"so we'yao: bam: nho: Mao"so jhao" dam: do, lo" nae" ngad: ra"- ein: lo" ta" kyo: byid: la,- ga: ta" ra". **18** Aimung: Magadala Mari wa lo" yang: Asang re yao: the' myao va" ru we' Asang yao: re pyang: ke' ra" dao: jham re mho"zo: qere yeta" kyo" ra".

Yao" Mho" Zo: Qere Yesu Yao" Gaung Na: Qhu" Ru

**19** Laban ba myi" thao mug: sham" sham" cad' lo: yo, re mho"zo: qe wa Yuda kheim: so' qo" mo, re gyaug geyang: yham khug mae kham: pyid' pye' mung: zang" ham: na: bam: ako". Ailao" Yesu wa joe" li" mung: yao: bam: phaung gaung: mae li" ye; jo, yang:- Nao=nhaung" ngau pyo: yaug yo vageshao:- ga: ta" ra". **20** Airu: bin: ta"lao"- Yesu wa yao" lo, we' nae dan: re yao: bam re qhu" byid' ra". Ailao" mho"zo: qe wa Asang re the' myao gemung:- gyai ngau bau" ako". **21** Yesu wa yao: bam re- Nao=nhaung" ngau bau: yaug yo

vageshao:- Pho" wa ngo re nhao: ke' ru we' dakhyo:- Ngo re: nao=nhaung" re nhao: ke' ra" ga: dam: ta' ra". **22** Ai:thao Yesu wa mho"zo: qe: dao mae so' she: ke' mung:- Gyang" Lho" Byo re khae: yu ge,- **23** Qobo qo" ra" mo, re nao=nhaung" qobo khyad' byid: ko" re wa yao: bam wa qobo khyad' byid' ru qhug' li" genae"- Nao=nhaung" qobo makhyad' byid: ko" re wa yao: bam wa qobo khyad' byid' ru maqhuq' genae"- ga: ta" ra".

Yesu we' Thoma

**24** Yesu li" ra" au: re mho"zo: daxe: shid' yaug mae bobo: ra" (zozam ga: mang: ra") Thoma wa mho"zo: qe we' daga" mana: ang ngad: ra". **25** Aimung: gatau: mho"zo: qe wa ngo=nhaung" wa Asang re myao va"- ga: ta" kyo" ako". Ailao" Thoma wa ngo wa yao" lo, mae" zae jin" khu re myao mung:- ai: dae khu jham re nga" lo, nyhug' yang yao: soe' qu" yang:- nga" lo; yang yao: yao" nae dan: re maqo" soe' re wa ngo malam" nae"- ga: yao: bam re tau" ra". **26** Dalaban kyo thao re mho"zo: qe wa yham khug mae dam: zang" ham: na: bam: ako". Thoma re: yao: bam we' daga" na: jo; ra". Kham: jham re pyid' to" ako"- Ngadqere: Yesu wa joe" li" mung:- Yao: bam: phaung gaung: mae li" ye; jo, yang:- Nao=nhaung" ngau pyo" na vageshao:- ga: ta" ra". **27** Ai:thao Yesu wa Thoma re- Ni" lo, nyhug' yang nga" lo, re tin" qu" wa,- Nga" lo, rere: qu" wa,- Amung: ni" lo, yheim" ke' yang: nga" nae dan: mae re: soe' qu" wa,- Aug' o: myid dabo- lam" wa,- ga: ta" ra". **28** Thoma wa Yesu re- Nga" Asang we' Nga" Mao" So ga: ta" ra". **29** Yesu wa yao: re- Nao wa ngo re the' myao yang: lam" i? Ngo re mathe' myao lo:- ngo re lam" mo, wa ngau lho" ko" ra"- ga: ta" ra".

Ce: Jham: Paug' Re Pe" Mung: Tung" Ru

**30** Ce: jham: paug' mae mabo: tung" to" ra" gatau mug' pho: ve, lho jham myo: sho' re: Yesu wa yao" mho"zo: qe: qhid' kheim: mae zau" qhu" ra". **31** Ngadqere: Yesu wa Mao" So: yao: Zo: Meshia ngad: rure nao=nhaung" lam" genae" qhid' mae" we' yao: re lam khug: ra" khyo" yang nao=nhaung" wa kao so' qo" yu genae" qhid' mae" ce: jham: paug' re tung" to" ru ngad: ra".

Mho" Zo: Nhad' Yaug Re Yesu Yao" Gaung Na: Qhu" Ru

**21:1** Ai:thao re Yesu wa Tiberi tham: mae yao" mho"zo: qere yao" gaung na: qhu" byid' ra". **2** Boe" ra" khyo wa ceru: ngad: ra". Simun Petru- (zozam ga: mang yaug) Thoma- (Galile Ka Na vobu) Nathanela- Zebedi yao: zo: tao we' Yesu mho"zo: gatau shid' yaug wa daga" za: na: bam: ako". **3** Simun Petru wa gatau mho"zo: qere Ngo ngo: kung" ye: nae"- ga: ta" ra". Ailao" yao: bam wa Ngo=nhaung" re: cao nae"- ga: yao: re ta" ako". Ai:mung: yao: bam wa lha dakhye' mae do; zaung mung:- ngo: yekung" ako". Yao:bam wa ai:myi damyi: geim" kung" gengad yang: re:- ngo: dadau: re: mathe' ko" ngad: ra". **4** Ba thug' li" lao" Yesu wa qid yae mae yeye; jo; ra". Ngadqere: mho"zo: qe wa Yesu ngad: rure maba ko" ngad: ra". **5** Ailao" Yesu wa Zolau: bam we"- Ngo: mathe' kung" ko" i?- ga: yao: bam re myid' ke' ra". Yao: bam wa Pe" re: mathe' kung"- ga: tau" ako". **6** Aimung: Yesu wa Nao=nhaung" nho: geim re lha lo, yo shad' khyo khyo" ke' ge,- Nao=nhaung" the' li" genae"- ga: yao: bam re ta" ra". Ailao" yao: bam wa Yesu ta" ru we' dakhyo:- geim re khyo" ke' ko" re- ngo: myo: sho' re the' myi" yu yang: geim relhao" matho' she: to' yu loko" ngad: ra". **7** Yesu jhid' de; ra" mho"zo: wa Petru re- Asang ngad: ra"- ga: ta" kyo" ke' ra". Petru wa Asang ngad: ra"- ga" rure the' gyo: lao"- yao: wa yao" adao: bau: qhang re gaung mae gaug: yang" mung:- qidtham: khyo byae: gyo" ye" ra". (Pe"mung: ga"re yao: wa gaung pyad' ngad: ra".) **8** Gatau: mho"zo: qe wa gyuigao: yo we' gyai mataung" va: lo:- gad' dayo za: kyo loyang:- ngo: byang" sho' myi" jo; ra" geim re she zo" re" tham: yae khyo lha we' joe" lo: ako". **9** Yao: bam gyuigao: yo khyo joe" lo gelao"- myigyoe: dao mae kao: to" ra"ngo: jham re we' mug jham re lomyao: ako". **10** Ailao" Yesu wa yao: bam re- Nao=nhaung" the' kung" to" ra" ngo: daqhae: cilo geri:- ga: ta" ra". **11** Simun Petru wa lha khug khyo vao ye: mung:- ngo: qi: jham byang" sho' myi" jo; ra" geim re gyuigao: yo khyo yeshe: to' yu: ra". Ngo: dayo: ngo" xe: sam dau: myi" ngadqere: geim majad ngad: ra". **12** Yesu wa yao: bam re- Lozo: geri:- ga: ta" ra". Yao:bam wa Asang ngad: rure ba geyang:- Nao khag' ngad: i? ga:- mho"zo: qe khag' dayaug re: Yesu re mavae" myid: ko" ngad: ra". **13** Aimung: Yesu wa yao: bam jhao" ye: mung:- mug rere: yu: yu yang:- yao: bam re byid' ra"- Ngo: rere: ai we' dakhyo: byid' ra". **14** Yesu wa yao: shid; rumae" dam: dau: to" li" thao- mho"zo: qere yao" gaung na: qhu" byid' ru celhang wa sam lhang ein: lhang ngad: ra".



## Yesu we' Petru

**15** Yao: bam bin: zo: gethao re Yesu wa Simun Petru re- Yohan nho: yauggai zo: Simun we"- Gaje qe ngo re jhid' de, ko" ra" tho' nao ngo re je: jhid' de; i? ga: myid' ra". Petru wa Asang we"- Nao re ngo jhid' de;- Nao re ngo jhid' de; rure nao ba: ra"- ga: tau" ra". Ailao" Yesu wa yao: re Nga" yao nau" jham re khau wa,- ga: ta" ra". **16** Yesu wa shid' lhang ein: lhang Petru re- Yohan nho: yauggai zo: Simun we"- Nao ngo re jhid' de; i? ga: dam: myid' ra". Petru wa Asang we"- Ngo jhid' de;- Nao re ngo jhid' de; rure nao ba: ra"- ga: tau" ra". Yesu wa yao: re Nga" yao jham re zam: wa,- ga: ta" ra". **17** Yesu wa sam lhang ein: lhang Petru re- Yohan nho: yauggai zo: Simun we"- Nao ngo re jhid' de; i? ga: myid' ra". Ailao" Petru wa Nao ngo re jhid' de; i? ga: sam lhang yao: taung" myid' ru: yang nhag' gyo" kaug' mung:- Asang we"- Nao wa alhab' re ba yaug ngad: ra"- Nao re ngo jhid' de; rure nao ba: ra"- ga: phaug' tau" ra". Yesu wa yao: re- Nga" yao jham re khau: na wa,- ga: ta" ra". **18** Nao re ngo dang za: ta" li"- Nao wa zolau: yo, re ni" gaung re naoyao: seim" jin" mung:- naoyao: ye: nug: ra" khyo qo" ye" ra"- Ngadqere: nao mao" lo" lao" wa ni" lo, shid' shad' geim" yheim" ke' mung:- su gaje: yang tau: yang:- nao manug: ye" ra" jo,qo khyo nao re jhui" ye" li" genae"- ga: ta" ra". **19** (Airu: ta" ru wa Petru wa khokhyo" shid mung: Mao" So: phung bao bao: thug' li" nae"- ga" rure Yesu ceim" shid' yang: ta" ru ngad: ra".) Ai:thao Yesu wa Petru re- Nga" thao cao" wa,- ga: ta" ra".

## Yesu we' Gatau: Mho" Zo:

**20** Petru lhang: qu" ke' re- yao" thao mae Yesu jhid' de; ra" gatau: mho"zo: re the' myao: ra". Ai: yaug wa myi" xeim zo" na ko" au:- Yesu we' te' te' zaung: nga: jo, yang:- Asang we"- Nao re ab byid' pye' nae" khoyaug ngad: ra"i? ga: Yesu re myid' ra" yaug ngad: ra". **21** Petru wa ai: yaug re myao lao"- Asang we"- Ceyaug: khyo we' sin: yang: khoru: i? ga: Yesu re myid' ra". **22** Yesu wa Petru re- Ngo joe" li" ra" ba na joe" sho' yao: re ngo dau: na nhao nug ngadqere:- ai wa nao we' pe" sin" i? Nga" thao cao" wa,- ga: ta" ra". **23** Aimung: ai: mho"zo: wa mashid nae"- ga" ra" lau dao: wa mho" zo: qe: phaung mae hau" nhao" lo" ra"- Ngadqere: Yesu wa ai: mho"zo: mashid nae"- ga: ta" ru mangad:- Yao: ta" ru wa Ngo joe" li" ra" ba na joe" sho' yao: re ngo dau: na nhao nug ngadqere:- aiwa nao we' pe" sin" i? ga: ta" ruza: angad: ra". **24** Mho"zo: ai: yaug wa ce: khyo jham re sagse: kham mung:- cera" khyo jham re tung" xam" to" ra" yaug ngad: ra". Yao: sagse: kham: to" ru wa dangman" ru ngad: rure ngo=nhaung" ba: ra".

## Dao: Pin"

**25** Yesu zai" ra" mau" zo" gatau myo: sho' jo, shi" ra"- Ai:gu: alhab' re azo" tai" tung" xam" to: nae" ngad: re wa ce: mug:myid' geim" mae lhao" re:- ai: mugsug' paug' jham to: nae" jo,qo qui" nae" mangad:- ein: ngo myid: jho: ra".

## Recent Visitors

[Click to Get](#)  FEEDJIT